

# Mataio

## Yeng Yesuac Siduc Gombang Ohoec

---

**1** <sup>1</sup>Yesu Kristo arunac finge sahe amma finge ceregec, imocac yofi ohogec. Yesu ye Dawidi arunac nga Dawidi ye Abrahang arunac. <sup>2</sup>Abrahang ye Isakaac mama. Isaka ye Yakoboac mama. Yakobo arunac Yuda nga dacmunafora. <sup>3</sup>Yudaac medahora Perese nga Dzera fingeroc, yereac nonggongira Tama. Anu Perese ye Hesoronggac mama nga Hesoronggo Ranggac mama. <sup>4</sup>Ranggo Aminadaac mama, Aminadango Nasonggac mama nga Nasonggo Sarmonggac mama, <sup>5</sup>Boas ye Sarmong nga enema Rahaba arunac. Boasi ye Obedac mama nga nonggea, imoc Ruti. Nga Obedngo Isaiac mama. <sup>6</sup>Isaingo ngictau Dawidiac mama, Dawidingo Saromoac mama yeac nonggea ye warac Uriaac enema kefec. <sup>7</sup>Saromo ye Rehoboanggac mama, Rehoboang ye Abiaac mama nga Abia arunac Asafa. <sup>8</sup>Asafa ye Yosafataac mama, Yosafatango Yoranggac mama nga Yorang ye Usiaac mama. <sup>9</sup>Usiango Yotanggac mama, Yotang ye Ahasiac mama nga Ahasi yearunac Hesekia fingerec. <sup>10</sup>Hesekia arunac Manasse fingerec, Manasse arunac Among, Among arunac Yosia fingerec. <sup>11</sup>Yosia yearunac Yekonia nga munafora finge cgec. Yeni Babirong bangecfu meyunu kenggec, naso imohai finge cgec. <sup>12</sup>Yeneac ngadeu Saratiere fingerec, ye Yekoni arunac. Nga Saratiere yearunac Dzorobabe. <sup>13</sup>Dzorobabe arunac Abiudu, Abiudu arunac Eriaking, Eriaking arunac Asore fingerec. <sup>14</sup>Asore arunac Sadoko, Sadoko arunac Aking nga Aking arunac Eriudu fingerec. <sup>15</sup>Eriudu arunac Ereasa, Ereasa arunac Matang nga Matang arunac Yakobo fingerec. <sup>16</sup>Yakobo arunac Yosefe Mariaac ewea fingerec. Nga Maria yearunac Yesu, kpara Kristo degec, ye fingerec. <sup>17</sup>Finge sahengina Abrahang arunac erekecma Dawidi fingeru andenga 14 ande. Nga Dawidi arunac finge sahengina erekecma andenga 14 ammanu Babironnu meyunuma kenggec. Nga imohacnac namma erekecgec andenga 14nu Messia fingerec.

<sup>18</sup>Yomoc Yesu Kristoac fingec fingecac siduc. Maria nga Yosefe yeri eweeneng anecdeac yoc dedzege bic anoc nga Maria yeng ine Yosefegoc feyac mi ammaec Tiri Asuarunac medac kpenanggeec. <sup>19</sup>Nga ewea Yosefeng ifi negemma ngic kpetiac kefecac ngicngac yeneac kicfu enembingeha gamekpekpe ammiudeac negenu naric mi anu negen negengua mema tembhau aikic waudeac negenec.

<sup>20</sup>Ye imocac negen negengua mema kecmanu Kebuac angero mongngo ine gauu fingecmima yofi edeec, “Yosefe, Dawidiac kisicfunac, ge enembingecga Maria menadeac mi kengecgubeso. Sabac hereau tacde, ye imoc Tiri Asuarunac. <sup>21</sup>Mariango medac mong meude, yeng kecma ngicngacfora kopocsinginaunac mesiyunuu komoc kpegede. Imocac ge kpara Yesu mibesena.” <sup>22</sup>Anu Kebungo yoc profete yenearu faiu degec, imocnoc fingecdarudeac ifi fingerec.

<sup>23</sup>“Negenggec, ngacnaroangngo medac mong kpenanggema meu yeac kpara Imanuere degede.” *(Yesaia 7:14)*

Imocac titiha yofi, Anutungo nenangoc kecde.

<sup>24</sup>Anu Yosefengo gauunac yacma Kebuac angerongo yoc edeec, imoc modacma kemma Maria hesickema ameau enec. <sup>25</sup>Enu yeri eweeneng kekec bic mi kecmaecngoc medac fingeru kpara Yesu kparoc.

**2** <sup>1</sup>Yesu Betreheng amau Yudaia prowinsiu fingerec, naso imohai Herodengo ngictau kefec. Kecmanu negen negengngic goa bangec wenac ere ereaunac Yerusarennu hama <sup>2</sup>yofi degec, “Yudangic ngeneac ngictau fingecdac, ye dahai? Neni wenac ere ereau tacma yeac asomeng ereu hemma ye eweheiminideac hadimbe.” <sup>3</sup>Ifi degec ngictau Herodengo imoc negemma ubaebic meec. Meu ngicngac Yerusareng taonnu kecgec, yeneng ifingoc anggec. <sup>4</sup>Nga ye yudaareng yeneac womong gareng enara nga mitiac negen negengngicfocngina sasawa heitaiyunuma yofi dekpesi ayemmeec, “Messiango dahai fingerudeac dedea?” <sup>5</sup>Ifi kpesiyemmu yofi degec,

“Imoc Betreheng taonnu Yudaia prowinsiu. Imocacnoc profetengo yoc yofi ohoec fede, <sup>6</sup>‘Yuda bangecfu Beterehennac enara mong fingecma isaengicngacfocna garengyunuudeac taong imoc yudaarenggac taong goa yeneac mamea kpac.’” *(Mika 5:2)*

<sup>7</sup>Ifi edegec Herodengo wenac ere ereaunac negen negengngic tembuclu heitaiyunuma asomeng noc nasoac fingerec, imocac naso dindiang negenudeac dekpesi ayemmu edegec. <sup>8</sup>Edegec yeng yofi dema Betreheng amau sueyunuec, “Ngeni kemma sabac dahai fede, imoc hofocma meficgema hama edenugec neng mong ifingoc kemma eweheimibesare.”

<sup>9-10</sup>Ngictaungo ifi deu yeni imoc negemma sinnu kenggec. Kemma asomeng wenac ere ereau henggec, imocngo monggoc fingeru hemma ubangerectoa negemma desogai homac anggec. Nga asomengngo waraiyemmu kengkecma sabac fec, ama imocac witiau heiserima tarec.

<sup>11</sup> Taru yeni amau emma sabac nga nonggea Maria yerenggec. Yeremma fafoc heima ngonducnema ye afehegec. Amma finachienginaunac ubangerecac wiac yofi widicma migec, gol nga hosuc homungkerengagoc amma icsopea homuna gombunga kpara mira. <sup>12</sup> Nga Anutungo yeni Herodearu sing mi dzigenegecdeac gauu goro dema dederegecge ayemmeu yeni sing monnu sing bangecnginau dzigenegec.

<sup>13</sup> Dzigenema kenggec Kebuac angero mongngo Yosefe gauu fingecmima yofi edeac, “Ge yacma sabac nonggeagoc meyuruma worama Aigita bangecfu kemma kecgec. Kecmagec neng edengunubaguc monggoc habisia, nocac Herodengo sabac hofocma meficgema kphomeudeac dede.” <sup>14</sup> Ifi deu Yosefengo tofocnac imohaingoc yacma sabac nonggeagoc meyuruu Aigita bangecfu kenggec. <sup>15</sup> Kemma ihai kecmagec Herode homeguc dzigenegec. Nga Anutungo profetec enacfu yoac faiu yofi deec,

“Ni Aigita bangecfunac medacna kpacba haec.” (Hosea 11:1)  
imoc fora anudeac ifi fingerec.

<sup>16</sup> Anu negen negengngic yeneng Herodeac yoac wagec, ye ifi hemma herebutoa negenec. Negemma Betreheng nga amabangec imocac wegenacfu tarec, imohai wasaingic sueyunuu yeni ngicngac imoc yeneac medacfocngina kifangina yohockang namma made, yeni sasawa yunuhomedacgec. Imoc negen negengngic yeneanunac naso negenec, imocac sirihau anec. <sup>17</sup> Ifi anu profete Yeremiaaru yoac yofi dedea, imoc fora fingerec.

<sup>18</sup> “Raama taonnu kiacsonggong nga ubahodung kuneng fingecde.

Imoc Rahengo nambaracfora homegec, yeneac kiackecde.

Ye nambaracfora homedacgec mong mi kecdaeac demefai  
ammigecdeac mi negende.” (Yeremia 31:15)

<sup>19</sup> Anu Herode homemanuguc Anutuac angero mongngo Yosefe gauu fingecmima yofi edeac, <sup>20</sup> “Ge yacma medac nonggeagoc meyuruma Israe bangecfu kenna, medac kphomebesonga degec, ngic imoc yeni bic homegec.” <sup>21</sup> Ifi deu Yosefengo efaima yacma medac nonggeagoc meyuruma Aigita bangec wama Israe bangecfu dzigenema kenggec. <sup>22</sup> Kemma Yosefengo yoacsiduc yomoc meficgeec, “Akeraongo mama Herodeac tatac mema Yudaia prowins, imocac ngictau anec.” Yosefengo imoc meficgema ihai kecbeso kengec kpeec. Nga ye gauu goroyoac negenecac Gariraia prowinsiu kenec. <sup>23</sup> Kemma taong mong kpara Nadzarete, ihai emma kecgec. Profete yeneng yoac yofi degec, “Ye nadzaretengic, ifi degecde.” imoc fora anudeac ifi fingerec.

**3** <sup>1</sup> Naso imohai Yohane dokunadzicngo Yudaia bangec kisiu hama ngicngac mitiyoac edekpou ayemmema <sup>2</sup> yofi deec, “Kurumenggac eucererengngo bic mewegenengunudeac ngeni ubangina merenggec.”

<sup>3</sup> Nga profete Yesaiango Yohaneac yofi ohoec,

“Bangec kisiu kpakpac mong yofi fingecde, ‘Ngeni KEBUAC sing wisima singa heitumeigec.’” (Yesaia 40:3)

<sup>4</sup>Nga ye wamba kamere dzoeango memea, imoc heima fadenga mong yangseberango memea, imocngo kebangau dzegeec. Amma ye ipua nga kateac kukundzau nekefec.<sup>a</sup>

<sup>5</sup>Anu Yerusareng ngicngac nga Yudaia prowinsiunac amma Yodang doku wegenacfu bangec tackenec, imohacnac yeni amanene yearu kenggec. <sup>6</sup>Kemma kopocsingina deficgemagec Yodannu doku nadzicyemmeec. <sup>7</sup>Farisaio nga sadukaio homacngo doku nadzicgecdeac hagec Yohanengo yenemma yofi edeyunuec, “Boidzocac gboricfora, ngeni Anutuarunac turunga haudeac ande, imohacnac woragecdeac merang goroyoac edengunuec? <sup>8</sup>Imocac ngeni doku nadzicma ubamerenggac siricfu fora meficgebisia. <sup>9</sup>Nga ge geanggaac yofi mi negengemebesena, ‘Abrahang ye bangecna.’<sup>b</sup> Anutungo hoc yomoc naric deu Abrahanggac bangecfora fingecgecdenoc, imoc edengunuduae.

<sup>10</sup>Naka ic haniau bic faigec fede. Nga ic goa fora gombunga mi angandae, imoc sasawa heiu kpeu gerecfu ukugecde. <sup>11</sup>Ni uba dzigec dzigeneac doku nadzicngemebade. Nga ngic ngadenau hama kecde, yeng ine Tiri Asu nga gerec nadzicngemmeude. Nga yeac kucngo neac kuc ferahade. Ni ifiango yeac hanitabe hesimiba naric mi ngereeude. <sup>12</sup>Ye meic meicke saraha mariaui mehama wit seuhagoc meic meicke sobennu feu imoc fima seuha meickeude. Meickema fora mekpedzuc amma ameau faima seuha wanggema gerec pisic pisickea kpac, imohai ukuu dzeude.”

<sup>13</sup>Naso imohai Yesungo Gariraia bangecfunac Yodang dokuu kemma Yohanengo mitidoku nadzicmiudeac edeec. <sup>14</sup>Edeu Yohanengo imoc negenu naric mi anu deec, “Geng ni naric nadzicnennade, imoc ngereede, ammanu geng nearu hama nadzicgembadeac denec.” <sup>15</sup>Ifi deu Yesungo yofi deec, “Ge yoac imoc wana, faka dindingac sasawa fora fingerudeac yaguc edeguduae, ifi anna ngereeude.” Ifi deu naric dema yoara tofohoec. <sup>16</sup>Nga Yesungo doku nadzicma dokuunac eremanu kurumeng angeec. Anggeu Anutuac Asungo kebesacac siric amma hau hemmanu yearu maec. <sup>17</sup>Mamanu kurumennunac ubaudumeng mongngo yofi deec, “Yomoc songomedacna, ye hensongo ammiduae.”

**4** <sup>1</sup>Naso imohai Asungo Yesu wangecma mangana minginango ye tobanggeudeac bangec kisiu hesicke kenec. <sup>2</sup>Kenu Yesungo imohai hadzingtoforec 40 yakasege kecma hereaac homeec. <sup>3</sup>Ifi anu faitobang ngicngo yearu hama deec, “Ge Anutuac Medac fora kecnecfu hoc yomoc dena meremma ic sogong anu.” <sup>4</sup>Ifi deu Yesungo yoac yofi meremmiec, “Yoac yofi oho ohoya fede, ‘Ngicngo ic sogonggacsac mi kefude, kpac. Ye Anutuac enacfunac yoac ereandesoc, imoc sasawa mema kecbeso.’” (Dedeseri 8:3)

<sup>a</sup> 3:4 Ngakpia nga fadenga imoc Eriaac ngakpi nga fadeng isoc. 2 Ngictau 1:8

<sup>b</sup> 3:9 Abrahanggac bangecfora sasawango kekecseri megecde ifi negensinggeec.

<sup>5</sup>Ifi deu mangana minginango Yesu hesickema taong kpetiacfu kemma Anutuac womong witiau wi yombong, ihai faiu nanu edeec, <sup>6</sup>“Ge Anutuac Medac fora kecnefcu geanggaoc yomohacnac yuma kemena. Yoac yofi oho ohoya fede,

‘Ye geac amma angerofora uayoac yemmeu yeneng maringina witiau tofohogugec hoc mongngo haniga mi herecgeude.’ ”

*(Mitiyegec 91:11-12)*

<sup>7</sup>Ifi deu Yesungo yofi edeec, “Nga monggoc yoac yofi oho ohoya fede,

‘Ge KEBU Anutuga faitobannu mi faibesena.’ ” *(Dedeseri 6:16)*

<sup>8</sup>Ifi deu mangana minginango Yesu monggoc hesickema tiki buma kuneng monnu emma bangectoa bangec gawamangnginagoc nga kuc kibikperagingina hania hania, imoc edzahema <sup>9</sup>edeec, “Negenna, ge fafoc heima ngonducnema eweheinennadeu yomoc sasawa gembade.”

<sup>10</sup>ifi deu Yesungo yofi edeec, “Satang ge meickena. Yoac yofi oho ohoya fede,

‘Ge KEBU Anutuga, ye mocgu eweheimima kingang kpemibesena.’ ”

*(Dedeseri 6:13)*

<sup>11</sup>Ifi deu mangana minginango wama kenu angero yeneng hama Yesu henggareng ammigec.

<sup>12</sup>Ngic yeni yoac yomoc degec, “Yeni Yohane witicamau faigec tacde.” Yesungo imoc negemma Gariraia bangecfu Nadzarete taonnu dzigenec.

<sup>13</sup>Dzigenema Nadzarete wama Seburong nga Naftari yereac bangec Gariraia dzohong tegiau, Kafanaung taonnu tacyac anec. <sup>14</sup>Profete Yesaiango imocac kpefinnu yofi deec,

<sup>15</sup>“Yodang noboc sing doku dzohonnu kende, Seburong nga Naftariae bangec ihai bangec monnunac ngicngac Anutu mi negemmidae, yeneng Gariraia bangecfu kecdae. <sup>16</sup>Ngicngac kundunnu kecgec, yeni kperagi kuneng henggec nga ngicngac homecac bageu bangecfu kecgec, yeneac botucfu kperagia fingerec.” *(Yesaia 9:1-2)*

Yoac imoc fora anudeac ye Kafanaung taonnu tacyac anec. <sup>17</sup>Naso imohai Yesungo ngicngac yoac yofi edekpou ayemmeec, “Kurumenggac eucererengngo bic mewegenengudeac ngeni ubangina merenggec.”

<sup>18</sup>Yesungo ifi kpouyemmema kemma Gariraia dzohong tegiau kensikema dacmunac yohockang ufcngira dzohonnu ukuma nanec yerene. Imoc Simong, kpara mong Petoro degec nga munea Anderea. Yeri kondungyang meme ngic kefoc. <sup>19</sup>Yeri yeremma yofi edeyuruec, “Ngeri hama modacnuec. Ngeri kondungyang meandape, ifi isocngoc ngic meyunuecdeac kpoungemecbade.” <sup>20</sup>Ifi deu yeri imohaingoc ufcngira wama ye modaroc.

<sup>21</sup>Anu imohacnac kemma monggoc dacmunac yohockang, Dzebedaioc medahora, Yohane nga munea Yakobo yerene. Yerenu yeri mangngira Dzebedaiogoc gombau ufcngina memengere amma kecmagec

kpacyuruec. <sup>22</sup>Kpacyuruu yeri naso imohaingoc mangngira nga gomba wama ye modaroc.

<sup>23</sup>Yesungo Gariraia ihai bangecsoc yerecgema kpekpeturang amanginau kpoukpou ua mema eucererenggac siduc gombung dekperagiyemmekefec. Amma ye ngicngac hafei nga kucmamangina hania hania sasawa mengereyunudarec. <sup>24</sup>Ifi anu yeac siducngo kemma Siria prowins sasawa sokodarec. Sokodaru ngicngac yeneng ngicngac hafei hania haniango memanganeyunuec nga kpendzengtoa kpegec amma hadehade nga yafingoc amma goa afonasingina hau ubasufu angandae nga ngicngac hanimaringina homemea, yeni Yesuaru meyunu kendacgec yeng mengereyunuec. <sup>25</sup>Nga Gariraia bangecfunac nga Dekaporisi, imohacnac amma Yerusareng taonnunac nga Yudaia prowins amma Yodang nobocgennac ngicngac habutoango yombong ye modackecgec.

**5** <sup>1-2</sup>Yesungo habutoa yenemma tikiu emma tarec. Tacmanu medacfora yeneng yearu kenggec yeng yoac yofi dema kpouyemmeec. <sup>3</sup>“Ngicngac Asuac songou home homegoc kecandae, yeni kenecnginagoc, nocac kurumenggac eucerereng imoc yeneacnoc. <sup>4</sup>Ngicngac ubahodunggoc kecandae, yeni kenecnginagoc, Anutungo yeninoc meefaiyunuude. <sup>5</sup>Nga ngicngac memaemema kecandae, yeni kenecnginagoc, nocac bangec yomocngo yeneac maridzoming anude. <sup>6</sup>Ngicngac yaka nga dokuac homeandae, ifi isoc dindingac kekecac homeandae, yeni kenecnginagoc, Anutungo yeni imoc gumecyunuu gebecyunuude. <sup>7</sup>Ngicngac ogofocngina yeneac ubamangang negengandae, yeni kenecnginagoc, nocac Anutungo ifingoc yeneac ubamangang negenude. <sup>8</sup>Ngicngac ubangina kongaha kecandae, yeni kenecnginagoc, yeni Anutu henggecde. <sup>9</sup>Ngicngac yare menomaneandae, yeni kenecnginagoc, nocac yeni Anutuac nambaracfora deyemmebesonga. <sup>10</sup>Ngicngac faka dindingac angkecdaeac yunumeme ayemmeandae, yeni kenecnginagoc, kurumenggac eucerereng imoc yeneac.

<sup>11</sup>Nga ngeni neac arennu kecdaeac amma ngic yeneng desofoc nga ngunukporac angemmema ikoc amma ngeneac negemma yoac mangana hania hania angemmegecde. Yeni ifi angemmegecde, ngeni kenecnginagoc. <sup>12</sup>Bungngina kunengngo kurumennu tomaingina fede. Ngeni imocac ubangerec negemma sogaibisia. Ngicngac yeneng warac profete yunukporac ayemmegec, yeni ifi isoc angemmegecdenoc.

<sup>13</sup>Ngeni bangecngicngac yeneac kondung. Kondungngo kiacma songea kpac anudeu songea monggoc naric mi meficgeude. Kondung ifia, imoc uaya kpac. Imoc eng bangecfu ukuni ngic yeneng haningo tigece. <sup>14</sup>Anu ngeni bangectoa bangec yomocac kperagi. Taong mong tikiu nande, imoc naric mi sufuude. <sup>15</sup>Nga ngic mongngo kifa kpedzereckema pake bageau naric mi faiu tarude. Imoc ine kifa tatahau faiu tacma ngicngac ama

manau tacdae, yeni mekperagiyunudarude. <sup>16</sup>Nga ngeneac kperagingo siriha imocngoc amma ngicngac mekperagiyunubeso. Mekperagiyunuu yeni angammengina gombunga hemma Mangngina kurumennu kecde, ye dengeregecde.

<sup>17</sup>Ngeni yofi mi negembisia, ye dedeseriyoac nga profete yeneac kpoukpouyoac kpeudeac maec. Negenggec, ni yoac kpebadeac mi mayai, kpac. Enacdedea imocngo fora fingerudeac mayai. <sup>18</sup>Foracngoc, bangec nga kurumeng yeri kpac anecde. Nga dedeseriyoacac dzikangabisc mongngo naric mi kpac anude. Dedeseri kibiyoac oho ohoya fede, imoc sasawango foragoc ammanu bangec nga kurumeng wisickeude. <sup>19</sup>Imocac amma yofi ande, mong ye dedeseriyoac yomohacnac wiac kapiabisc mong meickeude amma ogofora ifingoc anggecdeac kpouyemmeude, yennoc kurumenggac areng yeneacunac ngic mamea yombong demigece. Nga ngic mong ye dedeseriyoac tofohoma ogofora modacgecdeac kpouyemmeude, ye kurumennu ngicngac yeneac engena demigece. <sup>20</sup>Ni edengunuba negenggec, ngeni fakangina dindingacngo mitiac negen negengngic nga farisaio yeneac angammeme mi feraheyombonggeudeu ngeni kurumenggac eucererennu naric mi enggece.

<sup>21</sup>Bangefocnina nga esangabofocnina yeni yofinoc ede edeyunuya, 'Ge ngicngac mi yunuhomesena. (*Makekeng 20:13*) Nga mong ye ngic kpehomeude, ye yoacac areng anude.' <sup>22</sup>Neng ine yofi edengunuba, ngic mong ye ogeaac herebu angande, ye yoacfu nambeso. Nga mong ye ogeaac yofi deude, 'Ge ngic irec ireckeac kpac.' Ye yudangic yeneac tutumangtoanginau faibesonga. Nga mong ye ogeaac yofi deude, 'Ge negen negengga kpac.' ye hofeac gerecfu ukugec kemeude. <sup>23-24</sup>Ge imocac amma ubangerecgaac wiac Anutuaru faibeso dema yofi ambesena. Aratau kemma ogoga geac ngaba mekecde, imoc negensinadeu ge sesega arata kiwau wana taru kemma ogogagoc yoac mengerena. Mengerena ruac fingeruguc hama ubangerecgaac wiac faibesena. <sup>25</sup>Nga ngabagango yoacfu faigubacac ngerahafoc sinnu kemma yegoc dedefic anemema ngaba wabesera. Ge ifi mi annadeu ngabagango desi desingic yearu faiguu yeng keracnatang yeneac mariu faiguu witicamau faigugecde. <sup>26</sup>Ni fora yombong edeguduae, ge witicamau takecma ogogaac turung sasawa hafoangoc kpoumaguc manade.

<sup>27</sup>Anu yoac yofi bic edengunugec fede, 'Ge kaisero mi ambesena.' (*Makekeng 20:14*) <sup>28</sup>Neng ine yofi edengunuba, ngic mongngo ngac mong hemma hensongo ammiude, ye hereango serofaka bic andac. <sup>29</sup>Nga kicga foingo anggenu kopocsic meficgenadeu ge imoc tatahaunac meickema ukuna kembeso. Sebiga tosea kpac anu sebiga hafoangoc hofeu mi ukugecde, imocngo ngereeude. <sup>30</sup>Nga marifoigango anggenu kopocsic meficgenadeu ge imoc herecgema ukuna kembeso. Sebiga tosea kpac anu sebiga hafoangoc hofeu mi ukugec kemeude, imocngo ngereeude.



<sup>31</sup> Warac yofi dekecgec, 'Ngic mongngo enema wade, ye wawakibi ohoma mibeso.' (*Dedeseri 24:1-4*) <sup>32</sup> Neng ine yofi edengunuduae, enemango serofaka mi ammanu ngic mongngo ye waude, ye serongac anudeac ammiude. Nga ngicngo ifi anu enemango eweenenggac sing ferahema kefude. Amma ngic ye ngac wawaya meude, ye eweenenggac sing ferahema serofaka anude.

<sup>33</sup> Anu bangecfofnina nga esangabofocnina yeni ifingoc yofi bic edeyunuyunuya, 'Ge dedzegegaac dzadzahac mi meickebesena. Nga yoacga Anutuac kicfu seria deserinec, imoc modacbesena.' <sup>34</sup> Neng ine yofi edengunuduae, ngeni yoacngina seriudeac wiac mong kpacma mi describisia. Kurumeng imoc Anutuac amatatac, imocac ngeni kurumeng kpacma yoacngina mi describisia. <sup>35</sup> Nga bangec, imoc Anutuac fetec, imocac ngeni yoacngina deserigecdeac bangec mi kpacbisia. Nga ngeni Yerusareng imoc ifingoc deserima mi kpacbisia nocac imoc Ngictautoa, yeac taong. <sup>36</sup> Nga ge oruczoga mocgubisic kongac kongac me dzadzu dzadzu menadeacsoc mi annecac orucga kpacma dedeseri dede, imoc ifingoc wabesena. <sup>37</sup> Ngeni yoacngina sasawa yofisac debisia, 'Fora imoc fora nga kpac imoc kpac. Yoacngina yomoc ferahema torokpema degecde, imoc mangana mingina yearunac hade.'

<sup>38</sup> Ngeni yoac mong yofi bic negenggec, 'Ngic mongngo ogeaac kic memanganeudeu yeac kic ifingoc memanganebesonga. Nga mongngo ogeaac enac hetackeudeu yeac enac ifingoc hetackebesonga. Kiac turunga imoc kicngo kpoumibesonga nga enacac turunga imoc enacngo kpoumibesonga.' (*Makekeng 21:24; Sesememe 24:20; Dedeseri 19:21*) <sup>39</sup> Neng ine yofi edengunuduae, ngicngac mangana angemmegec ngeni turunga mong mi merengyemmebisia. Mongngo munggungga foiu kpeudeu geng munggungga kanau ifingoc sinemibesena. <sup>40</sup> Nga mongngo yoacfu faigubesonga ngakpiga mana meudeu ge ngakpiga witiau ifingoc wamibesena. <sup>41</sup> Nga mongngo igocguma sing kiromita mocgu yegoc kennadeac edeguudeu geng kiromita yohockang yegoc kembesena.<sup>c</sup> <sup>42</sup> Nga ngic mongngo wiac mong minadeac kpesigenu ge imoc mibesena. Nga mongngo gearunac wiac monggac turung ambesonga dema kpesigenu wiacga mi segerebesena.

<sup>43</sup> Yoac mong yofi fede, ngeni imoc warac bic negenggec, 'Ngicngac gegoc wegena kecdae, yeni heresongogoc hoangyunubesena (*Sesememe 19:18*) amma ge ngabafocga ngadeyunubesena.' <sup>44</sup> Neng ine yofi edengunuduae, ngeni ngabafocngina heresongogoc hoangyunubisia amma ngicngac ngunukporac angemmeandae, yeneac numubisia. <sup>45</sup> Ngeni ifi amma Mangngina kurumennu kecde, yeac nambaracfora kecgecde. Ye wenaha uayoac miu imocngo ngic gombunga mangana

---

<sup>c</sup> 5:41 Yesungo mail deec. Roma yeneac mail imoc kiromita mocgu nga noboha isoc.



yeneac amma ereude. Nga ye ngic dindingac nga ngic faka dindingac mi angandae, yeni momocngoc kia yemmeude. <sup>46</sup>Nga ngicngac yeneng ngeni heresongogoc hoangngunugec ngeneng yeni heresongogoc hoangyunugecdeu faka imocac buma mong mi fingerude, kpac. Takesimeme ngic yeneng imoc ifingoc angandae. <sup>47</sup>Ngeni dacmunafocngina yeneac edoc bedoc ayemmegecdeu imoc faka engena kpac. Bangec monnunac ngicngac Anutu mi negemmidae, yeni ifingoc imoc angandae. <sup>48</sup>Imocac amma ngeni yofi ambisia, kurumeng Mangngina ye dindingac kecde nga ngeni ifingoc ye isoc dindingac kecbisia.”

**6** <sup>1</sup>“Ngeni ngicngac yeneng ngenemma dengerengunugecdeac yeneac kicfu faka gombunga mi angkecbisia, kpac. Ngeni ifi anggecdeu kurumeng Mangngina yearunac faka gombunggaac buma mong mi megecde. Ifi fingebacac henghomema kecbisia. <sup>2</sup>Imocac ngicngac makpekpea ubangerecac wiac yemmenec, imohai ngicngac yeneng trampet udumengtoayagoc geac amma fifigecdeac mi edeyunubesena. Ngic ikoha goa yeni kpekpeturang amau me singtoau ngicngac yeneng dengereyunugecdeac ifi angandae. Ni fora edengunuduae, ngic ifia yeni bungngina hafoangoc bic megec. <sup>3</sup>Ge ngicngac makpekpea ubangerecac wiac mong yemmenade, imohai ine marifoigango wiac anu kanagango imoc mi negembeso. <sup>4</sup>Ge ifi amma ubangerecac wiac mong yemmenade, imocngo sufuu sufuu femanu Manggac wiac sufuu sufuu hengande, yennoc buma genude.

<sup>5</sup>Anu ngeni numubesonga dema ngic ikoha yeneng angandae, ngeni ifi isoc mi ambisia. Yeni kpekpeturang amau nga singtuturunnu numuma nanggec ngic yeneng yenemma dengereyunugecdeac songo negengandae. Foracngoc, yeni bungngina hafoangoc bic megec, imoc edengunuduae. <sup>6</sup>Ge numubesonga dema, imohai ine amaga mana kapiau emma naguga heima Manggac sufuu sufuu kecde, ye numumibesena. Ifi anna Manggac faka sufuu sufuu hennegeng angande, yeng buma genude. <sup>7</sup>Nga ngeneng numubeso dema, bangec monnunac ngicngac Anutu mi negemmidae, yeneng numuandae, ngeneng ifi isoc mi numubisia, kpac. Yeni nunumu herea negengisinga kpac eng numuandae. Amma yocngina homac osokecdaeac amma negenggec nunumunginango foragoc anude. <sup>8</sup>Imocac ngeni yeni isoc mi ambisia. Ngeni mi numumimagec Mangngina yeng ngeni noc wiacac kpedadangeandae, imoc bic negenude.

<sup>9</sup>Ifi anu ngeni yofi numubisia, ‘Kurumeng Mannina, geac kpac kpetiac febeso. <sup>10</sup>Nga eucererengga hanemmebeso. Kurumennu geac songo nga negen negeng modacgec fede, siriha imocngoc bangecfu nenearu fingecheso. <sup>11</sup>Ge yaguc yaka socnina nemmena. <sup>12</sup>Nga neni ngic yeneac kopocsic waandimbe, siriha ifingoc kopocsicninaac turunga wanemmena. <sup>13</sup>Ge faitobannu mi fainununa nga manganaunac mesinunubesena.’

<sup>14</sup>Ngeni ngicngac mangana angemmegec ngeni yeneac kopocsic wagecdeu kurumeng Mangnginango ngeneac kopocsic ifingoc waude.

<sup>15</sup>Amma ngeni ngic yeneac kopocsic mi wagecdeu ine Kurumeng Mangnginango ngeneac kopocsic ifingoc mi waude.

<sup>16</sup>Anu ngeni yaka segekecma ikocngic yeneng angandae, ifi isoc mi ambisia. Yeni yakasege kecdae, naso imohai ngicngo yenenggecdeac kicnangengngina huringaiande. Foracngoc, ngic ifia yeni bungngina hafoangoc bic megec, imoc edengunuduae. <sup>17</sup>Ge yakasege kecma orucga kerec nadzicmima kicmesuga dzuacbesena. <sup>18</sup>Ifi anna ngic yeneng ge yakasege kecneac, imoc mi negentegecmagec Manggac mi hengena kecde, yengsac negenude. Amma Manggac angammemega sufuu sufuu hengkecde, yengsac buma genude.

<sup>19</sup>Bangecfu dzaukpadzadzangno dzofinacngina kirecgeande nga hufengngo wiacngina meande amma hamangecngic yeneng ama hetackema wiacngina meandae. Imocac ngeni bangecfu dzofinacngina mekpedzuc mi ambisia. <sup>20</sup>Ngeni dzofinacngina kurumennu mekpedzuc ambisia. Imohai dzaukpadzadzangno wiacngina mi kirecgeude nga wiacngina hufengngo mi meude amma hamangecngic yeneng imohai naric mi hetackema wiac megecde. <sup>21</sup>Ge dzofinacga fede, imohai songoga ifingoc feude.

<sup>22</sup>Kicga imoc sebigaac kifa nga kicgango gombunga feudeu sebiga sasawa mekperagidarude. <sup>23</sup>Nga ge kickerec me kicmangang me kicgango manganeudeu ine sebiga sasawa kundung kpeude. Nga kperagi gearu fede, imocngo kundung kpeudeu kundungtoa yombong fingenude.

<sup>24</sup>Ngic mongngo ngic kuneng yohockang yereac kingang naric mi kpekefude, kpac. Ye monggac songo negemma mong ngadeheude me monggaru kpeketaheuma mong waude. Ngeni naso socfungoc Anutu nga dzofinac yereac kingang naric mi kpegecde.

<sup>25</sup>Imocac amma yofi edengunuduae, ngeni nenedokuac dema kekecnginaac defagung amma yofi mi debisia, 'Neni noc yaka nema kecnide?' me sebinginaac negemma, 'Noc wamba heima kecnide?' Negenggec, kekecngo yaka feraheude nga sebingo ine ngakpikporuc feraheude. <sup>26</sup>Ngeni sawau neng yenenggec. Yeni heikpenec me netohong mong mi angkecgec Mangngina kurumennu kecde, yeng yaka eng yemmeude. Nga ngeni isinggema negembisia, ngeneng Anutuac kicfu neng yeneac engena andae. <sup>27</sup>Nga ngeneanunac mongngo dewaidzoc amma kefu imocngo kekecnasoya kapianec monggoc naric mi mehereeude, kpac. <sup>28</sup>Anu ngeni nocac negengyohoc amma yofi deandae, 'Neni noc wamba mema mekecni?' Ngeni dzaring amasobennu eng tohoandae yenembisia. Yeni witic mi yumuma uatoa mi mema sifu yadiandae. <sup>29</sup>Nga ngictau Saromo ye warac wamba kibia gombunga

gombunga heikefec, yeac kibikperagitoayango ine dzaring yeneac kibi kereng kereng mi feraheec, imoc edengunuduae. <sup>30</sup>Nga dzaring amasobennu eng tohoande, imoc yagucacsac fingeru wereckengau herecgema gerecfu ukugecde. Nga Anutungo dzaringtehec ifia wamba heiyemmeudeu ye ifingoc ngicngac ngeni negen negensingngina kapia fede, ngeni ngakpi kporucngina torokpeu torokpeu ngemmeude.

<sup>31</sup>Imocac amma ngeni dewaidzoc amma yofi mi debisia, ‘Neni noc nenedoku nenide me noc wamba heinide?’ <sup>32</sup>Bangec monnunac ngicngac Anutu mi negemmidae, yeneng imoc sasawa megecdeac negen negengngina imohai faigec fekecde. Nga Kurumeng Mangnginango ngeni wiac sasawa kpedadanggeandae, imoc bic negenude. <sup>33</sup>Imocac ngeni warac warac yombong Anutuac eucerereng nga yeac faka dindingac meficgegecdeac uatoa mebisia. Ngeni ifi anggec yeng wiac sasawa imocnoc ifingoc torokpeu torokpeu ngemmeude. <sup>34</sup>Ifi anu ngeni wereckenuac dema negengyohoc mong mi ambisia. Wereckenu ye yengenaoc negengyohoc angemeude. Uameme tembus tembus ye yengenaoc ebihaac siriha ebiha mebeso, imoc soha ande.”

**7** <sup>1</sup>“Ngic yeneng ngeneac faka isinggema desingunubauac ngeni ngic yeneac faka isinggema mi desiyunubisia. <sup>2</sup>Imoc yofiac, ngeni ngic isingyunuma yoacngina desiandae, siriha ifiangoc yeneng isingngunuma ngeneac yoacngina desigecde. Nga ngeni wiac kpetea isinggema imocacsoc ngicngac wiac yemmeandae, yeni siriha ifiangoc kpetea isinggema turung kpoungemmegecde. <sup>3</sup>Ge ogogaac kicfu gocbisc tacde, imoc henganec amma geangga kicfu ine ic kebanga fede, imoc mi hentegecnec, faka ifia imocngo mi ngereede. <sup>4</sup>Geangga kicfu ic kebanga femanu ogogaac deannec, ‘Naric negemmana kicgau goc tacde, imoc meickeba.’ <sup>5</sup>Ikocngic, ge geangga kicfu ic kebanga fede, imoc meickemaguc ogogaac kicfu gocbisc tacde, imoc naric hentegecma meickenade.

<sup>6</sup>Ngeni wiac mong kpetiac dedea, imoc kasi mi yemmebisia nga kubungina imoc berec yenearu mi ukubisia. Kasi yeneng dzigenema nginibauac nga berec yeni imoc haninginango tidzamebauac.

<sup>7</sup>Ngeni turunga fingecongmeudeac numuma kecbisia nga wiac meficgegecdeac hofocma kecbisia. Amma nagu witingemmeudeac nagu heima kecbisia. <sup>8</sup>Ngic mong ye numukecde, yeng wiac meude nga hofockecdengo wiac meficgeude amma nagu heikecde, yeac nagu witimigecde. <sup>9</sup>Ngeneanunac ngic mong medahango yakaac kpesimiu yeng hoc naric mi miude. <sup>10</sup>Me kondungyanggac kpesimiu boidzoc mangana naric mi miude. <sup>11</sup>Ngeni ngic fakangina manganagocngo sifu nambaracfcngina ubangerecac wiac gombunga yemmegecdeac negentegecdae. Imocac ngeni yofi negembisia, Kurumeng Mangnginango ngeneac faka gombunga imoc homac ferahaude. Ngeni yearu wiac monggac kpesigec yeng wiac gombunga torokpeu torokpeu ngemmeude.

<sup>12</sup>Nga ngic yeneng noc faka angemmegecdeac negensiandae, ngeni faka siriha imocngoc ayemmebisia. Imocnoc dedeseriyoac nga profeteyoacac hania.

<sup>13</sup>Ngeni nagu kapiau emma kengkecbisia. Imoc yofiac, manganaac sing imocac naguya kuneng nga sing imoc singtoa amma ngicngac homacngo sing imoc modacma kengkecgec kecma kpetotieyunugecde. <sup>14</sup>Nga kekecac sing imocac naguya kapia nga sing imoc fofonga anu ngicngac efeanecngosac imohai kengkecma kekec fora meficgegecde.

<sup>15</sup>Profete ikoha yeneng memanganengunubauac ngeni yeneac henghomema kecbisia. Yeni sebinginango rama sebi nga ubanginango ine katekasi anu yeni godzuac arennu iwaingina wangecngunugecdeac ngenearu hagecde. <sup>16</sup>Nga forangina fingectegeru, ngeni imoc hemma negengyemmegecde. Ngic yeni kemma witic waeyagoc, imohacnac waing fora naric mi mesigece. Amma fareng nga gberafecfunac fig fora naric mi megecde, imoc negendae. <sup>17</sup>Nga ic gombunga sasawa, yenearunac fora gombunga fingerude nga ic manganaunac ine fora mangana fingerude. <sup>18</sup>Nga ic gombunga imohacnac fora mangana fingec fingec mi fede. Nga ic manganaunac fora gombunga naric mi fingerude. <sup>19</sup>Ic mong foraya gombunga mi fingerudeu imoc kperecgema gerecfu ukugecde. <sup>20</sup>Ifi anu ngeni profete ikoha yeneac forangina hemma naric negentegecyunugecde.

<sup>21</sup>‘Ngicngac Kebuna, Kebuna.’ ifi denengandae, yenearunac sasawango kurumenggac eucererennu naric mi enggecde. Manna kurumennu kecde nga ngicngac yeac songo nga negen negeng modacma kecdae, yeneng ihai enggecde. <sup>22</sup>Nga naso imohai ngicngac homacngo edenugecde, ‘Kebu, Kebu, neni geac kpacfu profeteyoac deing amma hadehade nga yafing kporacyunuing amma faka kuhagoc homac meing, ge imoc sifu negennec.’ <sup>23</sup>Ifi degec yofi yombong edeyunubade, ‘Ni ngeni mi negengngunuduae. Dedeseriyoac kpekpengic, ngeni neac kicfunac meickegec.’

<sup>24</sup>Ngic mong ye yoacna yomoc negemma tofohoande, yeng ngic irec ireckea nga ngic amea peperandzi witiau meec, ye isoc. <sup>25</sup>Ye ameaac hania peperandzi witiau nanecac serima taru kiafirangtoa kpeu tungbaungngo hama ama imoc naric mi kpembarackeude. <sup>26</sup>Nga mong ye yoacna yomoc negemma mi tofohoude, yeng ine ngic negen negenga kpac nga ngic amea sangiu meec, ye isoc. <sup>27</sup>Kia kpeu tungbaung nga firangtoa kpema ama imoc kpembarackema medidinggeu makpeude.”

<sup>28</sup>Yesungo yoac yomoc deu wisickeu ngicngac habutoa yeneng kpoukpouyaac amma kerecgec anggec. <sup>29</sup>Nocac yeng mitiac negen negengngic yeneac dede isoc mi deec, kpac. Ye ngic uakibi mekecde, yeac siricfu kpoukpou ua kuhagoc meec.

**8** <sup>1</sup>Yesungo tikiunac mamanu habutoa kuneng yombongngo ye modacgec. <sup>2</sup>Modacmagec ngic mong kukuseriagocngo hama fafoc heimima deec, “Kebu, ge negenna naric anu medzuacnubang.”<sup>d</sup>

<sup>3</sup>Ifi deu Yesungo maria sinema ngic kpeserema yofi edeec, “Ge ngereenadeac songona fede.” Deu imohaingoc sebia ngereeu hafeia kpac anec. <sup>4</sup>Nga Yesungo yofi edema deraheec, “Ge sebigau faka fingeccad, imocac ngic mong mi edebesena. Ge womong gareng yearu kemma sebiga edzahena. Edzahema Mosengo seseac deec, imoc modacma imocac sirihau faina yeneng sesega imoc hemma negentegecgecde.”

<sup>5</sup>Anu Yesungo Kafanaung taonnu emmanu wasaigareng mongngo hama meficgeudeac desambic amma deec,<sup>e</sup> <sup>6</sup>“Kunenna, enac tofoc tofoho medacna ye hanimaria homemea amma ye amau kpendzengtoa kpema fema kecde.” <sup>7</sup>Ifi deu Yesungo yofi edeec, “Ni naric hama mengerebade.”

<sup>8</sup>Ifi deu wasai garengngo yoac yofi meremmiec, “Kunenna, ni noc gombunnaac amawarocnau erenade. Ge yoacgangosac dena enac tofoc tofoho medacna ngereeu. <sup>9</sup>Imoc yofi, ni ngic kucnginagoc yeneac bageu kecduae. Nga neac bageu wasaifocna kecdae. Yenearunac monggac kenna deba ye kenude. Ni yenearunac monggac hana deba haude. Nga wanacngicnaac ua yomoc mena deba ye imoc meude.”

<sup>10</sup>Ifi deu Yesungo imoc negemma kerectegec amma ngicngac modacgec, yeni yofi edeyunuec, “Foracngoc, Israe bangecfu ngicngac negen negensingngina seria yofia mong mi henai, imoc yeac henduae. <sup>11</sup>Imocac yofi edengunuduae, ngic homacngo wenac ere ereaunac nga wenac keme kemeaunac hama Abrahang nga Isaka amma Yakobo yenigoc kurumenggac eucererennu yenhafoc tacma neneyaka negecde. <sup>12</sup>Nga Anutungo warac warac yengena eucererenggac areng deec, yeni ine ngadeau kundunnu ukuyunugec kemegecde. Kemema ihai kiacma enacngina kisaranggema kecgecde.”

<sup>13</sup>Ifi dema wasaigareng yofi edeec, “Ge kenna, negensinggenecmoc, imoc fora fingeccenude.” Anu wenac naso imohaingoc enac tofoc tofoho medaha ngereec.

<sup>14</sup>Anu Yesungo Petoroac amau emma Petoro sefenango sebigerec ammiu feu henec. <sup>15</sup>Hemma mariaua mema kpesereu sefena hafeia kpac anu yacma yenenggareng ayemmec.

<sup>16</sup>Marai anu imohaingoc ngicngac yeneng ngicngac hadehade nga yafingoc homac Yesuaru meyunu hagec. Hagec, yeng yoac dema asu mangana kporacyunuma hafeinginagoc sasawa mengereyunuec. <sup>17</sup>Profete

---

<sup>d</sup> 8:2 Mongngo kukuserigoc sebia wonongagoc dekecgec. Ngic homacngo hafei ifia mi megecdeac kukuseriagoc yeni ama ngadeau kecbisia. Imoc Moseac dedeseriyoacfu oho ohoya fec. <sup>e</sup> 8:5 Wasaigareng yomoc yeac bageau wasaingic 100 isoc kecgec. Wasaingic garengnginagoc yeni bangec monnunac.

Yesaiango warac yofi deec, “Yeng nenang kucmamanina meickema hafeinina atickeec.” (*Yesaia 53:4*) imoc imohai fora fingerec.

<sup>18</sup>Ngicngac habutoango Yesu oronggegec ye ifi yenemma medacfora edeyunuec, “Nenang dzohong noboc kenni.” <sup>19</sup>Ifi demanu mitiac negen negengngic mongngo hama edeec, “Kpoukpou, ge ihai me ihai kennadesoc ni modacguma gegoc kembadeac negenduae.” <sup>20</sup>Ifi deu Yesungo yofi deec, “Katekasi yeni bangec manau fefenginagoc nga sawau neng yeni faecnginagoc nga ngicac Medacngo ine kparicganga kpac, ifi kecde.” <sup>21</sup>Deu medacfora yenearunac mongngo deec, “Kebu, negennemmana kemma manna tonggomaguc modacgubade.” <sup>22</sup>Ifi deu Yesungo ine yofi edeec, “Ge homemea wayununa yeni yenaocngoc tonggoemegec. Nga geng ine ni modacnuna.”

<sup>23</sup>Yesungo gombau enu medacfora yenahafoc gombau emma kenggec. <sup>24</sup>Kemmagec firang kucgoc kpeu siritembongngo gomba feraheu kemebesonga anec nga Yesungo ine gau feec. <sup>25</sup>Feu medac yeneng Yesuaru kemma midima degec, “Kebu ge onggonnununa, neni kemebeso andimbe.” <sup>26</sup>Ifi degec yeng yofi edeyunuec, “Ngeni negen negensingngina kapianeacsac fede, ngeni kengec mi ambisia.” Ifi dema firang nga dzohong kpetariyemeru firang kpac anu dzohong ye ning kpema eng feec. <sup>27</sup>Feu ngic yeni kerecgec amma kpesiemegec, “Ye noc ngic? Firang nga dzohongtoa yereng yeac enara tofohodape.”

<sup>28</sup>Anu yeni dzohong noboc gadarangic, yeneac bangecfu kensikemagec ngic yohockang hadehadengiragocngo kicsereunac haoc. Yeri wasai yombong, imocac ngicngac yeni imohacsing susuferecge mi angkecgec. <sup>29</sup>Nga yeri ihai namma kpacma deoc, “Anutuac Medac, neneac wiac imoc geac mi ande. Nasonina mi hamanu ge kpendzeng monnu mi fainunubesena.”

<sup>30</sup>Anu edibigeng berechabu mong kuneng yeni surukpema kecmagec <sup>31</sup>hadehade yeneng yofi dema Yesu desambic ammigeac, “Ge kporacnununade isoc, berechabu yenearu suenununa kemebisina.” <sup>32</sup>Ifi degec yeng yofi edeyunuec, “Ngeni meickegec.” Deu yeni meickema erema berechabu yenearu kemegec berec yeni hafoangoc fagannunac nedzima dzohonnu kemema doku nema homedacgec. <sup>33</sup>Homegec berecgareng yeneng kengec worama taonnu kemma faka imocac siduc sasawa ayemmegec. Ayemmedacma ngic hadehadengiragoc yerearu faka fingerec, imocac ifingoc edeyunugec. <sup>34</sup>Edeyunugec taong imocac ngicngac sasawango Yesu meficgegecdeac kemma hemma amabangecngina waudeac edegec.

**9** <sup>1</sup>Yesungo gombau emma dzohong ferecgema yengena taonnu kensikeec. <sup>2</sup>Kensikeu yeni ngic mong hanimaria homemea dzakeu faima tofohoma hagec. Hagec Yesungo negen negensingngina hemma ngic puringa yofi edeec, “Medacna, ge ubaga ngereeu, kopocsicga

imoc bic wawaya.”<sup>3</sup> Ifi deu mitiac negen negengngic goa yenaocngoc negensigec, “Ngic yomoc ye Anutu emmide.”<sup>4</sup> Ifi negenggec Yesungo negen negengngina hemma yofi deec, “Ngeni ubanginau negen negeng mangana mi negensigec.”<sup>5</sup> Yoc damocngo efea ande, ‘Kopocsicga bic kpac ande.’ ifi debesonga me ‘Ge yacma kenna.’<sup>6</sup> Ngicac Medac ye bangecfu kopocsic wawaac uayoac nga kuc femide. Nga ngeni imoc negenggecdeac amma yoc yomoc deduae.” Ifi dema ngicpuring yofi edeec, “Ge yacma dzakega mema amagau kenna.”<sup>7</sup> Ifi deu ngic ye yacma ameau kenec.<sup>8</sup> Kenu ngicngac habutoa nanggec, yeneng imoc hemma kerectegec amma kengecyunuec. Anutungo uayoac kuhagoc ifia ngicngac yemmeec, yeni imoc hemma Anutu dengeregec.

<sup>9</sup>Yesungo imohacnac feregec kemma takesimemengic mong kpara Mataio, ye takesimeme amau taru hemma yofi edeec, “Ge hama modacnuna.” Ifi deu yacma modarec.<sup>10</sup> Anu Yesungo Mataioac amau emma yaka netacmanu takesimeme nga manganameme ngic homacngo hama Yesu nga medacfora yenigoc tacma yaka yenhafoc negec.<sup>11</sup> Nema tacgec farisaio yeneng imoc hemma Yesuac medacfora kpesiyemmegec, “Kpoukpoungina ye nocac manganameme ngic nga takesimeme yenigoc tacma yaka nede?”<sup>12</sup> Ifi degec Yesungo imoc negemma yofi edeyunuec, “Ngicngac kuchafeingina kpac kecdae, yeni dotaac mi ayemmeande. Hafeinginagoc, yeneng ine dotaac ayemmeude.”<sup>13</sup> Ngeni kemma yoc yofi fede, imocac negen negeng megec,

‘Ni sesegerec meandae, imocac mi anende. Ngicngac wosoefac  
angemeandae, imocac anende.’ *(Hosea 6:6)*

Imoc yofiac, ni ngic dindingac kpacyunubadeac mi mayai, kpac. Ni ine ngicngac kopocsicnginagoc kpacyunubadeac mayai.”

<sup>14</sup>Naso imohai Yohaneac medacfora yeneng hama kpesimigec, “Neni nga farisaio naso homac yakasege angandimbe amma geac medacfocga yeni nocac yaka sege mi angandae?”<sup>15</sup> Ifi degec Yesungo yofi edeyunuec, “Memeturanggac ngicngo ogofora yenigoc kecmanu yeni ubahodung naric mi anggecde, kpac. Nga kecma naso monnu memeturanggac ngic yenearunac meickegecde, naso imohai ine yakasege anggecde.”<sup>16</sup> Ngac mong ye ngakpi eseau kporucusuc gboria mong faima mi kpebiude, kpac. Ye gboria ifi faiudeu gboriango esea taiu dzamema titingtoa fingerude.<sup>17</sup> Nga ngic mongngo waing gboria bokong yangseberango memea eseau mi kpeu kemeude, kpac. Ifi anudeu waing gboriango bokong esea imoc tindziru manganau dokuya maude. Imocac waing gboriango bokong gboriau kpegec yerahafoc naric tarecde.”

<sup>18</sup>Yesungo yoc imoc edeyunuma tacmanu gareng mongngo yearu hama fafoc heima ewehaiheigoc edeec, “Ni naroanna yaguc homedac. Geng hama mariga witiau faina gboriude.”<sup>19</sup> Ifi deu Yesungo yacma kenu medacfora ifingoc yenhafoc modacma kenggec.<sup>20-21</sup> Kemmagec ngac



mongngo ngadenginau modacyunuma kenec. Ye kifa 12 sacherec kefecac amma hama negenec, “Ni Yesuac ngakpiasac kpeserebadeu ngerec ngeree meficgebade.” ifi negemma ngakpihereha susiaac witiha kpesereec. 22 Kpesereu Yesungo dzigene hemma yofi edeec, “Ngac, ge ubaga ngereeu. Negen negensinggango mengeregudac.” Ifi demanu ngac ye imohaingoc ngereec.

23 Anu Yesungo kemma garenggac amau kensikema emma kungac fifi fifi areng amma ngicngac habutoa kpeborongngina negemma yofi 24 edeyunuec, “Ngeni yomohacnac meickegec. Naroang ye mi homedac, ye gau fede.” Ifi deu yeni deendema ammima dzomoremigec. 25 Dzomoremima meickema mamagec, Yesungo naroang fec, ihai emma naroanggac mariaua mema miaru gborima yarec. 26 Yaru siduc imocngo bangec imoc sokodarec.

27 Yesungo bangec imoc wama kemmanu ngic yohockang kicngira pisisic pickeango Yesu modacma arohoma kpacsambic ammima deoc, “Dawidiac bangeha, ge nereacnac ubaga manganeu.”<sup>f</sup> 28 Ye amau emmanu kicpisisic yohockang yereng yearu kenec yeng yofi kpesiyemerec, “Neng faka ifia mebadeacsoc anduae, ngeri imoc negensinggedape me?” Ifi deu yereng deoc, “Oc Kebu, imoc negensinggedipe.” 29 Ifi deec kicngira kpeserema yofi deec, “Negen negensingngiraac fora fingecongemeru.” 30 Ifi deu kicngira tegerec. Tegeru wiac fingeconyemerec, imoc ngic mong mi edeecdac dederac ayecmeec. 31 Nga yereng ine kemma siduha imoc deyadiec amasoc negendacgec.

32 Anu yeri kemmaec ngicngac yeni ngic mong yoara kpac nga hadehadeagoc Yesuaru mehagec. 33 Mehagec yeng hadehade kporacmiu ngic ye yoac deec. Deu ngicngac habutoango imoc hemma kerecgec amma degec, “Israe bangecfu faka ifia warac mong mi fingeru hening.” 34 Ifi degec ine farisaio yeneng degec, “Ye hadehade yeneac ngictaunginaac kucfu hadehade kporacyunuma kecdac.”

35 Yesungo taong nga amabisisic sasawau yerecema kpeketurang amanginau emma edekpou ayemmema eucererenggac siduc gombung dekperagima hafei hania hania nga ngicngac kucmamanginau sasawa mengereyunudarec. 36 Nga habutoa yeni demadzac nga kucmama amma rama garengngina kpac, ifi isoc kecgac. Imocac amma Yesungo yenemma ubea manganeu 37 medacfora yofi edeyunuec, “Semeng fora homacngoc kpauedac fede nga uangic ine efeanacsac kecdac. 38 Imocac amma ngeni Kebu, semeng mingina numumima yofi edebisia, ‘Ge ua ngic sueyununa yeneng kemma foraga mekpedzuc ambisia.’”

---

<sup>f</sup> 9:27 2 Samue 7:12-16 Anutungo Dawidigoc yoac dedzege yofi anec. Ngic mongngo geac arenunac naso wisic wisickea kpac geac tatacfu tarude. Imocac yeni Yesuac Dawidiac bangeha degec.

**10** <sup>1</sup>Yesungo medacfora 12 kpacyunuu hagec ngicngac yeneanunac asu seuhagoc kporacyemmegecdeac uayoac yemmeec nga hafei hania hania amma ngicngac kucmamanginagoc sasawa mengereyunugecdeac uayoac kuhagoc yemmeec. <sup>2</sup>Apororo 12, yeneac kpacngina yofi, Simong kpara mong Petoro nga munea Anderea amma Sebedaioc medahora Yakobo nga munea Yohane. <sup>3</sup>Firipo nga Batoromaio nga Toma amma takesimemengic Mataio, Yakobo Arifaioac medac nga Tadaio <sup>4</sup>Amma Simong Kananaio amma Yuda Kariotonac. Ngic yeng kecma Yesu kerereu megec.<sup>g</sup>

<sup>5</sup>Yesungo medacfora 12 imocnoc sueyunuma yoac yofi dema edeyunuec, “Ngeni bangec monnunac ngicngac Anutu mi negemmidae, yeneac bangecfu nga samariangic yeneac taonnu mi kembisia, kpac. <sup>6</sup>Israhabuu ngicngac rama sufu sufuya, ifi isoc kecdac, ngeni yenearu kembisia. <sup>7</sup>Ngeni kemma yofi dekperagiyemmebisia, kurumenggac eucerereng imoc bic mewegenengunude. <sup>8</sup>Ifi dekperagiyemmemma ngicngac hafeigoc mengereyunuma homemea megboriyunubisia nga kukuserigoc sebingina ngereeudeac mengereyunuma hadehade nga yafing kporacyunubisia. Ni kuc imoc ubangerecac nga buma kpac ngenmedua, imocac amma ngeni ubangerecac nga buma kpac memefic imoc yemmebisia.

<sup>9</sup>Ngeni dzo gol nga siriwa nga kopango<sup>h</sup> memea, imoc mi meficgebisia nga wiac ifia fadeng nabehau mi faima mekecbisia. <sup>10</sup>Ngicngac yeneng ua mekecmagec ua imocngo yakangina meficgebese, faka imoc ngereeude. Imocac ngeni singgac hie me ngakpi yohockang me hanitabe me yasu mong mi mekembisia. <sup>11</sup>Amma taong me amabangec monnu kenggecde, ngeni imohai ngic mong yegoc tacgecdeac sirc ande, ye meficgebisia. Meficgema yegoc tacyac anggec wisickeu faima kembisia. <sup>12</sup>Ngeni ama imohai emma wenacngerec ruaeyoacgoc debisia. <sup>13</sup>Ifi degec ama imoc ruae naric meudeac siriha anudeu, ruaengo ama imohai hama feude. Nga ama imoc ye ruaea naric mi meudeac siriha anudeu ruae imocngo ngenanggaru monggoc dzigenengemmeude. <sup>14</sup>Nga mongngo mi hoangngunuma yoacngina mi negenudeu ngeneng ama me taong imoc wama haninginaunac yube kpegec mau kembisia. <sup>15</sup>Foracngoc, kecma ising ising nasotoau taong imocac ngicngac yeneac ebicngo Sodong nga Gomora taong, yereac ebic feraheude, imoc edengunuduae.

<sup>16</sup>Negendae, rama yeneng katekasi yeneac botucfu kecdac, ni siriha imocacsoc suengunuduae. Imocac ngeni boidezoc isoc negen negentegecnginagoc kecbisia nga kebesac neng, yeni isoc manganangina kpac kecbisia. <sup>17</sup>Ngeni ngic yeneac negentegecma kecbisia. Yeni

<sup>g</sup> **10:4** Simonggac kpara mong Dzerote. Ruka 6:15. <sup>h</sup> **10:9** kopa imoc aieng siriha mong karaya sacsac 1 nga 2 toea isoc.

yoacfu faingunugecde nga kpekpeturang amanginau dzikacngo ebiria ngunugecde. <sup>18</sup>Nga ngicngac yeni neac amma mengunuma kemma gawana nga ngictau yeneac kicfu faingunugecde. Ifi anggec ngeneng yeni nga bangec monnunac ngicngac Anutu mi negendae, ngic imoc momoc siduc gombung dekperagiyemmebisia. <sup>19</sup>Nga ngicngac yeneac kicfu faingunugec yoacfu nanggecde, imohai ngeni noc yoac degecde me dafi degecde, imocac negengyohoc mong mi ambisia. Kebungo naso imohainoc yoac ngenimeu ngeni imoc debisia. <sup>20</sup>Ngeni naso imohai ngenaac yoac mi degecde, kpac. Mangnginaac Asungo yoac enacnginau faiu imoc degecde.

<sup>21</sup>Imohai dara mongngo munea enara yeneac mariu faiu yeneng ye homecfa faigece nga manggac mongngo faka imocngoc medahaac anude. Nga nambarac yeneng nonggo mangfocngina deengdema ayemmema homecfa faiyunugecde. <sup>22</sup>Nga neac kpacac amma ngicngac sasawa yeneng ubango ukungunugecde. Nga ngic mong ye seserigoc kecmanu nasotoa haude, yeng komoc kpeude. <sup>23</sup>Ngeni taong monnu kegec ngicngac yeneng ngunukporac angemmegec ngeni taong imoc wama worama monnu kembisia. Foracngoc, ngeni Israe bangecfa taong sasawa fekende, ihai uana mi mesimagec Ngicac Medacngo haude.

<sup>24</sup>Negen negeng medac mongngo kpoukpouya yeac engena mi anude nga wanacngic mong ye mingina yeac engena mi anude, kpac. <sup>25</sup>Negen negeng medac ye kpoukpouyaac siric isoc ambeso nga wanacngic ye minginaac siric isoc ambeso, imocngo naric anude. Nga amaac enara yeac Bedzeburu demigec isoc amafora ngenearu kpac ifia mangana monggoc kpacngunugecde.

<sup>26</sup>Wiac mong sangoyagoc fede, imoc kecma nonongkac fingecegerude nga wiac sufufuya fede, imoc negendacecde. Imocac ngeni yeneac mi kengecngunubeso. <sup>27</sup>Ni tofocnac nasou yoac edengunuduae, ngeni imoc kperagiau debisia. Nga sangicfu kedzacnginau dedea, ngeni ama witiau namma imoc deyadigec negendacbisia. <sup>28</sup>Ngicngac yeni sebingina kpehomema ubaongangina naric mi kpehomegecde, ngeni yeneac mi kengecngunubeso. Anutungo sebi nga ubaonga yerahafoc hofeu memanganeude, ngeni yeac ine damungunubeso. <sup>29</sup>Ngicngac yeni nengbisc yohockang faigec toea mocgu sacsacngo bummeandae. Nga neng yeneac ngeni mongngo bangecfa makpeu Mangnginango imoc bic negenude. <sup>30</sup>Nga ngenearu orucdzonginaac kpete, imoc ifingoc osoosodara. <sup>31</sup>Ngeneng nengbisc homac feracyunudae, imocac amma ngeni mi damungunubeso. <sup>32</sup>Mong ye ngic yeneac kicfu neac deande, 'Ni yeac areng.' Neng yeac ifingoc Manna kurumennu kecede, yeac kicfu yofi debade, 'Ye neac ngic.' <sup>33</sup>Nga mong ye ngic yeneac kicfu neac kpacna busickpeu neng Manna kurumennu kecede, yeac kicfu yeac kpac ifingoc busic kpebade.

<sup>34</sup>‘Ye bangecfu ruae meficgeudeac maec.’ ngeni neac ifi mi negembisia, kpac. Ni ruae meficgebadeac mi mayai, ni ine yare meficgebadeac mayai.

<sup>35</sup>‘Medac ye mamagoc tohoemecde nga naroang ye nonggeagoc tohoemecde. Nga ngac ye erangiagoc tohoemecde, ifi fingerudeac mayai. <sup>36</sup>Ngicngac ngic monggac ameau yombong arengfora kecdae, yenennoc ngabafora anggecde.’ (Mika 7:6)

<sup>37</sup>Ngic mong ye nonggo manghora heresongogoc hoangyuruma neac songo mamea negengande, ye neac areng anudeac siric mi anude. Nga mong ye medaha me naroanga heresongogoc hoanggema neac songo mamea negenude, yeng neac areng kefudeac siric mi anude. <sup>38</sup>Ngic mong ye mariponga tofohoma ni mi modacnuude, yeng neac areng kefudeac siric mi anude. <sup>39</sup>Mong ye yengena kekeha meficgema segerede, ye kekeha sufumiude. Nga mong ye neac amma kekeha wade, ye kekeha meficgeude.

<sup>40</sup>Ngic mongngo ngeni heitaingunuude, yeng ni heitainuude. Amma ni heitainuude, yeng Anutu suenuec, ye heitaiude. <sup>41</sup>Nga ngic mong ye profete mong hemma ngic imoc ye profete kecde, ifi negemma ye heitaiude, yeng profeteac bung meude. Amma mongngo ngic ye dindingac kecdeac amma ngic imoc heitaiude, ye ngicngac dindingac yeneac bung meude. <sup>42</sup>Mongngo medac kapia mong hemma neac medac andeac negemma doku nomang kpakenecfu kpemiu neudeu yeng kecma bumaac mi obohode, imoc fora yombong.”

**11** <sup>1</sup>Yesungo medacfora 12 dederecge ayemmedaru wisickeu amabangec imoc waec. Wama taonnginau siduc gombang edekpou ayemmeudeac kenec.

<sup>2</sup>Anu Yohanengo witicamau tacma Kristongo ua meec, siduc imoc negemma medacfora yearu sueyunuu kemma <sup>3</sup>kpesimigec, “Ngic hanemmeudeac dedea, imoc ge me neni monggac tomai kecbisina?” <sup>4</sup>Ifi degec yeng yofi deec, “Ngeni kemma wiac hennegeng andae, imocac siduc Yohane ammbisia. <sup>5</sup>Ngicngac kicipisic yeni kicfifi andae nga hanimangang yeni sing kengkecdae amma ngicngac kukuseringinagoc yeni sebingina ngereeu kecdae. Kedzacfong yeneng yoac negemma kecdae nga homemea yeneng gborima kecdae amma ngic makpekpea yeneng siduc gombang negengkecdae. <sup>6</sup>Nga ngic mong ye neac negemma herea mi buude, ye kenehagoc.”

<sup>7</sup>Anu Yohaneac medacfora yeni kemmagec Yesungo yeac haniaya dekperagima habutoa yofi edeyunuec, “Ngeni bangec kisiu noc wiac hengecdeac kenggec? Komba mong firangngo kpeu kockpac ande, ngeni imoc hengecdeac kenggec me? <sup>8</sup>Imoc kpac. Imocac noc wiac hembesonga kenggec? Ngic mong wambaya kibiagoc me? Negenggec, ngic wambangina kibia gombunga heiandae, yeni ngictau yeneac amau kecandae. <sup>9</sup>Ngeni profete mong hembesonga kenggec me? Yennoc profete goa sasawa feracyunude, ifi deduae. <sup>10</sup>Yeanoc yofi oho ohoya fede,

‘Negenna, ni enacdedena sueba yeng waraigemmasingga mengeregenude.’ (Marekai 3:1)

<sup>11</sup>Foracngoc, ngic ngacfunac fingegec, yeneanac mongngo Yohane dokunadzic naric mi ferahaec, kpac. Nga kurumeng eucererenggac manau mamea kecde,<sup>i</sup> yeng Yohaneac engena. <sup>12</sup>Nga Yohane dokunadzicngo uaya hanaheecfunac erekecma yaguc ande, ngicngac yeni kurumenggac eucerereng mebesonga ua serima meandae. <sup>13</sup>Profete sasawa nga Moseac dedeseriyoac, imoc yeni kpefingyoac deerekecmagec Yohaneacu hasikedede. <sup>14</sup>Nga ngeni yoac yomoc hoanggebeso negengandae isoc yofi deduae, Eriango haudeac degec, imoc yenoc. (Marekai 4:5)

<sup>15</sup>Kedzahagoc yeng yoac yomoc negembeso.

<sup>16</sup>Nga areng yofinenggac kecdae, yeni fakangina yofi. Nambarac yeni sobennu tacma ogofocngina yeneac kpacandae, <sup>17</sup>‘Neni kungac fifini ngeni ine yegec mi fededau nga ubahodung yegec heini ngeni mong mi kiadau.’ <sup>18</sup>Yohanengo hama nenedoku mi neu yeni hemma degec, ‘Ye yafingagoc.’ <sup>19</sup>Nga Ngicac Medacngo hama nenedoku neu hemma deandae, ‘Hengec, ye nenedoku efea mi nekecde nga ye takesimeme ngic nga manganameme ngic yeneac ogongina.’ Anutuac negen negentegec, imoc gombunga ande, imoc uayango dede.”

<sup>20</sup>Yesungo guruama goau faka kuhagoc homac meu ngicngac homacngo hemma ubamereng mi anggecac ye dehou ayemmema yofi edeyunuec, <sup>21</sup>“Koradzic nga Besaida ngicngac, ngeni sowecnginagoc. Ngenearu kucfaka homac bic fingerec, kucfaka ifia Tiro nga Sidong taonnu fingeccbac dede ngicngac yeni kopocsicnginaac amma ubamanganggac wamba bic heima hama nadzicma ubamereng ambau. <sup>22</sup>Ni edengunuba, ising ising nasotoau Anutungo Tiro nga Sidong areng yeneac ubamangang negemma turunga efeanec yemmeude amma ngeni ine turunga ebiriangoc ngemmeude. <sup>23</sup>Nga Kafanaung taong, geng kurumennu ennadeac ifi negenganec, imoc kpac yombong. Yeni homecac amau megu keme kemeac siric annec. Faka kuhagoc gearu fingerec, imocngo Sodong taonnu fingeccbac dede Sodong ye naso yofinenggac febacngoc. <sup>24</sup>Nga edengunuba negenggec, turung kpoukpou nasou Sodonggac areng yeni turunga efeanec ayemmegecde nga ge ine turunga meebirima anggenggecde.”

<sup>25</sup>Naso imohai Yesungo yofi deec, “Manggac, kurumeng nga bangec mingina, ngicngacareng negen negentegecnginagoc nga fitira andae, geng yeni wiacga sasawa yomoc mesufuyemmenec. Amma nambaracbisic bisic, yeni ine wiac yomoc mekperagiyemmenec, imocac dengereguduae. <sup>26</sup>Oc Manggac, ge imoc hemma ubaga ngereede. <sup>27</sup>Mannango wiac

---

<sup>i</sup> 11:11 Yesungo yengenaac negemma yofi deec, “Kurumeng eucererenggac manau mamea kecde” Anutungo ye ferahedeac ifi deec.

sasawa nenu neng imoc mekecduae. Nga ngic mongngo Medac naric mi negemmide, Manggacngosac negemmide. Ifi isocngoc mongngo Manggac naric mi negemmide, Medacngosac ine ye negemmide. Amma Medacngo ngicngac meisingyunuma edzacyunuande, yeneng ifingoc Manggac negemmigece.

<sup>28</sup>Ngicngac uatoa mema kucmama kecandae nga ebic homac tofohoandae, ngeni nearu hadacgec neng kecnegeng ngemmebade. <sup>29</sup>Ngeni hama tofona miacma tofohoma negen negeng nearunac megec. Ni wosonomang nga memaemema kecduae. Ifi anu ubaonganginango kecnegeng meficgeude. <sup>30</sup>Neac tofona imoc yumea nga tofo witiau wiac dzegeanduae imoc efea.”

**12** <sup>1</sup>Naso imohai Yesungo sabata nasou wit uausing kemmanu medacfora yeni herenginaac homema wit fora goa menec anggec. <sup>2</sup>Ifi anggec farisaio yeneng imoc hemma edegec, “Henna, medacfocga yeni sabata nasou faka mi angana, imoc andae.” <sup>3</sup>Ifi degec Yesungo yofi edeyunuec, “Dawidi nga uamedacfora yeni herenginaac homema faka anggec, ngeni imoc osonegeng mi angandae gedang. <sup>4</sup>Ye Anutuac womonnu emma ic sogong Anutuac sese faifaia, imoc mema uamedacfora yenigoc negec. Faka imoc mi angana nga Dawidi yengena nga uamedacfora yeneng imoc anggec. Womong gareng yeneng imoc naric negecde nga ngictehec yeneng imoc mi nebisia. (1 Samue 21:1-6) <sup>5</sup>Womong gareng yeni ifingoc sabata nasou ua mema sabata tatac faka wama sifu kopocsic mi meficgegecde. Dedeseriyoac mitikibiu fede, ngeni imoc osoma mi negengandae. <sup>6</sup>Ni yoac yofi edengunuba, wiac yomocngo<sup>j</sup> Anutuac womong ferahade. <sup>7</sup>Nga yoac yofi oho ohoya fede, ‘Ngeni wosoefac ayemmedae, imocac anende nga sesegerecac ine mi anende.’ (Hosea 6:6)

Ngeni yoac imoc negentegecbau dede ngeni ngic kopocsiha kpac, ye mangana mi demibau. <sup>8</sup>Ngicac Medac yennoc sabataac Kebu.”

<sup>9</sup>Anu ye wama imohacnac kemma kpekpeturang amanginau enec. <sup>10</sup>Enu ngic mong maria mong homemeango ihaingoc tarec. Taru ngic yeni Yesungo dafi deu negemma yoacfu faigecdeac kpesimigec, “Sabata nasou ngic mengec mengere ua naric mebesonga me kpac?” <sup>11</sup>Ifi degec yeng yofi edeyunuec, “Ngenearunac mongngo ramaya mong sabata nasou teng monnu kemedac isoc, ye ine bic kemma ramaya taiu ereude. <sup>12</sup>Nga ngic ngeneng ine wiac engena amma rama feraheyombonggedae. Imocac sabata nasou mengec mengere uaac kpaea mong mi fede.” <sup>13</sup>Ifi dema ngicac yofi deec, “Ge mariga sinena.” Ifi deu ye maria sineu imohaingoc sorongaima ngereeu maria noboha isoc anec. <sup>14</sup>Nga farisaio yeni mama kemma adzoroma tacma Yesu kpegecdeac dekiric anggec.

<sup>j</sup> 12:6 Yesu ye yengenaac negemma “wiac yomocngo” deec.

<sup>15</sup>Ifi anggec Yesungo negengyemmemma imohacnac wama kenec. Kenu ngicngac homacngo modacgec yeng ngicngac hafeinginagoc sasawa mengereyunuec. <sup>16</sup>Mengereyunuma ngicngac yeni siduha mi deyadigecdeac goroyoac edeyunuec. <sup>17</sup>Profete Yesaiango kpefinnu yoac bic deec, imoc fora ambeso,

<sup>18</sup>“Negenggec, ni ua ngicna meisinggeai nga heregoc yeac songo negemba ubaonganango yeac sogaide. Nga Asuna yeac witiu faiba yeng neac desi desifaka dindingac bangec monnunac ngicngac, yenearu dekperagiyemmeude. <sup>19</sup>Amma ye ngaba mi anude nga ye kucgoc mi arohoude. Ngicngac yeni amasobennu namma yeac yoac udumenga naric mi negenggecde. <sup>20</sup>Nga yeng komba mong bic manganedac, imoc mi tueude nga kifa mong witiha hosuhagoc, imoc mi mepisickeude. Ifi anu kecma ye desi desi faka dindingac garenggekefu faka imocngo faka mangana feraheude. <sup>21</sup>Nga bangec monnunac ngicngac Anutu mi negendae, yeneng negen negensingnina yeac kpacfu gbedickegecde.” (Yesai 41:1-2)

<sup>22</sup>Yeni ngic mong hadehadeagoc nga kiwa pisc piscikea amma yoara kpac, ye Yesuaru mema kenggec. Kenggec yeng ngic mengereu yoac dede nga kicfifi anec. <sup>23</sup>Ifi anu kpebung nandacgec, yeneng imoc hemma kerectegec amma degec, “Ngic imoc ye Dawidiac kiscifunac gedang.” <sup>24</sup>Ifi degec Farisaio yeneng ine imoc negemma degec, “Hadehade nga yafing kporacde, imoc hadehade nga yafing yeneac ngictau Bedzeburu, yeac kucfu mede.”

<sup>25</sup>Ifi degec Yesungo negen negengnginau negemma yofi deec, “Bangec monggac ngicngac yeni ngaba angemema tohogecdeu bangec imoc kisi fingerude. Nga taong me amaareng mong yenaocngoc ngaba angemegecdeu taong me amaareng imoc naric mi fekefude. <sup>26</sup>Nga Satang yengenaocngoc kporacemeudeu ye tohou habu yohockang anu yeac amabangeha seria naric mi feude. <sup>27</sup>Neng Bedzeburu yeac kucfu hadehade nga yafing kporacyunubai dede ngeneac medacfocngina yeni ifingoc yeac kucfu hadehade nga yafing kporacyunubau. Ifi anu ngeneac medacfocnginango yocngina isinggema desigecde. <sup>28</sup>Nga neng Anutuac Asugoc hadehade nga yafing kporacyunuduae imohai Anutuac eucererengno ngenearu bic hadac kecde.”

<sup>29</sup>“Ngic mongngo ngic kuhagoc mong yeac amau naric mi enude nga ye iwaiya sasawa naric mi wangerude, kpac. Ye ngic kuhagoc witickemaguc amea manau emma iwaiya tacde, imoc naric wangerude.”

<sup>30</sup>“Ifi anu yofi edengunuba negenggec, ngic mong ye mi nanggenude ye ngadenuude. Nga mongngo nigoc mekpedzuc ua mi meude, yeng neac wiac megigi anu sinsararang kpeudeac ua meude. <sup>31</sup>Imocac edengunuba negenggec, ngic mong ye kopocsic hania hania meande amma Anutu demanganeande, yeac kopocsic wawaac sing fede. Nga mongngo Asu



demanganede, yeac kopocsic wawaac sing ine mi fede, kpac. <sup>32</sup>Anu ngic mong ye Ngicac Medac emmima yoac deude, yeac kopocsic wawaya fede. Nga mong ye Tiri Asu emmima yoac deude, yeac kopocsic wawaac sing mong mi fede, kpac. Imoc naso yofinenggac kecdimbe me naso ngade haude, imohai ifi fekung kecbesande.”

<sup>33</sup>“Ic mong gombunga degec, imohai fora gombunga fingerude nga ic mangana degec, imohai fora mangana fingerude. Forango icac siriha edzacnunuude. <sup>34</sup>Ngeni boidezocac fingcsaheunac. Nga wiac ubaherenginau wakema fede, imocnoc enacnginango dekperagiude. Ngeni ngic manganango yoac gombunga degecdeacsoc mi ande. <sup>35</sup>Ngic gombungango ye tohonga gombunga femide, imohacnac wiac gombunga meu maande. Nga ngic manganango tohonga manganaunac wiac mangana meu maande. <sup>36</sup>Neng yofi edengunuba, ngeni yoacngina sicsauha sasawa deandae, yoac imoc ising ising nasou isinggema foraya degecde. <sup>37</sup>Yoacgaac siricfu yoacga gombunga desigecde nga yoacgaac siricfu desima mangana degengecde.”

<sup>38</sup>Ifi deu mitiac negen negengngic nga farisaio goa yeneng degec, “Kpoukpou, ge faka kuhagoc mong edzacnununadeac anemme.” <sup>39</sup>Ifi degec yeng ine yofi edeyunuec, “Naso yomocac ngicngac ngeni mangana nga seroareng amma kucfaka mong henggecdeac kpesiandae. Nga ngeni ine faka kuhagoc mong mi ngemmengemlea, kpac. Profete Yona, yearu kucfaka fingerec, ngeni imocsac henggecde. <sup>40</sup>Yona ye hadzing nga tofocnac harebec kondungyangtoaac heremanau feec, ifi isocngoc Ngicac Medacngo bangecac heremanau hadzing nga tofocnac harebec feude, ngeni imocsac henggecde. <sup>41</sup>Anu Niniwe taongtoaac ngic yeni Yonaac dedekperagiyoac negemma ubamereng anggec. Imocac ngicngac yomoc ngeneng ising ising nasou Niniwe ngicngac yenigoc yacma nammagec fakangina isinggema ngeneac mangana dengemmegecde. Anu negenggec, yomocngo<sup>k</sup> Yonaac faka ferahade. <sup>42</sup>Nga Seba bangecac ngactaungo Saromoac negen negentegec meudeac bangec tegiau sautfunac haec. Yeng ising ising nasou ngicngac yomoc ngenigoc yacma nammagec fakangina isinggema ngeneac mangana dengemmeude. Anu negenggec, yomocngo<sup>l</sup> Saromo ferahade. (*1 Ngictau 10:1-13*)

<sup>43</sup>Asu seuhagoc ye ngicfunac erema bangec dokuya kpac, ihai kemma tacnegenudeac tatak hofocma yerecema kecande. Kecma tatak mong mi meficgema <sup>44</sup>yengenaocngoc yofi deude, ‘Amana warac tacma wayai, imohai monggoc dzigenema kembadeac negenduae.’ Ifi dema kemma ama imoc henude. Nga imoc bic wangge wanggea nga mengec mengerea amma mingina kpac eng tacde. Taru asu seuhagocngo imoc hemma

<sup>k</sup> 12:41 Yesu ye yengenaac negemma “Yomocngo Yonaac faka ferahade.” deec.

<sup>l</sup> 12:42 Yesu ye yengenaac negemma “Yomocngo Saromo ferahade.” deec.

<sup>45</sup>monggoc kemma arengfora 7 wangecyunuu hagecde. Arengfora imoc yeneng ye ferahema mangana yombong andae, yeni meyunuma kemma ama imohai enarangina anu kecgecde. Ifi anu ngic ye warac mangana kefec, ye imoc ferahema imocac mangana yombong kefude. Nga ngicngac yofinenggac mangana andae, ngenearu faka ifiangoc fingerude.”

<sup>46</sup>Yesungo ngicngac yoc edeyunumanu nonggo munafora yeneng hama ngadeau namma yegoc yoc denegeng anggecdeac degec enec.

<sup>47</sup>Enu ngic mongngo imoc negemma edeec, “Nonggo munafocga yeni gegoc yoc yoc anggecdeac ngadeau nandae.” <sup>48</sup>Ifi deu Yesungo ye edeec, “Damoc yeneng neac nonggo munafocna?” <sup>49</sup>Ifi dema medacfora nanggec, yenearu maria sinema yofi deec, “Ngicngac yomoc yeneng nonggo munafocna. <sup>50</sup>Imoc yofiac, ngicngac Manna kurumennu kecde, yeac songo nga negen negeng modacma uaya meandae, yenennoc neac nonggonaing nga dacmunafocna.”

**13** <sup>1</sup>Uameme imohaingoc Yesungo amaunac mama dzohong tegiau kemma tarec. <sup>2</sup>Tacmanu habutoa kunengngo yombong yearu kenggec ye gombau emma tacmanu ngicngac habutoango dzohong tegiau nanggec. <sup>3</sup>Nanggec yeng yoc heima yoc homac edeyunuma yofi deec, “Gbome kpegi kpegingic mongngo gbome kpegiudeac uau kenec. <sup>4</sup>Kemma gbome kpegiu gbome goango mama sinnu heiu neng yeneng hama nedacgec. <sup>5</sup>Nga goango harongannu heiu ihai bangec efeanec fecac imoc bic nemonggema ereec. <sup>6</sup>Amma gbome godea homac mi faiecac wenacngo erema kpeu ururuema homeec. <sup>7</sup>Nga goango haseng manau heima nemonggeu hasengngo yadima gbome heihomeec. <sup>8</sup>Nga gbome goango bangec gombungau heima fora fingerec. Imohanac goau 100 fingerec nga goau 60 amma goau 30 fingerec. <sup>9</sup>Kedzahagoc yeng yoc yomoc negembeso.”

<sup>10</sup>Anu medac yeneng yearu kemma kpesimigec, “Ge dafiac yoc heima edeyunuannec?” <sup>11</sup>Ifi kpesimigec Yesungo yofi merengyemmec, “Kurumeng eucererenggac negen negeng sufu sufuya, imoc ngeneng negenggecdeac ngemmengemlea. Nga imoc ine yeni mi yemmeyemlea. <sup>12</sup>Ngic mong wiac goa femide, ye wiac homac monggoc migec mekefude. Nga mong ye wiac mong mi mekecde, yearunac wiacbisis mekecde, imoc ifingoc wangecgecde. <sup>13</sup>Ngicngac yeni kic fima mi hendae nga kedzac kpema sifu wiac mong mi negentegecgecde. Imocac amma yoc heima edeyunuanduae. <sup>14</sup>Nga profete Yesaiango yoc deec, imoc yenearu fora fingecde,

‘Ngicngac kedzacngo negen negeng, yeni imoc negemma naric mi negentegecgecde. Amma kicngo heheng yeni imoc hemma naric mi hentegecgecde. <sup>15</sup>Ngicngacareng yomoc yeni herengina tondzera nga kedzacnginango yoc negenggecdeac ebiridae amma kicnginango wiac henggecdeac mepisickegec. Yeni kicnginango

wiac mong hembauac nga kedzacnginango negembauac amma negen negengnginango wiac mong negentegecbauac, imoc yeni ubangina dafiu dzigeneu mengereyunubade.’ (Yesaia 6:9-10)

<sup>16</sup>Nga ngicngac kicpisis nga kedzacfong kpac, ngeneac kickedzacngina kenehagoc. <sup>17</sup>Foracngoc, profete nga ngic fakangina dindingac homacngo warac kecegec, yeni wiac ngeni hengandae, imoc hembeso songo negemma sifu mi henggec. Nga ngeni wiac kedzacnginango negengandae, yeni imoc kedzacngo negembeso ayemmeu ifingoc mi negenggec.”

<sup>18</sup>“Imocac ngic gbome kpegiec, imocac yoac heiheiac hania deba ngeni negenggec. <sup>19</sup>Ngic mongngo eucererenggac yoac kedzahango negemma mi negentegegeru mangana minginango hama gbome hereau homec homera, imoc bic meickeude. Imoc wit gbomea sinnu heiec, siriha imocacsoc ande. <sup>20</sup>Nga gbomea harongannu heiec, imoc ngic mongngo eucererenggac yoac negemma songogoc bic hoanggeude, ye isoc. <sup>21</sup>Hoanggeu imocngo ubeau godu mi mema naso wegenanacsac feude. Nga Anutuac yoacac amma kpendzeng me yunukporacfaka yearu fingeru ye makpeude. <sup>22</sup>Nga gbomea hasennu heiec, imoc ngic mong ye eucererenggac yoac negemma kefude, ye isoc. Ye yoac negenu kekecac negengyohoc nga dzofinacac faitobangfaka imocngo yadima yoac imoc heihomeu fora mong mi fingerude. <sup>23</sup>Nga gbomea bangec kerehagocfu heiec, imoc ngic mong ye eucererenggac yoac negemma negentegegerude, ye isoc. Ngic ifia yearunac goango fora 100 nga goango 60 amma goango 30, ifi fingerude.”

<sup>24</sup>Yesungo yoac mong heima yofi edeyunuec, “Kurumenggac eucerereng imoc ngic mongngo uayau kemma witgbomea gombunga kpegiec, siriha imocacsoc ande. <sup>25</sup>Ngic ye kpegima kenu amaareng yeni tofocnac gau fedacmagec ngabango ine hama kpindzing mangana ifingoc wit botuhau kpegima kenec. <sup>26</sup>Nga wit imoc nemonggema erema fora fingecmanu kpindzing manganango ifingoc nesarima ereec. <sup>27</sup>Ifi anu wanacngic yeneng hama mingingngina edegec, ‘Kunennina, ge uau gbome gombunga kpeginec anu kpindzing mangana imoc ine damohacnac erede?’ <sup>28</sup>Ifi degec yofi edeyunuec, ‘Ngabangic mongngo imoc andac.’ Ifi deu degec, ‘Neni kemma kpindzing mangana imoc taima ukunide, ge ifi negennec, me?’ <sup>29</sup>Ifi degec yeng yofi edeyunuec, ‘Kpac, ngeni kpindzing taidimbe dema wit ifingoc taibauac amma wagec.’ <sup>30</sup>Wit nga kpindzing yerahafocngoc yadimaec kpememe naso hau kpememengic yofi edeyunubade, ‘Ngeni hanahema kpindzing taima dedeckema gerecfu ukugec dzebeso. Nga wit ine mekpedzuc amma semengamanau faigec tacbeso.’”

<sup>31</sup>Yesungo yoac mong heima yofi edeyunuec, “Kurumenggac eucerereng imoc mastet gbomea isoc, ngic mongngo imoc mekemma uayau homerec. <sup>32</sup>Mastet gbomea, imoc gbome sasawa yeneac

kapiangina. Amma ye yadima semeng uaac mondzang feracyunuma ic wegena anu sawau neng yeneng hama fawau faec heiandae.”

<sup>33</sup>Anu Yesungo yoac mong heima yofi edeyunuec, “Kurumenggac eucerereng imoc yis isoc. Ngac mongngo farawa 20 kg mema uuha yisgoc yerecema meu hafaangoc yisagoc anude.” <sup>34</sup>Yesungo yoac deec, imoc yoacfu sasawa heima ngicngac habutoa edeyunuefec, ye eng mong mi edeyunuec. <sup>35</sup>Profete mongngo yoac yofi deec,

“Ni yoac heima deba, imoc enacnaunac maudeac ande nga wiac warac kundunnu sufu sufuya feec nga wiac ngade fingeibesande, imocac yoac debade.” *(Mitiyegec 78:2)*

Yoac imoc fora fingerudeac Yesungo yoac heimasac yoac edeyunuefec.

<sup>36</sup>Anu ye habutoa faiyunuma amau enu medacfora yeneng yearu emma degec, “Ge yoac heima kpindzing mangana uau erede dedang, imocac hania dekperaginemmena negenni.” <sup>37</sup>Ifi degec yeng yofi merengyemmec, “Ngicac Medacngo gbome gombunga kpegima kecde. <sup>38</sup>Semeng uaya imoc bangectoa bangec amma gbomea gombunga imoc eucererenggac nambaracfora. Nga kpindzing mangana imocngo mangana minginaac nambaracfora. <sup>39</sup>Nga ngabangicngo gbome uau kpegiec, imoc mangana mingina. Nga fora kpememe naso, imoc naso wisic wisickea, imocac nasotoa. Uangic imoc angero. <sup>40</sup>Yeneng kpindzing mangana taima gerecfu ukugec dzeude, nasotoau ifi isoc fingerude. <sup>41</sup>Imohai Ngicac Medacngo angerofora sueyunuu yeneng yeac amabangehaunac wiac kopocsic meficgeande amma ngicngac kopocsic mekecdae, imoc sasawa kpezucyunudacma <sup>42</sup>gerecyadau ukuyunuu kemegecde. Ihai ngicngac kiacma enacngina kisaranggema kecgecde. <sup>43</sup>Nga ngicngac kpetiac yeni Mangnginaac eucererennu wenackiwa isoc kperagima kecgecde. Kedzahagoc yeng yoac yomoc negembeso.”

<sup>44</sup>Yesungo monggoc yofi deec, “Kurumenggac eucerereng imoc ngic yeneng dzofinac ua monnu sufugec, ifi isoc. Ngic mongngo ihai kemma imoc meficgema monggoc mesufuec. Mesufuma ubangerec kuneng negemma kemma wiara sasawa suema dzo mema kemma ua imoc bummeec. <sup>45</sup>Anu monggoc yofi, kurumenggac eucerereng imoc kubu gombunga buma kuneng kubu faifaingic mongngo hofocma kefec, ifi isoc. <sup>46</sup>Hofoc kecma kubu mong buma kuneng yombong meficgeec. Meficgema kemma iwaiya sasawa sueu dzo kirecgeec. Kirecgeu hama imocngo kubu imoc bummeec.

<sup>47</sup>Ni monggoc deba negenggec, kurumenggac eucerereng imoc ufic mong isoc. Ngic yeni ufic dzohonnu ukugec kemema kondung yang hania hania meande. <sup>48</sup>Ukugec dzohonggac yangngo uficfu wakeu tegiau kpedzigece ereec. Ereu ngic yeni kondungyang nenea isinggema otou faigec nga mi nenea, imoc ukugec. <sup>49</sup>Naso wisic wisickea imohai faka ifi isoc fingerude. Angero yeneng kemma ngicngac manganameme

areng kecdae, yeni ngicngac dindingac yeneac botucfunac meicyunuma<sup>50</sup> gerectoau ukuyunugec kemegecde. Kemema yeni ihai kiacma enacngina kisaranggema kecgecde.”<sup>51</sup> Yesungo ifi dema kpesiyemmeec, “Ngeni yoac imoc sasawa negentegecdae me?” Ifi deu degec, “Oc.”<sup>52</sup> Ifi degec yofi edeyunuec, “Imocac mitiac negen negengngic kurumeng eucererenggac negen negeng mema kecandae, yeninoc ama monggac mingina, ye isoc andae. Yeng tohongaunac wiac esea nga gboria memaude.”

<sup>53</sup> Yesungo yoac heima imoc dedacma amabangec imoc wama<sup>54</sup> yengena amabangehau kenec. Kemma kpekpeturang amanginau emma edekpou ayemmu ngicngac yeneng imoc negemma kpidohoma degec, “Ngc yomoc ye negen negentegec nga kucfaka imoc dahacnac mema mekecde?”<sup>55</sup> Ye amamemengic yeac medacnoc. Nga nonggea kpara Maria amma ye Yakobo nga Yosec nga Simong amma Yuda yeneac dacngina.<sup>56</sup> Nga naingfora sasawa yeni nenanggoc kecdae. Yeng negen negeng imoc dahacnac meec?”<sup>57</sup> Yeni ifi dema Yesuac yoac nga uayaac dehesi amma wagec. Ifi anggec Yesungo edeyunuec, “Profete yeni yenang amanginau nga amabangecnginau, imohaisac kpacngina kpac kecdae.”<sup>58</sup> Anu ngicngac yeni mi negensinggec ac amma yeng imohai kucfaka efeaneccac meec.

**14** <sup>1</sup>Naso imohai Yesuac siducngo gawanatoa Herode yeac kedzacfu kemeu<sup>2</sup> yeng negemma uamedacfora edeyunuec, “Imoc Yohane dokunadzic. Ye homecfunac gborima yarecac amma faka kuhagoc meudeac kuc femide.”

<sup>3-4</sup> Imoc yofiac, Herodengo warac munea Firipoac enema Herodia hamangec meec. Meu Yohanengo yofi edeac, “Ge ngac imoc mema yegoc kecnade, imoc singngo mi dede.” Ifi deecac Herodengo Yohane mema hanimaria kpema witicamau faima<sup>5</sup> kpehomebeso negensieac. Nga ngicngac yeneng ye profete, ifi negenggecac amma kengec anec.

<sup>6</sup> Anu Herodeac fingeac fingeccasau hau yeni adzoroma tacmagec Herodiaac naroangngo yeneac botucfu yegec fedeu Herodengo hensongo ammima<sup>7</sup> naroangngo wiac monggac ammiu imoc naric miudeac nemuya monggac kpacfu deserieac.<sup>8</sup> Deseriu naroang ye nonggeango negen negeng miu Herode edeac, “Ge Yohane dokunadzicac oruha terau faima mehama nenna.”<sup>9</sup> Ifi deu negemma ngictau ye ubaebic meec. Amma ye ine dedeseriyoac ngicngac tacgec yeneac kicfu deec, imoc negensima naroangngo deec, imoc migeccaeac deserima<sup>10</sup> wasaingic sueu Yohane witicamau tarec, ye ubea herecgebesonga kenec.<sup>11</sup> Kemma Yohaneac ubea kperecngema hatea terau faima mehama naroang miu nonggeaarau mekenec.<sup>12</sup> Anu Yohane medacfora yeni kemma farenga mehama tonggoma kemma Yesu siduc imoc ammigec.

<sup>13</sup> Ammagec Yesungo siduc imoc negemma amabangec imoc wama gombau emma medacfora yenigoc amabangec mong ngiha kpacfu, ihai ye

tembuha tarudeac kenggec. Ammanu ngicngac habutoa yeneng imoc bic negemma taongngina wama hanising ye modacma kenggec. <sup>14</sup>Kenggec Yesungo gombaunac mama ngicngac habutoa ifi yenemma ubea manganeu ngicngac hafeinginagoc mengereyunuec. <sup>15</sup>Mengereyunuma kecmanu ama marai anu medacfora yeneng yearu hama degec, “Bangec yomoc ngiha kpac anu naso bic kendacdeac ngicngac habutoa sueyununa amabangec goau kenggec. Yeni kemma yenaoc yaka bummenec anggec.” <sup>16</sup>Ifi degec yeng yofi edeyunuec, “Yeni kenggecdeacsoc mi ande, ngeni ngenaoc yaka gumecyunugec.” <sup>17</sup>Ifi deu degec, “Neni ic sogong marimong nga kondungyang yohockang yoc mekecdimbe.” <sup>18</sup>Ifi degec yeng yofi deec, “Ngeni yaka imoc nearu mehagec.” <sup>19</sup>Yesungo ifi dema ngicngac habutoa kpindzinu matacgecdeac edeyunuec. Edeyunuma ic sogong marimong nga kondungyang yohockang, imoc mema kiwa fiu kurumennu enu yaka keneheec. Kenehema ic sogong imoc tuema medacfora yemmeu yeneng imoc mema ngicngac habutoa yemmegec negec. <sup>20</sup>Nga yeni sasawango negebec amma yaka tosea neti anggec tarec, imoc kpedzucnegec kemema sakac 12 wakeec. <sup>21</sup>Ngicngac yaka negec, ngic yeneac kpete imoc 5 tauseng isoc. Nga ngacnambarac yeneac kpetengina imoc mong mi megec.

<sup>22</sup>Yesungo medacfora sueyunuu yeni gombau emma dzohong nobogeng waraigecdeac kenggec. Kemmagec ye yengenaoc kecma ngicngac habutoa faiyunuu <sup>23</sup>kendacgec. Kendacgec ye numuudeac tikiu enu ama toforeu tembuha tarec. <sup>24</sup>Taru gombango dzohong dzongiau kensikemanu firangngo kenggecfusing hama siri kpema gomba mekemmeha anec. <sup>25</sup>Ifi anu ama wereckembesonga ammanu Yesungo dzohong witiau titi medacfora yenearu kenec. <sup>26</sup>Ye dzohong witiau titikenu medacfora yeneng hemma yofi degec, “Wosongango hade.” Ifi dema kengec amma arohogec. <sup>27</sup>Arohogec Yesungo negemma imohaingoc yofi edeyunuec, “Ngeni wosongina makiu, imoc ni, ngeni mi kengecgunuu.”<sup>m</sup>

<sup>28</sup>Ifi deu Petorongo meremma deec, “Kebu, ge geanggaoc hanec isoc, ni doku witiau tima tima gearu habadeac edenuna.” <sup>29</sup>Ifi deu Yesungo deec, “Ge hana.” Ifi deu Petoro ye gombaunac mama doku witiau tima Yesuaru kenec. <sup>30</sup>Kemmanu firangtoa kpeu hemma kengec amma ine dokuu kemema kpacma deec, “Kebu, ge meficnuna.” <sup>31</sup>Ifi deu Yesungo maria bic sinema Petoroac mari mema miacma yofi edeec, “Ngic negen negensingga kapia, ge nocac negengyohoc andang?” <sup>32</sup>Ifi deu gombau emmaec imohaingoc firang kpac anec. <sup>33</sup>Anu gombau tacgec, yeneng Yesu dengerema yofi degec, “Foracngoc, ge Anutuac Medac.”

---

<sup>m</sup> 14:27 Grik yoacfu ye “Ego eimi.” deec. Imocac titiha yohockang, “Imoc ni.” me “Ni kecduaengoc.” Imoc Anutuac kpara mong Anutuac angerongo Mose edeec.

<sup>34</sup>Anu yeni dzohong ferecge ma Genesarete bange cfu kensikegec.  
<sup>35</sup>Kensikemagec bangec imocac ngic yeneng Yesu bic hensima yoac imoc faige c bangec imohai yerecgeu yeni ngicngac hafeinginagoc yearu meyunudacma hagec. <sup>36</sup>Hama hafeinginagoc yeni ngakpia susiaac witihasac kpeseregecdeac derecgegec. Amma kpeseregec, yeni sasawango ngereedacgec.

**15** <sup>1</sup>Mitiac negen negengngic nga farisaio yeneng Yerusarennac Yesuaru hama degec, <sup>2</sup>“Medacfo cga yeni nocac bange cfocnina nga esangabofocnina yeneac singyoac kpema maringina mi dzuacma yaka menec angandae?” <sup>3</sup>Ifi degec yeng yofi deec, “Ngeni nocac Anutuac dedeseriyoac kpema ngenang singyoac waraima modacandae.”  
<sup>4</sup>Anutungo yofi dede,

“Ge nonggo manghocga seseheyurubesena.” Nga “Ngic mong nonggea me mamaac sowecyoac deude, ye homebeso.”

*(Makekeng 20:12; 21:17; Sesememe 20:9; Dedeseri 5:16)*

<sup>5</sup>Ngeni ine yofi deandae, “Mongngo nonggea me mama edema yofi deude, ‘Neng wiac goa gemma nanggegubai dede imoc bic Anutuac sese dedua.’ <sup>6</sup>Ye ifi dema nonggo manghora mi seseheyuruude. Ifi amma ngeni singyoacngina kpbanggema Anutuac yoac semegecde. <sup>7</sup>Ikcngic, ngeneacnoc profete Yesaiango kpefing dema fora yombong yofi deec,

<sup>8</sup>‘Ngichabu yomoc yeni enacbibicngo sesehenuandae nga herenginango ine neac hereau kecdae. <sup>9</sup>Nga yeni kpoukpou ngicngac kpouyemmeandae imoc ngicac singyoacsac edekpou ayemmeandae amma eng dengerenugec hema fora kpac angkecde.’”

*(Yesaia 29:13)*

<sup>10</sup>Anu Yesungo ngicngac kpacyunuu hagec yoac yofi dema edeyunuec, “Ngeni kedzac kpema negentegecbisia. <sup>11</sup>Enacfusing wiac kemedede, imocngo ngic ubahere mi heidzadzu kpeude. Nga wiac hereninaunac nga enacfu ereande, imocngo ine ngic ubahere heidzadzu kpeude.”

<sup>12</sup>Anu medacfora yeneng yearu hama edegec, “Farisaio yeneng yoac imoc negemma negemmangang meficgegec, ge imoc negennec me?”

<sup>13</sup>Ifi kpesimigec yeng yofi deec, “Kurumeng Mannango iwai mong mi homerec, imoc godeagoc kpedzige cde. <sup>14</sup>Ngeni imocac wayunugec. Yeni yenaoc kicpisc amma kicpisc yeneac enara kecdae. Amma kicpisc mongngo kicpisc ogea wangerudeu, yeri yerahafoc tennu kemeyuruude.”

<sup>15</sup>Deu Petorongo kpesimiec, “Yoa c heidang, imocac hania dena negenni.” <sup>16</sup>Ifi deu yeng yofi edeyunuec, “Ngeni negen negentegecngina kpac isoc kecdaengoc. <sup>17</sup>Wiac enacfusing kemeande, imoc sasawango herenginac kemema isinggeu keractennu kemeude. Ngeni imoc mi negentegecdae me? <sup>18</sup>Nga wiac enacfusing ereande, imocngo ine ubahereunac erema ngic ubahere heidzadzu kpeude. <sup>19</sup>Ubahereunac wiac yofia ereande, negen negeng magana nga ewekpekpe amma kaisero faka



nga eweeneng mewa amma hamangec faka nga ikoc yoacfu faifaiyunu amma desureyoac. <sup>20</sup>Faka imocngo ngic ubahere heidzadzu kpeude. Nga ngeni maringina mi dzuacma yaka eng negecde, faka imocngo ine ngic ubahere naric mi heidzadzu kpeude.”

<sup>21</sup>Yesungo Genesarete bangec wama Tiro nga Sidong bangec, imohai kenec. <sup>22</sup>Kemmanu imohacnac Kanaang yeneac arenunac ngac mongngo hama Yesu kpacambic ammima deec, “Kebu, Dawidiac bangeha, ge neac ubaga manganeu, hadehadengo naroanna memanganeande.”

<sup>23</sup>Deu Yesungo yoac turunga mong mi merenu medacfora yeneng hama igockema degec, “Ngac ye ngadeninau homac kpacdeac suena kenu.” <sup>24</sup>Ifi degec, yeng yoac yofi merenec, “Ni Israe amaarenggac rama sufu sufuya kecdae, yeneac amma mayai.” <sup>25</sup>Anu ngacngo ine hama Yesuac fafoc heimima deec, “Kebu, ge meficnuna.” <sup>26</sup>Ifi deu yofi edeec, “Nambarac yeneac yaka wangecyunuma kasi yenearu ukuyemmeyemme, imoc faka gombunga mi ande.” <sup>27</sup>Ifi deu ngac ye serima deec, “Kunenna, imoc naric denec. Nga kasi yeni ine mingingfocnginango yaka kisicikegec tebo bageau mau imocsac neandae.” <sup>28</sup>Ifi deu Yesungo meremma ngac yofi edeec, “Ngac, negen negensingga imoc engena yombong. Negen negenggau negendang, ifi fingecgende.” Ifi demanu naso imohaingoc naroanga ngereec.

<sup>29</sup>Anu Yesungo amabangec, imoc wama Gariraia dzohong tegiau kemma tikiu emma ihai tarec. <sup>30</sup>Tacmanu ngicngac habutoa kuneng yombong hama ngicngac hanimangang nga puring amma kicpisis nga yoacngina kpac amma ngicngac homac ifia meyunuma hagec. Hama Yesuac hoannu faiyunugec yeng mengereyunuec. <sup>31</sup>Mengereyunuu ngicngac yoacngina kpac, yeni yoac degec nga puring yeni ngeregec amma hanimangang yeni sing tigece nga kicpisis yeni kic figec. Ifi anggec ngicngac yeneng imoc hemma kerecgec amma Israeac Anutu dengeregec.

<sup>32</sup>Anu Yesungo medacfora kpacyunuu hagec yofi edeyunuec, “Ngicngac habutoa yomoc yeni yakangina kpac uameme harebec bic nigoc kecdauc yeneac ubana manganede. Yeni sinnu kemma kicgigi ayemmebac herenginaac homemagec naric mi sueyunubade.” <sup>33</sup>Ifi deu medacfora yeneng meremmigec, “Nenang yei bangec kisiu kecma yaka dahacnac meni ngicngac habutoa kuneng yomocac kpetenginasoc anude?” <sup>34</sup>Ifi degec Yesungo yofi kpesiyemmeec, “Ngeni ic sogong dafigec mekecdae?” Kpesiyemmeu degec, “Ic sogong seweng nga kondungyangbisis bisic goa.” <sup>35</sup>Degec Yesungo ngicngac habutoa bangecfu matacgecdeac edeyunuec. <sup>36</sup>Edeyunuu tacgec, yeng ic sogong nga kondungyang mema ubangerec dema tuema medacfora yemmeu yeneng mederema ngicngac habutoa yemmegec negec. <sup>37</sup>Yeni sokoma nema negebec andagec yaka tosea neti anggec tarec, imoc kpedzucnegec kemema sakac 7 wakeec. <sup>38</sup>Nga yaka negec, ngic imoc yeneac kpetengina 4 tauseng nga

ngac nambarac yeneac kpete imoc mi memea. <sup>39</sup>Yesungo ngicngac habutoa sueyunu kengha anggec ye gombau emma Magadang bangecfu kenec.

**16** <sup>1</sup>Farisaio nga sadukaio yeni Yesuaru kemma yeac kuha isinggegecdeac negenggec. Ifi negemma ye faka furia mong kurumennunac meu fingeru edzacyunuudeac kpesimigec. <sup>2</sup>Kpesimigec Yesungo meremma yofi edeyunuec, “Ama marai anu ngeni deandae, ‘Amabangec sacsac andeac wereckenu naso gombunga anude.’ <sup>3</sup>Nga asoac yacma deandae, ‘Amabangec sacsac amma kundung kpedeac kiafirang kpeude.’ Ngeni sawau faka fingecande, imoc gombunganoc isinggeandae nga nasoac soi fingecande ngeni imoc ifingoc isinggegec ngereebac. <sup>4</sup>Ngicngac areng yomoc ngeni manganameme nga seroareng amma ngeni kucfaka mong henggecdeac kpesiandae. Imocac ngeni faka kuhagoc mong mi ngemmengemeea. Yonaaru kucfaka fingerec, ngeni faka imocfiasac henggecde.” Ifi dema wayunuma kenec.

<sup>5</sup>Yesuac medacfora yeni yegoc dzohong noboc kenggec. Kembeso ic sogong nigecyunuu engsac kenggec. <sup>6</sup>Kensikema Yesungo yofi edeyunuec, “Ngeni farisaio nga sadukaio yeneac yis henghomema kecbisia.” <sup>7</sup>Deu medac yeni yenaocngoc denegeng amma degec, “Nenang ic sogong mi mema hading, imocacnoc ifi dede.” <sup>8</sup>Ifi degec yeng bic negengyemmema deec, “Ngeni ngic negen negensingngina kapianec, ngeni ngenaocngoc ic sogong mi mehadauac denegeng andae, yoac imoc wagec. <sup>9</sup>Ngeni negen negentegecngina kpac. Ic sogong 5ngo ngic 5 tauseng sokoyunudaru sakac dafiguc mewakegec, imoc mi nigecngunubeso. <sup>10</sup>Amma ic sogong 7ngo ngic 4 tauseng sokoyunudaru sakac imoc dafiguc mewakegec, imoc ifingoc negensibisia. <sup>11</sup>Ni ic sogonggac mi dedua. Ngeni farisaio nga sadukaio yeneac yis, imocac henghomema kecgceac dedua nga ngeni imoc mi negentegecdau.” <sup>12</sup>Ifi edeyunuma yeni ic sogonggac yis garengeme kecgceac mi deec, imoc negentegecgec. Yeni farisaio nga sadukaio yeneac kpoukpouyoac, imocac garengemema kecgceac ine deec.

<sup>13</sup>Yesungo Firipi bangecac Kaisarea taong mewegenema medacfora yofi kpesiyemmeec, “Ngicngac yeni Ngicac Medac yeac merac deandae?” <sup>14</sup>Ifi deu degec, “Ngic goango Yohane dokunadzic deandae nga goango Eria amma goa yeneng ine Yeremia me profete mong deandae.” <sup>15</sup>Ifi degec yofi deec, “Nga ngeni ngenaoc ine neac merac deandae?” <sup>16</sup>Kpesiyemmu Simong Petorong deec, “Ge Messia, Anutu kekehagoc yeac Medac.” <sup>17</sup>Ifi deu Yesungo yofi edeec, “Simong, Yonaac medac, yoac imoc ngic dedeunac mi dedang, imocac ge kenecgagoc. Manna kurumennu kecde, yennoc imoc mekperagima edeguu dedang. <sup>18</sup>Neng ifingoc edeguba negenna, ge Petoro,” anu hoc yomocac witiau<sup>o</sup> kpebungtoana faibade. Nga imocngo serima nanu homec amaac nagungo naric mi hepatanggeude.

<sup>n</sup> **16:18** Petoro imocac titiha, hocbisis. <sup>o</sup> **16:18** Yesu ye yengenaac negemma “hoc yomocac witiau kpebungtoana faiba.” ifi deec.

<sup>19</sup>Ni kurumeng eucererenggac ki gamba geng bangecfu iwai sasawa dzezenade, imoc kurumennu ifingoc dzege dzegea fingerude. Nga ge wiac bangecfu yungecdacnade, imocngo kurumennu ifingoc yungec yungec fingerude.” <sup>20</sup>Ifi dema medacfora yeneng Yesu ye Messia, imoc ngic mong mi edeyunugecdeac deracyunuec.

<sup>21</sup>Naso imohai hanahema Yesungo medacfora yofi edeyunuec, “Ni Yerusarennu kamba yudangic enarafocngina nga womong gareng enara amma mitiac negen negengngic yeneng kpendzengtoau fainuma nuhomegecde. Anu uameme harebec ammanu monggoc gborima yacbesare.” Faka imoc fingerudeac deec. <sup>22</sup>Ifi edeyunuu Petorongo Yesu ngadeau wangep kemma tembucfu namma dekpetari ammima deec, “Anutungo meficgumanu faka imocngo gearu naric mi fingecgembeso.” <sup>23</sup>Ifi deu Yesungo dzigenema Petoro yofi edeac, “Satang, ngadenau hakenna, ni memanunadeac negennec. Ge wiac negennec, imoc Anutuarunac kpac, imocngo ine ngicac negen negeng ande.”

<sup>24</sup>Ifi dema medacfora yofi edeyunuec, “Mong ye ni modacnubeso negendeu ye yengena ubasebiaac songo memama mariponga miacma tofohoma modacnubeso. <sup>25</sup>Ngic mong ye kekeha segereudeac negemma uaya mekecde, ye kekeha sufumiude. Nga mong ye neac amma kekeha waude, ye kekeha fingecmiude. <sup>26</sup>Imocac amma ngic mong ye bangectoa bangep yomocac finac sasawa meficgema yengena kekeha ukuu sufuude, wiac imocngo memefihagoc naric mi anude. Amma mong ye kekeha monggoc meudeac negenside, ye imoc bummemeac osiude. <sup>27</sup>Nga Ngicac Medacngo Mamaarunac kuc nga kibikperagiagoc angerofora yenigoc hama ngicngac sasawa angammemengina angandae, imocac sirihau turunga kpouyemmeude.

<sup>28</sup>Foracngoc, ngic yomoc nandae, ngenearunac goa mi homemagec Ngicac Medacngo eucererengagoc hau kicnginango henggecde.”

**17** <sup>1</sup>Uameme 6 wisickemanu Yesungo Petoro nga Yakobo amma munea Yohane hesicyunuu tikitoa herea monnu emma tembucngina kecgec. <sup>2</sup>Ihai kecmagec Yesuac sebia kicnginau heimerenec. Heimerenu kicmesuya imoc wenac isoc anec nga ngakpikporuha imoc kongac kpema ama meaiu kperagia fingecande, ifi isoc anec. <sup>3</sup>Ifi ammanu Mose nga Eria yereng imohaingoc fingecyemmema yegoc denegeng anoc. <sup>4</sup>Nga Petorongo Yesuac deec, “Kebu, nenang yei kecni songea andeac ge negenna naric anu bedzo bedzo harebec meba. Geac mong nga Moseac mong amma Eriac mong.” <sup>5</sup>Anu Petorongo ifi denammanungoc hoeng mong kperagiagocngo mama semeyunumanu hoeng manaunac yoacudumeng mong yofi kpacma deec, “Yomoc neac Songomedacna, ye hensongo ammiduae. Ngeni yeac yoac negembisia.” <sup>6</sup>Nga medac yeni imoc negemma kengec ebiria amma bangecfu makpema kicmesungina sufugec. <sup>7</sup>Ifi anggec Yesungo yenearu kemma midiyunuma

yofi edeyunuec, “Ngeni yacgec, kengec mi anggec.” <sup>8</sup> ifi deu yeni kicngina fima ngic mong mi henggec, yeni Yesu yengenasac nanu henggec.

<sup>9</sup> Anu tikiunac mama Yesungo deracyunuma yofi deec, “Ngeni onga hendau, imocac ngic mong mi edeyunubisia. Kecma Ngicac Medacngo homecfunac gborima yaruguc ine edeyunubisia.” <sup>10</sup> ifi deu medacfora yeneng kpesimigec, “Mitiac negen negengngic yeni dafiac Eriango waraima haudeac deandae?” <sup>11</sup> ifi degec yeng yofi edeyunuec, “Eriango warai hama wiac sasawa memengere anudenoc.” <sup>12</sup> Ni yofi edengunuba negenggec, “Eria ye bic hau yeni mi hensima yenang songo modacma faka hania hania ammigec. Nga yeni Ngicac Medac ifingoc kpendzenu faigec kpendzeng kpeude.” <sup>13</sup> Ifi deu medac yeni Yohane dokunadzicac deec, imoc bic irickegec.

<sup>14</sup> Anu yeni tikiunac mama habutoa yenearu kensikemagec ngic mongngo Yesuaru hama fafoc heimima deec, <sup>15</sup> “Kebu, ge medacnaac ubaga manganeu. Ye afonasoya hau kpendzeng ebiria kpema naso homac gerecfu nga dokuu kemeande. <sup>16</sup> Nga medacna geac medacfocga yenearu mekemba yeneng ye mengeregecdeac obohoma wadau.” <sup>17</sup> Ifi deu Yesungo yofi deec, “Ngicngac areng yomoc ngeni negen negensingngina kpac yombong amma ngeni fakangina sicsauha. Ni naso herea ngenigoc monggoc tacbadeac modzona tide. Ngeni medac nearu mehagec.” <sup>18</sup> Deu mehagec Yesungo hadehade ngabayoac seria edeu ye medac imoc wama kenec. Kenu naso imohaingoc medac imoc ngereec.

<sup>19</sup> Ifi anu medacfora yeneng Yesuaru hama tembucngina tacma kpesimigec, “Neni dafiac hadehade imoc kporacbibieding?” <sup>20</sup> Kpesimigec Yesungo yofi merengyemmeec, “Foracngoc, ngeni negen negensingngina kapiancec sac fedecac obohoma wadau. Ngeni negen negensingngina mastet gbomea<sup>p</sup> isoc fengemmu debac ngeni tiki yomoc naric edegecde, ‘Tiki, ge yomohacnac yacma edimoc kenna.’ Ifi edegec ye kenude. Nga ngeni wiac monggac naric mi obohogecde. <sup>21</sup> Hadehade ifia yakasege kecma nunumungosac kporacbesonga.”

<sup>22</sup> Yesu nga medacfora yeni yenhafoc Gariraia bangecfu kpedzucnema kecmagec yeng yofi edeyunuec, “Ngic yeneng Ngicac Medac kererema ngicngac yeneac mariu faigecde, imocac naso wegenede. <sup>23</sup> Faigec yeneng ye mema kpegec homeude. Homema uameme harebec ammanu homecfunac monggoc gborima yarude.” ifi deu yeni ubaebic kuneng megec.

<sup>24</sup> Anu Kafanaung taonnu kensikemagec Anutuac womonggac takesimemengic yeneng Petoroaru hama kpesimigec, “Ngenec kpoukpou ye womonggac takesi faiande me kpac?” <sup>25</sup> ifi degec Petorongo deec, “Oc, faiande.” Ifi dema amau emma yoac mi demanu Yesungo

<sup>p</sup> 17:20 Mastet gbomea imoc homong gbomea isoc kapia yombong.

kpesimiec, “Simong, ge dafi negennec, bangeha bangeha ngictaungina, yeni takesi meracarunac meandae? Yeni yenang medacfocongina, yenearunac me ngicngac goa yenearunac meandae?” <sup>26</sup>Kpesimiu deec, “Yeni ngicngac goa yenearunac meandae.” ifi deu Yesungo yofi deec, “Ifiac amma medacfora yeni takesi mi faifai eng kecgecde. <sup>27</sup>Nga yeni neranggac negemmangang mi anggecdeac amma geng ine dzohong tegiau kemma kondungyang memeac hawic mong ukuna. Ukuma kondungyang waraima menade, imocac enara mekpacgema siriwadzo mong meficgenade. Meficgema dzo imoc mema neac nga geangga kpacfu takesimemengic yemmebesena.”

**18** <sup>1</sup>Naso imohai medac yeneng Yesuaru hama kpesimigec, “Kurumenggac eucerereng, imocac arennu merang kuneng kecde?” <sup>2</sup>Ifi kpesimigec Yesungo nambarac yenearunac mong kparec. Kparu kenu ye botucnginau faiu nanu yofi deec, <sup>3</sup>“Foracngoc, ngeni ubangina mi merenggecde amma nambarac yeni isoc mi anggecdeu kurumenggac eucererennu naric mi enggecde. <sup>4</sup>Imocac ngic mong ye memaemema medac yofia, yeac siricfu kefude, yeng kurumenggac eucererennu kuneng kefude. <sup>5</sup>Nga mong ye nambarac yenearunac mong yofia neac kpacfu hoanggeude, yeng ni hoannuude.

<sup>6</sup>Nga nambarac kapia yenearunac mong ni negensinnude, ye mongngo ngombonggeu sing segeudeu faka yomocngo yearu ngereebac. Ye yagucnoc dzamandzingtoa ubiau ubahemima kondung keme kemeau ukugec kemebac. <sup>7</sup>Bangectoa bangec yomocac ngic manganaac ngombonggema ogofocngina kopocsicfu faiyunuandae, yeni sowecnginagoc. Nga faka imoc fingerude, amma ngic mong ye faka imoc fingerudeac ngombonggeude, ye ebihagoc. <sup>8</sup>Ge haniga me mariga mongngo anggenu kopocsic meficgenadeu geng imoc herecgema ukuna kembeso. Hanimariga hangoangoc kecma gerec wisic wisickea kpac, imohai ukugugec kembanggac, hani mangang me hanimariga tegeg tegera kecma kekecseriu ennade, imoc ine ngereeude. <sup>9</sup>Me kicga mongngo anggenu kopocsic meficgenadeu geng kicga meickema ukuna kembeso. Ge kicga yohockangoc kecma hofeac gerecfu ukugugec kembanggac kicga nobohagocsac kecma kekecseriu ennade, imoc naric anude. <sup>10</sup>Ngeni nambarac kapia, yenearunac mong ubango mi ukubisia. Ni edengunuba negenggec, nambarac yeneac angerofocngina kurumennu kecdae, yeni nasosoc Manna kurumennu kecde, yeac kicmesuya hengkecdae. <sup>11</sup>Nga Ngicac Medacngo ngicngac sufu sufuya, yeni ebicfunac kpedzucyunuma meyunuudeac maec.

<sup>12</sup>Ngic mong ye ramafora 100 mekecde, imohacnac mong kemma sufuu yofi anude. Ye ramafora 99 tikiu wayunuu nanggec kemma sufudacmoc, imocnoc hoforude. <sup>13</sup>Hofockecma meficgema yeac ubangerec kuneng negenude. Nga 99 mi sufugec, yeneac ubangerec negengande, imoc

ferahema sufuec, yeac ubangerec kuneng negenude, imoc fora yombong. <sup>14</sup>Nga Mangngina kurumennu kecde, yeng ifi isocngoc areng kapia yomoc, yenearunac mongngo mi sufuudeac negemma kecde.

<sup>15</sup>Ogoga mongngo gearu kopocsic meficgeudeu ge kenna yegoc tembungira tacma imoc deficgemina. Nga yeng yoacga negenudeu ge firang anna ye geac ogoga monggoc anude. <sup>16</sup>Nga ye yoacga mi negenudeu geng ine ngic mocgu me yohockang meyruruna ngenahafoc ebic imoc mengeregecdeac tacbisia. Ifi amma ngic yohockang me harebec dede sasawa demeseri ambisia. (*Dedeseri 19:15*) <sup>17</sup>Nga ye yoacngina mi negenudeu ngeni ine kemma kpebung edeyunubisia. Edeyunugec yeng kpebung yeneac yoac ifingoc waudeu ine ngic imoc henggec ye ngic Anutu mi negemmidae nga takesimemengic, yeni isoc ambeso. <sup>18</sup>Foracngoc, ngeni bangecfu wiac sasawa dzegegecde, imoc kurumennu ifingoc dzege dzegea feude. Nga ngeni bangecfu wiac yungecdacgecde, imoc kurumennu ifingoc yungec yungera feude. <sup>19-20</sup>Imoc yofiac, yei bangecfu ngicngac yohockang me harebecngo neac kpacfu kpeturanggema tacgecdeu ni botucnginau kecbade. Imocac ngenearunac yohockangngo uba mocgu amma wiac monggac me monggac kpesiecdeu Manna kurumennu kecde, yeng negengngecmema imoc ngemerude.”

<sup>21</sup>Anu Petorongo Yesuaru hama kpesimiec, “Kebu, ogonango nearu kopocsic meficgeudeu naso dafiguc kopocsiha wabadeac negennec? Atac 7 soha ande me?” <sup>22</sup>ifi deu Yesungo yofi meremmiec, “Atac 7 kpac, atac 70 namma ende imocac deduae. <sup>23</sup>Imocac kurumenggac eucerereng imoc ngictau mong ngic homac mingingngina kefec, ye isoc. Nga yeng wanacngic yeni yearu turungngina kpougecdeac nasoya faiec. <sup>24</sup>Faiu hagec turungnginaac ising ising ua hanaheu ngic mong ye turunga kifa 150 tausenggac uabung, imocacsoc feec, ngic imoc yearu mehagec.”<sup>q</sup>

<sup>25</sup>Nga ye turunga imoc kpoudeac obohoma minginango edeu yengena nga enemmedacfora minging monggaru sueyunuma wiara sasawa suedacma, imocngo dzo kirecgeu turung imoc kpac anudeac deec. <sup>26</sup>Ifi deu wanacngic ye imoc negemma minginaac kicfu makpema deec, ‘Kunenna, ge neac ubaga manganeu tomaina kecmanna turunna kpoudacbade.’ <sup>27</sup>Ifi deu minginango yeac ubea manganeu yoara nga turunga momoc waec.

<sup>28</sup>Anu wanacngic ye ngadeau kemeec. Kemema ine wanacngic ogea mong yearu turunga uameme 100ac uabung<sup>r</sup> feec, ye meficgeec. Meficgema ye mendanggema ubea mendzicma deec, ‘Neac turunna gearu fede, imoc bic kpounendacna.’ <sup>29</sup>Ifi deu wanacngic ogeango imoc negemma yeac kicfu makpema desambic ammima deec, ‘Ge neacnec

<sup>q</sup> **18:24** Yesu ye 10 tauseng tarantong deec. Tarantong imoc dzotoangina anec. Nga 10 tauseng imoc kpetetoangina anec. Imocac witaui mi osogec. <sup>r</sup> **18:28** Ye 100 denari deec.

ubaga manganeu tomai kecmana turungga imoc ngade kpoubade.’<sup>30</sup> ifi deu ogeango yeac yoac wama turunga kpoudacmaguc maudeac mekemma witicamau faiu tarec.<sup>31</sup> Taru wanacngic ogofocngira yeneng faka imoc hemma ubangina homac manganeu negenggec naric mi anec. Nga yeni kemma faka fingerec, imoc sasawa mingingngina edegec.<sup>32</sup> Edegec mingingnginango wanacngic imoc deu hau edeec, ‘Ge wanacngic mangac manganea. Geng desambic anenna turungga sasawa wadua.<sup>33</sup> Nga neng geac ubana manganeu turungga wadua, ge ifi isoc wanacngic ogogaac ubaga ifingoc manganeu turunga wabanggacsoc.’<sup>34</sup> Ifi dema minginango herebu negemma ngaba ammima witicamagareng yeneac mariu faiec. Faiu wanacngic ye turung imoc sasawa kpoudacmaguc maudeac deec.

<sup>35</sup> Anu ngeni sasawango ogofocngina tembus tembus yeneac kopocsic ubaherenginango yombong mi wagecdeu Manna kurumennu kecede, yeng siriha ifingoc ngeni angemmeude.”

**19** <sup>1</sup> Yesungo yoac imoc dedaru wisickeu Gariraia bangec wama Yudaia bangecfu Yodang nobocgengau kenec. <sup>2</sup> Kenu ngicngac habutoa kuneng yombong ye modaceg yeng ngicngac hafeinginagoc mengereyunuec.

<sup>3</sup> Anu farisaio yeneng yearu hama faitobannu faigecdeac kpesimigec, “Ngic ye enema wiac hania haniaac amma waude, singngo imoc dede me?” <sup>4</sup> Ifi degec Yesungo meremma yofi edeyunuec, “Fingec fingec minginango hanahema deu ngic nga ngac anecde, ifi meficyuruec. Ngeni imocnoc osonegeng angandae. (*Fingec fingec 1:27; 5:2*) <sup>5</sup> Ye meficyuruma yofi deec, ‘Imocac amma ngic ye nonggomama wayuruma enemaaru kpeketaheu yegoc sebi mocgu anecde.’ (*Fingec fingec 2:24*) <sup>6</sup> Ifi anecdeac yeri yohockang monggoc mi andape, kpac. Yeri sebi mocgu anecdeac yofi ande, Anutungo wiac dzegeec, imoc ngicngo naric mi herecgebeso.”

<sup>7</sup> Deu degec, “Nga dafiac Mosengo dedeseri yofi nemmeec, ngic mongngo ngac wawa kibi ohoma ngac miu ngac ye wau kembeso?” <sup>8</sup> Ifi degec Yesungo yofi deec, “Ngeni ngic ubaseri nga herengina dzege dzegea, imocac Mosengo enengfocngina wayunugecdeac kpae mi heiec. Nga hanac hanaheaunac ereec sing ifia mong mi feec. <sup>9</sup> Ni ine yofi edengunuba, ngic mongngo enema serofaka mi ammanu ye eng wama ngac mong meude, ngic imocngo serofaka anude.”

<sup>10</sup> Ifi deu negemma medacfora yeneng degec, “Eweeneng yereac botucfu faka ifia fedeu eweeneng kecec kecnide, imoc gombunga yombong kpac.” <sup>11</sup> Ifi degec Yesungo yofi edeyunuec, “Yoac yomoc goa yenearu mi heiude. Yoac imoc ngic yemmeyemlea yenearusac heiude. <sup>12</sup> Ngic goa yeni nonggo heremanaunac kufing fingecgec. Nga goa yeni ngicngo faka ayemmegec kufing anggec amma ngic goa yeni kurumeng eucererengac amma kufing isoc kecandae. Ngic mong ye yoac imoc yearu heide, yeng imoc mebeso.”



<sup>13</sup>Anu ngicngac yeneng nambaracfocongina kapiabisic Yesuaru meyunu kemma negenggec, “Yeng mariango nambarac witinginau faima numuyemmeude.” ifi anggec medacfora yeneng kpetariyemmegec. <sup>14</sup>Yesungo ine yofi deec, “Nambaracbisic bisic yeni nearu naric hagec. Ngeni kpae mi heiyemmegec. Kurumenggac eucerereng imoc nambaracbisic bisic yofia yeneac.” <sup>15</sup>Ifi dema maria witinginau faima kenecyunu wisickeu ye amabangec imoc wama monnu kenec.

<sup>16</sup>Negenggec, ngic mongngo Yesuaru hama deec, “Kpoukpou, ni noc faka gombunga angkecma kekecseri mebai?” <sup>17</sup>Ifi deu yeng yofi deec, “Ge wiac gombungaac ni mi kpesinenna. Mocgungo gombunga kecede. Nga ge kekecseriu embesonga dema dedeseriyoacnina tofohobesena.” <sup>18</sup>Ifi deu deec,

“Dedeseriyoac damoc tofohobadeac denec?” ifi deu Yesungo yofi deec, “Ge ngicngac mi yunuhomesesena nga kaisero mi ambesena nga hamangec mi mebesena amma enacfu faifai mi ambesena. <sup>19</sup>Ge nonggo manghocga seseyurubesena amma geangga anggengande, siriha imocngoc ogofocga heresongogoc hoangyunubesena.”

*(Makekeng 20:12-16; Dedeseri 5:16-20; Sesememe 19:18)*

<sup>20</sup>Ifi deu sebigboringic yeng deec, “Ni imoc sasawa modacanduae. Nga noc wiacac monggoc kpedadangebade?” <sup>21</sup>Deu Yesungo yofi edeac, “Ge ngic dingingac hafoangoc kecbesonga negennec isoc, yofi anna. Kemma wiacga sasawa suedacma hiedzoga mema ngicngac makpekpea yemmebesena. Ifi anna kurumenggac dzofinac fingeccenu hama modacnubesena.” <sup>22</sup>Ifi deu sebigboringic ye dzofinaha homac femieccac yoac imoc negemma ubaebic mema kenec.

<sup>23</sup>Kenu Yesungo medacfora yofi edeyunuec, “Foracngoc, ngic mong dzofinactogoc, ye kurumenggac eucererennu enudeac ambibieude. <sup>24</sup>Amma monggoc deba negenggec, kamerengo bungic singau engeng, imoc ua efea nga ngic dzofinacgoc yeng Anutuac eucererennu engeng, imocngo ine uatoayagoc.” <sup>25</sup>Ifi deu medac yeneng yoac imoc negemma kpidohoma kerecgec yombong amma degec, “Ifi anu merang naric komoc kpeude?” <sup>26</sup>Ifi degec Yesungo yenemma yofi deec, “Ngic ngeni imoc obohoma wagecede nga Anutungo wiac sasawa naric meude.” <sup>27</sup>Ifi deu Petorongoc deec, “Negenna, neni wiacnina sasawa wadacma modacguma kecdimbe. Imocac neni noc wiac menide?” <sup>28</sup>ifi deu Yesungo yofi edeac, “Foracngoc, kecma wiac sasawa gboria fingerude, naso imohai Ngicac Medacngo kurumenggac kuc nga kibikperagiaac ngictautatahau tarude. Nga ngic modacnuandae, ngeni ifingoc ngictautatac 12 imohai tacma Israeac kisc 12, yeneac fakangina isinggema desigeccede. <sup>29</sup>Nga ngicngac kpacnaac amma amafocngina me dacmunafocngina me nonggo mangfocngina me nambaracfocongina me bangecngina wagec, ngeni

sasawango wiac imocac naso 100 monggoc megedce nga kekecseringo maridzomingngina ambesande. <sup>30</sup>Ngic warac warac kecandae, yenearunac ine homacngo ngadea anggedce nga ngadea kecdae, yenearunac homacngo warac warac anggedce.”

**20** <sup>1</sup>“Kurumenggac eucerereng imoc ngic mong amabanghagoc, siriha imocacsoc. Ye asoacngoc kemma ngic waing uayau ua megedceac ngic yagura meyunuec. <sup>2</sup>Meyunuma ua ngic yagura yeni uameme mocguac dzo ifiasoc megedceac denegeng amma uba mocgu amma sueyunuu uau kenggec.<sup>3</sup>

<sup>3</sup>Nga 9 kiroc ammanu waing ua minginango ngic goa kpedzaroc sobennu eng nanggec yenemma <sup>4</sup>yofi edeyunuec, ‘Ngeni ifingoc waing uanau kemma ua megec, imocac siriha dzo ngemmede.’ <sup>5</sup>Ifi deu yeni waing uayau kenggec. Nga ye 12 kiroc nga 3 kirocfu faka imocngoc anec. <sup>6</sup>Nga 5 kiroc anu ye monggoc kemma ngic goa ifingoc eng nanggec meficyunuma yofi edeyunuec, ‘Ngeni nocac eng nanggec ama marai ande?’ <sup>7</sup>Ifi deu degec, ‘Ngic mongngo uayoac mong mi denemmedac.’ Ifi degec yofi edeyunuec, ‘Ngeni ifingoc kemma neac waing uau ua mebisia.’

<sup>8</sup>Ama marai anu ua minginango ua gareng yofi edeac, ‘Ge yagurangic kpacyununa hagec uaac bung yemmena. Amma ngic wisic wisickea hagec, yenearunac hanahema yemmekengkecna waraima hadau, yenearu wisickebeso.’ <sup>9</sup>Ifi deu ua garengngo ngic 5 kiroc hagec, yeni hanahema ua meme mocguac bung, ifi yemmeec. <sup>10</sup>Yemmeu ngic waraima hagec yeneng negenggec, ‘Ye dzo meemma nemmeude.’ Nga ua garengngo dzo kpetea imocngoc yemmeec. <sup>11</sup>Yemmeu yeni dzo kpetea imoc hemma negenggec naric mi anu waing ua mingina <sup>12</sup>edegec, ‘Ngic yomoc yeni ngade yombong hama aua mocgusac ua megec. Nga neni ine asoacngoc hama uaac ebic hemma wenacfu namma meerekecni ama marai ande. Nga geng yenigoc siriha mocgungoc anemmedang.’ <sup>13</sup>Ifi degec yeng yenearunac mong yofi edeac, ‘Ogona, ni kopocsic mong mi meficgegendua. Negenna, nerang waraima uameme mocguac dzo ifiasoc deserima uba mocgu andic. <sup>14</sup>Ge imocac dzoga mema kenna. Nga neng ine yagurangic ngade hadau yeni bung socfungoc yemmedeac songona ande. <sup>15</sup>Ni neanna hiedzongo ifi me ifi ambesonga negemma imoc naric ambai. Amma fakana gombunga anu imocac negen negengga mi manganebeso.’ <sup>16</sup>Ifi isoc ngadea yeneng warac warac anggedce nga warac warac yeneng ine ngadea anggedce.”

<sup>17</sup>Yesungo medacforagoc Yerusarennu kembeso kemma sinnu tembucnginau yofi edeyunuec, <sup>18</sup>“Negendae, nenang Yerusarennu endimbe. Enni ngic yeneng Ngicac Medac womong gareng enara nga

---

\* 20:2 Yeni denari mocgu degec. Denari imoc Roma yeneac dzo monggac kpara. Yesuac nasou denari mocgu uameme mocguac bung anec.

mitiac negen negengngic, yeneac mariu faigecde. Faigec yeneng ye homeudeac desigecde. <sup>19</sup>Desima ye bangec monnunac ngic Anutu mi negemmidae, yeneac mariu faigecde. Faigec yeneng deendema ammima dzikacngo kpema sebia kpekperecge amma mariponnu kpegec homeude. Amma uameme harebec kemmanu homecfunac monggoc yarude.”

<sup>20</sup>Anu Dzebedaioac medahora nonggongirango meyuruu Yesuaru hagec. Hama Yesu fafoc heimima deec, “Ni wiac monggac naric kpesigembai me?” <sup>21</sup>Ifi deu deec, “Ge noc wiacac anggende?” Deu edeac, “Medachocna yomoc yereng eucererenggau mongngo foigau nga mongngo kanagau tarecde, imoc deserinenna.” <sup>22</sup>Ifi deu Yesungo yofi deec, “Ngeni wiac kpesidae, imocac hania mi negenghomedae. Nga neng kpendzenggac kpakenecfu nebeso anduae, ngeri imoc needeac dedape me?” deu deoc, “Oc, naric nedede.” <sup>23</sup>Yeri ifi deec Yesungo yofi edeyuruec, “Ni kpendzenggac kpakenecfu nebade, ngeri imocngoc neede. Nga ngic merang foinau me kananau tarude, imocac fora ine neng naric mi desibade. Mannango ngic tatic imohai tarecdeac bic mengereec, yereng ihai naric tarecde.”

<sup>24</sup>Anu medacfora 10 yeneng imoc negemma dacmunac yereac negenggec manganec. <sup>25</sup>Manganeu Yesungo kpacyunuu kenggec yofi edeyunuec, “Bangec monnunac ngicngac, yeneac ngictaufocngina ngicngac yeneac ngickuneng siricfu garengyunuandae. Nga ngicngac kunengfocngina yeni ngicngacfocngina yeneng yoacngina modagecdeac kuc feyemmede, ifinoc negengandae. <sup>26-28</sup>Nga faka ifia ngeneac botucfu mong mi febeso, kpac. Ngicac Medacngo ngicngac yeneng yeac kingang kpegecdeac mi maec, kpac. Yeng yeneac kingang kpema ngicngac homac ebicfunac yungecyunuma kekeha wau yeneac doudeac maec. Ifi isoc ngeneacunac ngic mongngo engena kecbeso ammide, yeng botucnginau kingang kpekpengina kecbeso. Nga ngeneac botucfunac warac warac ambeso ammide, yeng botucnginau wanacngicngina kecbeso.”

<sup>29</sup>Yesu nga medacfora yeni Yeriko taong wama kemmagec ngicngac habutoa kuneng yombong modacyunuec. <sup>30</sup>Nga sing tegiau kicpisc ngic yohockang taroc. Tarec ngicngac yeneng degec, “Yesungo hama kende.” ifi degec yeri imoc negemma kpacma deoc, “Kebu, Dawidiac bangeha, ge nereacnec ubaga manganeu.” <sup>31</sup>Ifi kperec ngicngac habutoa yeneng waickema tarecdeac kpetariyecmegec. Nga yeri ine monggoc seriangoc kpacma deoc, “Kebu, Dawidiac bangeha, ge nereacnec ubaga manganeu.” <sup>32</sup>Kparec Yesungo namma kpacyuruma yofi deec, “Ngeri noc wiac angecmebadeac negendape?” <sup>33</sup>deu deoc, “Kebu, neri kicnira tegerudeac negendipe.” <sup>34</sup>Deec Yesungo ubea manganeu mariango kicngira kpesereu yeri imohaingoc kicngira fima ye modaroc.

**21** <sup>1</sup>Yesu nga medacfora yeni Yerusareng mewegenema Betefage amabangec Oriwa tikiu tarec, imohai kensikema Yesungo

medahora yohockang yofi dema sueyuruec, <sup>2</sup>“Ngeri dindingac kemma guruama sing enarau tacde, imohai donggi mong bic meficgeecde. Ye medahagoc witickegec nande. Ngeri donggi imoc yungecyuruma nearu mehaec. <sup>3</sup>Nga ngeri ifi anec ngic mongngo ngeremma kpesingemerude isoc ngeri yofi edebesera, ‘Kebungo yerigoc ua meudeac dede.’ Ifi deec yeng donggi nonggomedac bic ngerigoc sueyuruude.”

<sup>4</sup>Profete yoac mong yofi deec, imoc fora anudeac ifi fingerec.

<sup>5</sup>“Ge Sionggac naroang yofi edebesena, ‘Henna, ngictauga hagende.

Ye donggiu hade, ye donggi medahaac witiau tacde nga ye fakaya memaemeemea.’” *(Dzekaria 9:9)*

<sup>6</sup>Nga medac yeri kemma Yesungo edeyuruec, ifi isoc anoc. <sup>7</sup>Ifi amma donggi medahagoc meyuruma hama ngakpingira herea hesima donggi nonggomedac yereac witingirau tiameoc. Tiameec Yesungo imocac witiau tarec. <sup>8</sup>Taru ngicngac habutoa nanggec, yeni ngakpingina hesima sinnu tiamegec nga goa yeni ic fawa icfunac herecge ma sinnu tiamegec. <sup>9</sup>Nga ngicngac habutoa kiwau kenggec nga ngadeau modacgec, yeneng kpacma yofi degec,

“Ohec waec, Dawidiac kiscifunac, ohec. Ngic Kebuac kpacfu hade, ye kenehagoc. Wi kurumennu kpara dengeregec, ohec waec, hosanna.” *(Mitiyegec 118:26)*

<sup>10</sup>Yesungo Yerusarennu enu taonggac ngicngac sasawa yeni kpidohoma kengha amma degec, “Imoc merak?” <sup>11</sup>Ifi degec ngicngac habutoa yeneng edeyunuec, “Imoc Yesu, profetenoc Gariraia bangecfunac Nadzarete taonnunac.”

<sup>12</sup>Anu Yesungo Anutuac womonggac oda manau emma ngicngac wiac emekpesi anggec, yeni imohacnac kporacyunuec. Ye ngic hiedzo emekpesi anggec, yeneac tebo heimeremma kebesac emegec, yeneac tatak ifingoc heimeremma <sup>13</sup>yofi edeyunuec,

“Yoac yofi oho ohoya fede, ‘Neac ama imoc nunumuama, kpara ifi kpacbesonga.’” *(Yesaia 56:7)*

Nga ngeneng ine imoc merenggec,

hamangec ngic yeneac sufufuama ande.” *(Yeremia 7:11)*

<sup>14</sup>Anu womonggac odatoaac manau ngic kicpisc amma hanimangang yeneng yearu hagec yeng mengereyunuec. <sup>15</sup>Ye faka kuhagoc ifi meec nga nambarac yeneng womong manau kpacma yofi degec, “Dawidiac bangeha, ohec, hosanna.” Kpacgec womong gareng enara nga mitiac negen negengngic yeneng imoc hemma herebu negemma <sup>16</sup>Yesuaru kemma degec, “Yeni yoac dedaemoc, imoc negennec me?” Ifi degec yeng yofi deec, “Nengenduae amma ngeni yoac yomocnoc osonegeng mi angandae gedang,

‘Ge nambarac kapia nga sabac namuu kecdae uayoac yemmena yeneng geac kpac kuneng heiwayong memigeccde.’” *(Mitiyegec 8:2)*

<sup>17</sup>Ifi dema wayunuma taong wama Betania amabangeclu kemma tofocnac ihai kefec.

<sup>18</sup>Amma Yesungo asoac taonnu dzigene kemma hereaac homema <sup>19</sup>sing tegiau kic fima fig ic mong henec. Hemma negenu foragoc isoc anu haniau kemma mariasac hemma ic yofi edeec, “Ic, gearunac fora monggoc mi fingeckebesoc.” Ifi deu fig ic imoc imohaingoc ururuuec. <sup>20</sup>Ururuue medacfora yeneng imoc hemma kpidohoma kpesimigec, “Fig ic imoc dafi bic yombong ururuede?” <sup>21</sup>Ifi dema kpesimigec Yesungo yofi edeyunuec, “Foracngoc, ngeni negen negensingnginagoc kecma negengyohoc mi anggecdeu icfu faka medua, faka imoc naric megecde, imoc edengunuduae. Nga imocsac kpac, ngeni ifingoc tiki yomocac yofi naric degecde, ‘Tiki ge miacemema kondunnu ukuemema kemena.’ Ngeni ifi edegec, ifinoc anude. <sup>22</sup>Nga ngeni wiac monggac me monggac negensinggema nunumunginau kpesigecdeu ngeni imoc sasawa megecde.”

<sup>23</sup>Yesungo ifi dema taonnu hama womonnu emma kpoukpou ua meu womong gareng enara nga yudangic enarafocngina, yeneng hama kpesimigec, “Ge noc kucfu ua yomoc menec amma merang uayoac imoc genec?” <sup>24</sup>Ifi kpesimigec yeng yofi merengyemmeec, “Neng ngeni wiac monggac ifingoc kpesingemmeba ngeni turunga edenugecdeu ni uakibinaac hania imoc edengunubade. <sup>25</sup>Yohanengo dokunadzic ua mekefec, imoc dahacnac, kurumennunac me ngicfunac?” Deu yeni yenaocngoc denegeng amma degec, “‘Imoc kurumennunac.’ ifi denideu yeng yofi kpesinemmeude, ‘Ifi negemma ngeni nocac ye mi negensinggegec?’ <sup>26</sup>Me ‘Imoc ngicfunac.’ ifi denideu ngicngac sasawa yeni Yohaneac ye profete negendae, imocac debesonga yeneac kengecnunude.” <sup>27</sup>Yeni ifi denegeng amma Yesu edegec, “Imoc mi negendimbe.” Ifi degec Yesungo yofi deec, “Ifi degec, ni ifingoc noc uayoacac kucfu ua mekecduae, imoc mi edengunubade.”

<sup>28</sup>Negenggec, “Ngic mong ye medahora yohockang nga ye waracmedahaaru kemma edeec, ‘Medacna, ge yaguc waing uau kemma ua mebesena.’ <sup>29</sup>Ifi edeu medahango merenec, ‘Ni imoc wadae.’ Ifi dema ine ngade ubea dzigeneu uau kenec. <sup>30</sup>Nga manggac ye kemma ngademedaha, yeac ifingoc edeu ngademedahango deec, ‘Manggac, ni naric kembade.’ Ifi dema kemma ihoc bahoc amma uau mong mi kenec.” <sup>31</sup>Ngeni dafi negendae, “Medac yerearunac merang mamaac songo modacma uaya meec?” Ifi kpesiyemmeu degec, “Waracmedaha yeng.” degec Yesungo yofi edeyunuec, “Foracngoc, takesimeme ngic nga singtoangac yeneng waraingemmema Anutuac eucererennu enggecde. <sup>32</sup>Yohanengo sing dindingac modacma ngenearu hau ngeni ine mi negensinggegec. Nga takesimeme ngic nga singtoangac yeneng ye negensinggegec. Ngeni ine imoc henggec amma sifu ubangina mi merenggec nga mi negensinggegec.”

<sup>33</sup>Ni yoac mong heiba negenggec, “Ngic mong amabangehagoc ye waing ua mong homecma oda dzegeec. Dzegema waing tidzoc tidzohoaec teng usuma gareng yeneac kicfificac amaherec meec. Ifi meu wisickeu waing ua garenggegecdeac ngic meficyunuma yenigoc yoac dedzegec anggec. Nga yengenaoc ine bangec hereau kenec. <sup>34</sup>Kenu fora kpememe naso hau ye wanacngicfora sueyunuu uagareng yenearu waing fora megecdeac kenggec. <sup>35</sup>Kenggec ua gareng yeneng ine minginaac wanacngicfora meyunuma mong kpema mong kpehomema mong hocngo heigec. <sup>36</sup>Ifi anggec ua minginango wanacngic goa homac monggoc sueyunuu kenggec gareng yeneng faka imocngoc ayemmegec. <sup>37</sup>Nga ngade ua minginango yofi negemma yengena medaha sueec, ‘Yeni medacnaac ewea sifu heigecde.’ <sup>38</sup>Ifi dema sueu kenu ua gareng yeneng medaha hemma yofi denegeng anggec, ‘Yeng kecma ua yomoc tiu enude, imocac ye kpehomema bangeha nga maridzominga sasawa meni nenang ambeso.’ <sup>39</sup>Ifi dema miacukugec oda ngadeau kemeu mema kpehomegec.

<sup>40</sup>Nga ua minginango monggoc hama uagareng dafi ayemmeude?”

<sup>41</sup>Ifi deu degec, “Ua minginango hama uagareng mangana memanganeyunuma yunuhomema waing uaya imoc uagareng goa yeneac mariu faiude. Faiu yeneng imoc garenggema foranasou mingina fora migece.” <sup>42</sup>Ifi degec Yesungo yofi deec, “Mitikibiu yoac yofi oho ohoya fede,

‘Amameme ngic yeneng hoc mong mangana dema ukugec. Nga hoc imocngo amaac hoc wotung amma seria nanude. Kebu yengenaoc faka imoc meu ngicngo hensongo ammidimbe.’ (*Mitiyegec 118:22-23*)

Ngeni kibi imoc osonegeng mi angandae gedang. <sup>43</sup>Imocac amma edengunuba negenggec, Anutungo eucerereng ngeneacunac meickema areng mong yemmeude. Nga yeneng eucererenggac uaya mema foraya meficgegecde. <sup>44</sup>Nga ngic mong ye hoc imocac witiau maude, ye sebua tegerude. Nga hoc imocngo yeac witiu makpema hedzameu kapuc kpeude.”

<sup>45</sup>Anu Yesungo yoac heiec, imoc womong gareng enara nga farisaio yeneac deec, imoc bic negentegecgec. <sup>46</sup>Yeni ifi negenggec nga habu yeneng yeac profete degecac yeni ine Yesu mendanggegecdeac kengecyunuu osima wagec.

**22** <sup>1</sup>Yesungo yoac mong heima torokpema yofi edeyunuec, <sup>2</sup>“Kurumenggac eucerereng imoc ngictau mong isoc, ye medahaac memeturang nasoac yakatoa ohoma memengere anec. <sup>3</sup>Amma ngictaungo wanacngicfora sueyunuu yeni ngicngac memeturanggac amma bic heitaiyunuec, yeni wangecyungecdeac kenggec. Kenggec ngicngac yeneng ine modzongina tiu wagec. <sup>4</sup>Wagec ngictaungo wanacngicfora goa monggoc sueyunuma yofi deec, ‘Ngeni kemma ngic bic heitaiyunuai, yeni edeyunugec, “Negendae, burumakana ngiwa nga

yang kerectoayagoc imoc bic kpeoho amma yakatoa mengeredacdua. Ni wiac sasawa bic memockedua, imocac ngeni hagec.” ’

<sup>5</sup>Ifi deu kemma edeyunugec, yeneng ine yoac monggoc hau imoc negemma modzongina tiu eng wama kengha anggec. Mong ye uayau kenec nga mongngo kpounec uayau kenec. <sup>6</sup>Nga ngicngac tosea yeneng ngictauac wanacngicfora ngaba ayemmema yunuhomegec. <sup>7</sup>Ifi anggec ngictau ye imoc negemma herebu amma wasaifora sueyunuu kemma ngickpekpengic imoc yunuma taongngina faigec dzeec. <sup>8</sup>Amma wanacngicfora yofi edeyunuec, ‘Memeturanggac yaka imoc bic mengec mengerea nga ngic heitaiyunudua, yeni areng mangana ifiango nearu hagecdeacsoc mi ande. <sup>9</sup>Imocac ngeni sing sosocfu kemma namma ngic meficyunugecdesoc, yeni edeyunugec memeturanggac amau habisia.’ <sup>10</sup>Ifi deu wanacngic yeni sinnu kemma ngic meficyunugecsoc gombunga nga mangana momoc hesicyunudacma hama memeturanggac yakaama imoc mewakegec.

<sup>11</sup>Anu ngicngac yeni hadacma tacgec ngictaungo yenenudeac hama ngic mong memeturanggac ngakpi mi heima tarec, <sup>12</sup>ye hemma yofi edeec, ‘Tosona, ge dafi memeturanggac ngakpi mi heima erema tacnec?’ Ifi deu ngic ye yoara kpac waickema taru <sup>13</sup>ngictaungo kingangngicfora yeneac yofi deec, ‘Ngeni hanimaria kpema ngadeau kundunnu ukugec kemeu. Ihai kiacma enara kisaranggema kecbeso.’ <sup>14</sup>Ngicngac kpacyunuyunuya, yeni homac nga meisingyunuyunuya, yeneng ine efeanec.”

<sup>15</sup>Anu farisaio yeneng kemma yoac dafi dema Yesu tobanggeni yoac goa segeu meni dema imocac denegeng anggec. <sup>16</sup>Ifi amma medacfocngina nga Herodeac areng goa Yesuaru sueyunugec kemma degec, “Kpoukpou, ge yoac fora dekecnec, imoc negendimbe. Nga Anutuac sing dindingac ngicngac edekpou anemmekecnec amma ngic monggac me monggac songo mi negemma engena mamea socfungoc anemmeannec. <sup>17</sup>Imocac dafi negennec, damocngo naric ande, neni takesi ngictau Sisa naric minide me kpac?” <sup>18</sup>Ifi degec Yesungo ngabasiricfu degec, imoc negemma yofi edeyunuec, “Ikocngic, ngeni nocac suba idenendae? <sup>19</sup>Ngeni takesi faiandae, imohacnac dzo mong mehagec hembra.” Ifi deu yeni denarhoc mong mekemma edzahegec <sup>20</sup>yeng imoc hemma yofi kpesiyemmeec, “Onga nga kibi yoc, imoc meracac?” <sup>21</sup>Deu degec, “Imoc Sisaac.” Ifi degec yeng yofi edeyunuec, “Imocac ngeni Sisaac wiac Sisa mibisia nga Anutuac wiac Anutu mibisia.” <sup>22</sup>Ifi deu yeni imocac negenggec engena anu wama kenggec.

<sup>23</sup>Sadukaio areng yeni homecfunac yacyac mi fede, ifi dekecdae, yeneanunac ngic goango wenac imohaingoc Yesuaru hama kpesimigec, <sup>24</sup>“Kpoukpou, Mosengo yofi deec, ‘Ngic mongngo ngac meec nga ye gboriha kpac kecma homeu muneango daraac hodzec mema gboric kpeficgema daraac kpac miacma kecbeso.’ (*Dedeseri 25:5-10*)



<sup>25</sup>Dacmunac seweng nenigoc kecgec, yeneacunac waracdacnginango ngacfu kemma gboriha kpac kecma homeu muneango hodzeha meec.

<sup>26</sup>Meu munea nga yeac ngadeau munafora 5 kecgec, yenearu faka ifiangoc fingeru yeni sasawango homedacgec. <sup>27</sup>Homedacgec ngac ye ifingoc kecma homeec. <sup>28</sup>Ngic seweng yeni sasawango ngac yeac ewea anggec. Nga yacyac nasou ngac imoc meracac enema anude?"

<sup>29</sup>Ifi degec Yesungo meremma yofi edeyunuec, "Ngeni mitikibi nga Anutuac kuc mi negentegecdaeac yoac desufudae. <sup>30</sup>Yacyac nasou ngicngac yeni monggoc mi meemegecde amma manggac mongngo yofi mi deude, 'Ni naroanna ngic mibade.' Imohai ngicngac yeni ine kurumenggac angero, yeni isoc anggecde. <sup>31</sup>Nga homecfunac yacyac dema Anutungo yofi bic edengunuec,

<sup>32</sup>'Ni Abrahang nga Isaka amma Yakobo, yeneac Anutu.' (*Makekeng 3:6*) Ngeni imoc osonegeng mi angandae gedang. Nga ye ine ngic homemea, yeneac Anutu kpac. Ye gbori kecdimbe, neneac Anutu." <sup>33</sup>Nga ngicngac habutoa yeni kpoukpouya imoc negenggec engena anec.

<sup>34</sup>Anu farisaio yeneng yoac yomoc negenggec, "Yesungo sadukaio yeneac yoac merenu yoacngina dugung kpeu engsac nanggec." Yeni imoc negemma kpedzucnema <sup>35</sup>yeneac botucfunac dedeseriyoacac negen negengngic mongngo Yesu faitobannu faima kpesimiec, <sup>36</sup>"Kpoukpou, dedeseriyoacac manau dedeseriyoac damocngo engena yombong ande?" <sup>37</sup>Ifi kpesimiu yofi edeec,

"'Ge ubaherega nga ubaongaga amma negen negengga hafoangoc Kebu Anutugaac songo negemma kecbesena.' (*Dedeseri 6:4-5*)

<sup>38</sup>Imocngo dedeseriyoacac warac warac nga kuneng ande. <sup>39</sup>Nga imocac ngadeau ogea yofi,

'Ge geangga anggengande, siriha imocngoc gegoc wegena kecdae, yeni heresongogoc hoangyunubesena.' (*Sesememe 19:18*)

<sup>40</sup>Dedeseriyoac nga profeteyoac sasawango dedeseriyoac yohockang yomocac witiau tima nandae."

<sup>41</sup>Anu farisaio yeni kpedzucnema tacmagec Yesungo yofi kpesiyemmeec, <sup>42</sup>"Ngeni Messiaac hania dafi negendae, ye meracac kisicfunac?" Kpesiu meremmigec, "Ye Dawidiac bangeha." <sup>43</sup>Ifi degec Yesungo yofi deec, "Ifi anu Tiri Asungo dafiac Dawidiac enac meefaiu yeac 'Neac Kebu.' dema yofi deec,"

<sup>44</sup>"KEBUNGO neac Kebu edeec, 'Ge foinaugeng tacmana ngabafocga hanigaac bageau faiyunuba yeni hanititiga anggecde.' "

(*Mitiyegec 110:1*)

Ifi deec. <sup>45</sup>Nga Dawidi yengenaoc kpara yofi kparec, "Neac Kebu. Nga Messiang dafiu Dawidiac bangeha ande?" <sup>46</sup>Ifi deu yeni Yesuac yoac turunga merembesonga obohogec. Obohoma naso imohacnac erema yeac kengec amma mongngo dekpesi monggoc mi ammigec.

**23** <sup>1</sup>Yesungo ngicngac habutoa nga medacfora yofi edeyunuec, <sup>2</sup>“Mitiac negen negengngic nga farisaio yeni Moseac tatacfu tacdaeac <sup>3</sup>yeni yoac edengunudae, ngeni imoc sasawa tofohoma modacbisia. Nga yeni faka angandae, ngeni siric ifi mi ambisia. Yeni yoac edengunuandae, imoc ine yenaoc mi modacandae. <sup>4</sup>Yeni singyoacac dede ebiria yombong dedeckema ngic ngeneac fuau faigec ebiriude. Nga yenaoc ine dede imoc meefaima meficngunugecdeac gbongnginango miacgecdeac mi ayemmeude. <sup>5</sup>Yeni ngicngo fakangina henggecdeac mitigbomea kandacbisic bisicngina meyandiandae.<sup>f</sup> Amma ngakpingina herea heiandae, imohai witic kibi kibi kpatainggema nangande, imoc kuneng yombong meandae.”

<sup>6</sup>Yeni yakatoa nasou nga kpekpeturang amau warac warac tatacfu tacbesonga ayemmeude. <sup>7</sup>Nga kpedzaroc sobennu ngicngac yeneng ‘Wenacngerec.’ nga ‘Gareng,’ ifi dema kpacyunugecdeac homac ayemmeude.

<sup>8</sup>Anu ngeni garengngina mocgungo kecede nga ngeni sasawa dacmunac andae. Imocac ngeneac negemma mongngo ‘Gareng,’ ifi mi kpacngunubeso. <sup>9</sup>Mangngina mocgungo kurumennu kecdeac amma ngeni bangecfu ngic monggac ‘Mannina,’ ifi mi debisia. <sup>10</sup>Nga kunengngina Messia mocgungo kecdeac amma ngic mongngo ‘Kunenna,’ ifi mi kpacngunubeso. <sup>11</sup>Nga kunengngina kecede, yeng ine ngeneac kingangkpekpe kecbeso. <sup>12</sup>Ngic mong ye yengenaac negenu engena angkecede, ye mamea anudeac memagecede. Nga mong ye yengenaac negenu mamea angkecede, ye meenggecede.

<sup>13</sup>Mitiac negen negengngic nga farisaio, ngeni kurumeng eucererenggac nagu kpebung yeneac kicnginau heiandae. Ngeneng imohai enggecdeac segeandae nga kpebung yeneng embesonga ammagec kpae ifingoc heiyemmekecdae. Ngeni ikocfakangina ifia mekecdaeac ngeni sowecnginagoc. <sup>14</sup>Mitiac negen negengngic nga farisaio ngeni sowecnginagoc. Ngeni ngachodzec amangina wangecyunugec engsac kecgecede. Amma ngicngac yeneng negengngeree ngemmegecdeac ngeni nunumu hereangoc numuandae. Ngeni ikocfaka ifia angandaeac turunga ebiriangoc megecede.

<sup>15</sup>Mitiac negen negengngic nga farisaio, ngeni ngic mocgu dekerecyoac ammigeceac bangeha bangeha nga kondung ferecgema kengandae. Nga yeng ngenearu torokpeu mefahegec, ye ngenang isoc hofeac nambarac amma feracngunuma kemeude. Ikocfakangina ifia mekecdaeac ngeni sowecnginagoc.

---

<sup>f</sup> **23:5** Yudangic yeni kandacbisic bisic yang seberango meme mitigbomea oho ohoya ihai barima mesunginau me fuanginau orohokecgec. Faka imocac hania Dedeseri 6:1-10 oho ohoya fede. <sup>u</sup> **23:5** Faka imocac hania Bangec kisiu 15:38-41, imohai oho ohoya fede.

<sup>16</sup> Sing edzac edzac ngic, ngeninoc kicpisis andae. Ngeni yoac yofi deandae, 'Ngic mongngo Anutuac womong kpacma yoara deseriudeu, imoc yoac kapia. Nga mongngo womong manau gol tacde, imoc kpacma yoara deseriudeu ye yoara imoc naric mi waude.' Ifi deandaeac ngeni sowecnginagoc. <sup>17</sup>Womongngo gol kpanjanggeu kpetiac anude, imoc wiac engena nga gol yengenaoc imoc wiac mamea. Ngeni kicpisis nga negen negengngina mi irec ireckea. <sup>18</sup>Amma ngeni deandae, 'Mong ye arata kpacma yoara deseriudeu, imoc yoac kapia. Nga mongngo sese arata witiau bic faifaia, imoc kpacma yoara deseriudeu yoara imoc naric mi waude.' <sup>19</sup>Aratango sese kpanjanggeu kpetiac anudenoc, imocngo wiac engena nga sese yengenaoc imoc wiac mamea. Ngeni kicpisis areng.

<sup>20</sup>Ngic mong ye arata kpacma yoara deseriudeu ye arata nga sese arata witiau fedacde, imoc momocngoc kpacma medarude. <sup>21</sup>Nga mong ye womong kpacma yoara deseriudeu womong yengena amma Anutu imohai kecde, ye momocngoc kpacma medarude. <sup>22</sup>Nga mong ye kurumeng kpacma yoara deseriudeu, ye Anutuac tatak nga yeng ihai mingina amma tarude, ye momocngoc medarude.

<sup>23</sup>Mitiac negen negengngic nga farisaio, ngeni sowecnginagoc. Ngeni singyoac kapiabisic modacma dedeseriyoac engena, imoc ine wagecde. Ngeni ikocfakangina ifia meandae. Ngeni wiac homuna gombunga nga yakaac nga ic sogonggac homuna gombunga fingerude, imocac gbomea kapiabisic 10, imohacnac mocgu hendzicma Anutu miandae. Amma faka dindingac nga ubamangang amma negen negensingngina hafoangoc mekekec, imoc ine ihoc bahoc amma wagecde. Ngeni faka gombungngina imoc naric modacbisia amma tosea deduae, imoc ifingoc mi wabisia. <sup>24</sup>Ngeni ngicngac sing edzacyunugecdeac ua, imoc kicpisis siricfu angkecdae. Nga kurungnginau picpic hemma imoc meickema kamere ine mi hemma gbokoandae. (*Sesememe 11:1-2,4,20*)

<sup>25</sup>Mitiac negen negengngic nga farisaio, ngeni ikocfakangina yofia mekecdaeac ngeni sowecnginagoc. Ngeni tera tasengina ngadeasac dzuacandae amma ngenang ubaherengina manau ine kickerec homac fede, imoc ngenaoc mi garengemeandae. <sup>26</sup>Ge tase teraac mana dzuacnaguc ngadea ifingoc kongac kpeude. Farisaio ngeni kicpisis.

<sup>27</sup>Mitiac negen negengngic nga farisaio ngeni yofi negenggec, kicsere imoc homemea seucnginagoc nga sicngo wake wakea fede, imoc kibiagoc anudeac ngeni kicsereac simeng weroc nadzicandae. Nga ngeni ubaherenginau nga sebinginau siriha ifia amma kecdae. <sup>28</sup>Ngeni sebinginango ngickicfu dindingac isoc ande. Nga ubaherenginau ine ikocngo wake wakea amma ngeni ngenaoc dedeseriyoac kpema kecdae. Ngeni ikocfakangina ifia mekecdaeac ngeni sowecnginagoc.

<sup>29</sup>Mitiac negen negengngic nga farisaio, ngeni sebiengeneng amma ikocfakangina mekecdaeac sowecnginagoc andae. Ngeni profete yeneac

kicsereu simengngina meyemmema ngic dindingac simengngina kibiagoc anudeac monggoc heigborima mengereandae. <sup>30</sup>Mengerema yofi deandae, ‘Neni bangecfocnina yeneac nasou kecbing debac profete naric mi yunuhomebing nga sacngina maudeac faka yenigoc mi ambing.’ <sup>31</sup>Ngeni ifi mekecma yofi dekperagiemedae, ‘Nenang ngic profete yunuhomegec, yeneac medacfocngina.’ <sup>32</sup>Ngeni ifi dema bangecfocngina yeneac faka mewakema mekecgecde. <sup>33</sup>Ngeni ngenaoc boidzoc amma boidzocac medac, ngeni yoacfu turunga mema hofeu kemebauac <sup>34</sup>neng profete nga negen negengngic amma mitiac negen negengngic sueyunuba hangemmegecde. Nga ngeneng kecma yenearunac goa yunuhomegecde nga goa mariponnu yunugecde amma goa kpekpeturang amanginau dzikacngo yunuma ngaba ayemmema taong monnunac monnu kporacyunugecde. <sup>35</sup>Ngeni ifi mekecma ngic dindingac yunudacgec sacngina bangecfu madarec, imocac turunga hafoangoc ngenearu feude. Imoc Abeac sacfunac hanahema erekecma Barakiaac medac Dzekaraia, yeac sacfu erede. Ngeni ye kpetiac ama nga arata botucngirau kpehomegec.’ <sup>36</sup>Foracngoc, faka sasawa imocac turunga, imoc areng yomoc ngenearu fingeccdarude, imoc edengunuduae.

<sup>37</sup>O, Yerusareng, Yerusareng, ge profete yunuhomeannec nga ngic gearu sueyunuyunuya, yeni hocngo yenereannec. Kokorec nonggeango nambaracfora kpeganga bageau foforacyunuande, ni naso homac ifi isoc nambaracfogga kpedzucyunubadeac negembare ngeneng ine imocac songo mi negenggec. <sup>38</sup>Negenggec, ngeneac amagerec imoc ngiha kpac anu kisi fingerude. <sup>39</sup>Ni edengunuba negenggec, yofinenggac hanahema ngeni monggoc mi nenggecde. Nga nang enggecdeu yofi degecde, ‘Kebua kpacfu ngic hade, ye kenehagoc.’ (*Mitiyegec 118:26*) ifi degecde, naso imohai ngeneng monggoc nenggecde.”

**24** <sup>1</sup>Yesungo womonnunac mamamu medacfora yeneng yearu hama womonggac mana kuneng hania hania edzahegec <sup>2</sup>yeng yofi edeyunuec, “Wiac imoc yaguc hendacdae, imoc ine ngade yofi fingerude. Foracngoc, areng mong yeneng hama imoc sasawa hembarackedacgec kendarude. Kendaru hoc mongngo monggac witiu mi wagec tarude.” Ifi dema <sup>3</sup>Yesungo Oriwa tikiu kemma taru medacfora tembucngina yearu kemma kpesimigec, “Ge yoac dedang imoc noc nasou fingerude? Nga naso wisic wisickea amma geangga hahanasogau noc soi fingerude, imoc edenununa.”

<sup>4</sup>Ifi degec Yesungo meremma yofi deec, “Ngc mongngo ikocfu wangepgunubac ngeni henghomema kecbisia. <sup>5</sup>Imoc yofiac, ngic

† 23:35 Kaing ye hanac hanaheau munea Abe kpehomeec. Fingec fingec 4:1-10. Ngictau Yoasi ye profete Dzekaria kpehomeec. 2 Ngictau siduc 24:17-27. 2 Ngictau siduc imoc Yuda yeneac mitikibiu wisic wisickea nande. Imocac Yesungo yofi deec, “Abeac sacfunac erekecma Barakiaac medac Dzekaraia sac imohai erede.”

homac yeneng hama neac kpac kpacma degedce, 'Ni Messia.' ifi dema ngicngac homac uba mesufu ayemmegecede. <sup>6</sup>Nga ewekpekpetoac siduc bangec wegenaunac nga bangec hereaunac hau ngeni imoc negemma mi kpidohobisia. Wiac ifia fingecebeso nga nasongo imohaingoc bic mi wisickeude. <sup>7</sup>Bangec goa yeneng bangec ogofocngina yenigoc ewekpekpe anggecede. Nga ngictau monggac arengngo ngictau monggac areng yenigoc ngaba angemegecede. Nga boditoa bangec goau fingerude nga goau usoctoa meude. <sup>8</sup>Wiac gboria hanahema fingerudeac gadze kiande, ifi isoc ande.

<sup>9</sup>Ifi fingeru ngicngac yeneng ngeni ngabafocnginaac mariu faingunugecede. Faingunugec ngaba yeneng ngunuma homecfu faingunugecede. Nga bangeha bangehaac ngicngac sasawa yeni neac kpacnaac amma ubango ukungunugecede. <sup>10</sup>Nga ngicngac homac yeni negemmangang amma wanuma yenaocngoc ogofocngina ngaba yeneac mariu faiemegecede nga ubango ukuemegecede. <sup>11</sup>Nga profete ikoha homacngo fingecebeso ngicngac homac ikocfu wangecyunugecede. <sup>12</sup>Singyoac wawa faka imoc yadiude imocac ngicngac homac yeneac heresongogoc negengemeeme nga hoangemefaka nomaneude. <sup>13</sup>Nga ngic mongngo serima kecmanu naso wisickeude, yeng komoc kpeude. <sup>14</sup>Nga ngicngac yeneng eucererenggac siduc gombung yomoc edeyunugec dedekperagi imoc bangec sasawa sokodaru ngicngac yeni imoc nengendamagec naso wisickeude.

<sup>15</sup>Profete Danierengo wiac mangac manganea imocac yoac warac deec, imocngo ama kpetiacfu nanu henggecede. Ngic mong ye yoac yomoc osoude, yeng imoc negentegecebeso. (*Danie 9:27; 11:31; 12:11-13*) <sup>16</sup>Faka imoc fingeru ngicngac Yudaia bangecfu kecdae, ngeni worama tikiu embisia. <sup>17</sup>Nga mong ye ama witiau nande, ye wiac mong meudeac ama manau mi embeso. <sup>18</sup>Nga mong ye semeng uau nande, ye ngakpi hereha meudeac mi dzigenebeso. <sup>19</sup>Ngac heregoc kecdae nga nenggac sabac namuu meyunukecdae, yeni naso imohai ebicnginagoc anggecede. <sup>20</sup>Nga ngeni woragecdeac naso haude, imoc nomannasou me sabatanasou mi fingerudeac numubisia. <sup>21</sup>Naso imohai kpendzeng kuneng yombong fingerude. Kpendzeng ifia bangec hanac hanaheaunacngoc erekecma yofinenggac mong mi fingerec amma ngade ifingoc mi fingecebesande. <sup>22</sup>Nga uameme imoc mi mewegenegecede isoc ngic mongngo komoc naric mi kpeude. Amma ngicngac isingyunuyunuya, ngeneac amma naso mewegenegecede.

<sup>23</sup>Naso imohai yoac mong yofi fingerude, 'Henggec, Messia yei fingecede.' me 'Messia ye edi fingecede.' ifi degedce isoc ngeni mi negensingyunubisia. <sup>24</sup>Imoc yofiac, Messia ikoha nga profete ikoha yeneng fingecebeso ngicngac uba mesufu ayemmegecedeac tobangyunuma faka morora nga faka kuhagoc engena megecede. Amma yeni sing mecigegecede ngicngac

isingyunuyunuya ifingoc ikocfu wangecyunugecde. <sup>25</sup>Negenggec, ni faka imoc fingerudeac bic edengunuba negendae. <sup>26</sup>Ngicngac goa yeneng yofi degecde, 'Henggec, ye bangec kisiu kecde.' Ifi degecdeu ngeni ihai mi kembisia. Me yofi degecde, 'Ye yei ama manabisicfu tacde.' Ifi degecdeu ngeni imoc mi negensinggebisia. <sup>27</sup>Piratacngo wenac ere ereaunac heima wenac keme kemeau kpesiande. Nga Ngicac Medac haude, naso imohai siriha imocacsoc fingerude. <sup>28</sup>Koec koec neng yeni fareng fede, imohai eacandae.

<sup>29</sup>Anu kpendzengtoa nasoya wisickeuguc

wenackiwa kundung kpeu afokperagia mi fingerude. Asomeng yeni kurumennunac fotockema magec kurumenga kurumenga yeneac kuc sasawa kpemindzahegecde. *(Yesaia 13:10; 34:4)*

<sup>30</sup>Imohai Ngicac Medacac soi sawakebangau fingeru bangeha bangeha ngicngac sasawa yeni imoc hemma kiacsonggong anggecde. Ifi ammagec Ngicac Medacngo kurumenggac hoennu kuc nga kibikperagitoagoc hau henggecde. <sup>31</sup>Nga trampet udumengtoa kuneng fingeckmanu ye angerofora sueyunuu yeneng kurumenga kurumenga noboc noboc amma bangec tegia noboc noboc 4 imohai kemma Kebu yengenaoc ngicngac meisingyunuec, yeni kpedzucyunugecde.

<sup>32</sup>Fig icngo hania edekpou angemmeu ngeni imoc negembisia. Fawa firitickema besiau ngicngac yofi negengandae, wenac naso ande. <sup>33</sup>Nga wiac sasawa dedua, imoc fingeru ngeni imoc hemma ifingoc negembisia, Ngicac Medacac naso imoc bic wegenema hade amma ye nagu ngadeau nande.

<sup>34</sup>Foracngoc, areng yomoc ngeni mi homemagec wiac yomoc fingeckdarude. <sup>35</sup>Fingeru bangec nga kurumeng kpac anecde nga neac yoac, imoc ine mi kpac anude. <sup>36</sup>Faka imoc noc uamemeu amma aua nofu fingerude, imoc mongngo mi negenude. Kurumenggac angero yeni imoc mi negendae nga Medacngo ifingoc mi negende. Manggacngosac naso imoc negende.

<sup>37</sup>Noaac nasou faka fingerec, Ngicac Medacngo hau faka siriha imocngoc fingerude. <sup>38</sup>Kiatunggbaung mi hamanu ngicngac yeneng nenedoku nema ngic yeni ngacfu kenggec nga manggac yeneng yofi degec, 'Ni naroanna ngic mibade.' ifi angkecmagec Noango wageu enec. <sup>39</sup>Enu yeni mi negemma kecmagec kiatunggbaungtoango hama merucyunudarec. Ngicac Medacac hahanasou faka ifiangoc fingerude. <sup>40</sup>Naso imohai ngic yohockang semeng uau kecmaec yerearunac mong mema mong ine wagec uau kefude. <sup>41</sup>Ngac yohockang yeri flawa amau namma flawa medzamema kecmaec yerearunac mong mema mong ine wagec nanude.

<sup>42</sup>Kebunginango noc uamemeac haude, ngeni imoc mi negendaeac amma ubagbori kecbisia. <sup>43</sup>Hamangecngic ye ama hetackema engande.

Nga ama mingina mong ye hamangecngic noc nasou haude negendeu ye gaugbori kecma amea garenggekecma hamangecngic imoc kpae heimiude. <sup>44</sup>Imocac ngeni ifingoc efaima kecbisia. Ngicac Medacac aua ngeni mi negemmagec haude.

<sup>45</sup>Wanacngic mongngo negen negentegehagoc kefec. Nga minginango ye wanacngic ogofora yeneac gareng amma yakangina nasoyau modacma yemmeudeac demiec. <sup>46</sup>Ye ua demi demia imoc medaru minginango hama henu naric anude, ye kenehagoc. <sup>47</sup>Foracngoc, yeac minginango wiara sasawa garenggeudeac demiude. Ngeni sirihia imocacsoc kecbisia.

<sup>48</sup>Nga wanacngic mangana, ye ine yengenaoc negensiude, ‘Ni minginna naso herea kecmaguc haude.’ <sup>49</sup>Ifi dema wanacngic ye ogofora yunuma minggong ngic, yenigoc doku seria neude. <sup>50</sup>Ifi amma tomai mi kecma wanacngic yeng minginaac uamemenaso nga auaya mi negemmanu minginango haude. <sup>51</sup>Hama wanacngic imoc kpema herec kpercgec heima ngic ikoha yenigoc faiude. Nga yeni ihai kiacma enacngina kisarangema kecgcede.”

**25** <sup>1</sup>“Kurumenggac eucereheng imoc yofi isoc anude. Naroang 10 yeni kifangina mema memeturang ngic yegoc meficemegecdeac sinnu kenggec. <sup>2</sup>Yenearunac naroang 5 yeni mi irec ireckea nga 5 yeni negen negengnginagoc. <sup>3</sup>Naroang mi ireckegec, yeni kifangina mema kirung dokuyagoc mong mi megec. <sup>4</sup>Nga negen negengnginagoc, yeneng kifangina mema dokungina kirunnu kisima megec. <sup>5</sup>Nga memeturang ngicngo bic mi hau naroang sasawango kicngina gau anu gau fegec. <sup>6</sup>Femagec tofocnac dzongiau kpakpac mong yofi fingerec, ‘Negenggec, memeturang ngic hade, ngeni kemma yegoc eacgec.’ <sup>7</sup>Ifi fingeru naroang 10 yeni gauunac gborima yacma kifangina memengere amma <sup>8</sup>naroang negen negengngina mi irec ireckea, yeneng negen negengngoc yeneac degec, ‘Kifanina bokobeso andeac ngeni doku mong kisinemmegec.’ <sup>9</sup>Ifi degec naroang negen negengngoc, yeneng merengyemmema yofi edeyunuec, ‘Doku yomocngo nenanggacsoc kpac. Imocac ngeni ine kifadokuya faiandae, yenearu kemma bummegec.’ <sup>10</sup>Ifi degec, yeni kifadoku bummebesonga kemmagec memeturang ngicngo haec. Hau naroang efaigecmoc, yeni yegoc memeturanggac amau enggec. Emma nagu ukugec kpeu imohai nenesemeng nesogai amma tacgec. <sup>11</sup>Tacmagec ngade ngac tosea yeneng hasikema degec, ‘Kebu, Kebu, nagu witinemmena ereni.’ <sup>12</sup>Ifi degec, yeng edeyunuec, ‘Foracngoc, ni kicrurungngunuduae.’ <sup>13</sup>Ngeni wenac nga aua mi negendae, imocac amma ngeni ubagbori kecbisia.

<sup>14</sup>Imohai faka sirihia yofi fingerude. Ngic mongngo bangec monnu kenudeac wanacngicfora kpcayunuma dzofinaha yeneac mariu faima kenudeac negenec. <sup>15</sup>Ye dzo garenggegecdeac kucnginaac sirihau yofi hendzicma yemmeec. Ye ngic mong tarantong dzo 5 nga mong tarantong



dzo yohockang amma mong tarantong dzo mocgu,<sup>w</sup> dzo ifi yemmema kenec. <sup>16</sup>Kenu ngic tarantong dzo 5 meec, ye imohaingoc kemma emekpesi uaya mema tarantong dzo 5 torokpema meficgeec. <sup>17</sup>Nga ngic tarantong dzo yohockang meec, ye ifingoc kemma emekpesi uaya mema yohockang torokpema meficgeec. <sup>18</sup>Nga ngic tarantong dzo mocgu meec, yeng ine kemma mingina dzo miec, imoc mema bangec usuma tonggoma mesufuec.

<sup>19</sup>Anu mingingnango naso herea kecma monggoc dzigene hama dzo yemmec, imocac turunga kpoumigeceac kpacyunuec. <sup>20</sup>Kpacyunuu ngic tarantong dzo 5 meec, yeng tarantong dzo 5 mong momoc mekemma deec, ‘Kunenna, ge tarantong dzo 5 nenna ni emekpesi uaya mema 5 monggoc torokpema meficgedua.’ Ifi deu <sup>21</sup>minginango yofi edeac, ‘Wanacngic gombunga yombong. Ge fakaga dindingac amma yoac modac modac fakaga soronga. Nga geng yoac modacma wiac kapia kpacgoc garenggedangac wiac ebiriangoc garenggenadeac faigubade. Hana kunenggaac sogac sogaiu nerahafoc kecdede.’ <sup>22</sup>Nga ngic tarantong dzo yohockang meec, yeng ifingoc hama deec, ‘Kunenna, ge tarantong dzo yohockang nenna ni emekpesi uaya mema tarantong dzo yohockang monggoc torokpema meficgedua.’ Ifi deu <sup>23</sup>minginango yofi edeac, ‘Wanacngic gombunga yombong. Ge fakaga dindingac amma yoac modac modac fakaga soronga. Nga geng yoac modacma wiac kapia kpacgoc garenggedangac wiac ebiriangoc garenggenadeac faigubade. Hana kunenggaac sogac sogaiu nerahafoc kecdede.’

<sup>24</sup>Nga ngic tarantong dzo mocgu meec, yeng ifingoc hama deec, ‘Kunenna, ge ngic gerea, imoc negenduae. Amma uau wiac heihomec mi amma foraya kpedziannec amma gbomea mong mi kpegima sifu foraya mesianec. <sup>25</sup>Imocac kengecnuu kemma tarantong dzoga bangecfu tonggoba fec wiacga imoc monggoc merenggenduae.’ <sup>26</sup>Ifi deu minginango yoara turunga yofi meremmec, ‘Ge wanacngic mangana amma oyonga. Ni uau heihomec mi amma foraya kpedzianduae amma gbomea mi kpegima sifu foraya mesiannduae, geng imoc bic negennec. <sup>27</sup>Ge imoc negemma dzona dzo tohonnu faina heikpegumekecgec saheu neng dzigenema dzona imoc nobohagoc mebai. <sup>28</sup>Imocac ngeni tarantong dzo yearunac wangecma ngic tarantong dzo teng mekecde, ye migec. <sup>29</sup>Ngic mong ye wiac mekecde, ye monggoc migec homac ebiriangoc anude. Nga mong ye wiac mi mekecde, yearunac wiac mekecdemoc, imoc ifingoc wangecgecde. <sup>30</sup>Wanacngic uaya gombunga mi medac, ngeni ine ye mema ngadeau kundunnu ukugec kemebeso. Ihai kecdac, yeni kiacma enacngina kisaranggema kecgecde.’

<sup>31</sup>Kecma Ngicac Medacngo kuc nga kibikperagiagoc nga angero sasawa yenigoc hasikegecde, naso imohai ye ngictau tataha kibikperagiagoc ihai

<sup>w</sup> 25:15 Tarantong dzo mocgu imoc kifa 15gac uabung.

emma tacbesande. <sup>32</sup> Amma ye bangeha bangehaac ngicngac sasawa deu hama yeac kicfu kpedzucnedacgecde. Kpedzucnegec garenggo rama nga noning medereyunuande, yeng naso imohai ifi isocngoc medereyunuma <sup>33</sup> rama foiugeng nga noning ine kanaugeng faiyunuude. <sup>34</sup> Ifi amma ngictaungo ngicngac foiugeng yofi edeyunuude, ‘Ngicngac Mannaac kenecgoc, ngeni yei hagec. Ngeni maridzoming nga amabangecngina megec, imoc bicngoc bangec hanahema fingerecfunac ngeneac negemma faifaia. <sup>35</sup> Ni yakaac homeba ngeni yaka nenggec nga dokuac anenu doku nenggec neai. Nga kuriha kecbare ngeneng nenggareng anenggec. <sup>36</sup> Ni wambaac obohoba ngeneng wamba heinenggec. Amma hafei febare ngeni hama wirinugec. Nga witicamau kecbare ngeneng yugucnugec.’ <sup>37</sup> Ifi deu ngicngac dindingac yeneng yoac yofi meremmigece, ‘Kebu, ge noc nasou yakaac anggeni gemma gumecguing me noc nasou dokuac anggeni gumecguing? <sup>38</sup> Amma noc nasou kuric hana genggareng anggening me wambaac obohona gening? <sup>39</sup> Amma noc nasoac hafei me witicamau tacmana gemma yugucguing?’ <sup>40</sup> Ifi degec ngictaungo yofi edeyunuude, ‘Foracngoc, ngeni munafocna kapiabisc yeneacunac mocgunec ubangerec ammigece, imocacsoc ninoc anenggec.’ imoc edengunuduac.

<sup>41</sup> Ifi dema kanaugeng nanggecde, yeneac yoac yofi edeyunuude, ‘Ngicngac sowedngunungunuya, ngeni wanuma gerec wisic wisickea kpac, imohai kemma kecbisia. Imoc mangana mingina nga angerofora, yeneac amma dzema fede. <sup>42</sup> Ni yakaac homeba ngeni yaka mong mi nenggec nga dokuac anenu ngeni doku mong mi nenggec neai. <sup>43</sup> Nga ni kuric hama kecbare ngeni nenggareng mong mi anenggec nga wambana kpac kecbare mong mi heinenggec. Ni hafei anenec nga witicamau febare ngeni mi yugucnugec.’ <sup>44</sup> Ifi edeyunuu yeneng degecde, ‘Kebu, ge noc nasou nenedokuga kpac me wambaga kpac amma kuric kecmana neni gemma ihoc bahoc aning? Me dahai hafeiamau me witicamau femana gemma ihoc bahoc anggening?’ <sup>45</sup> Ifi degec yeng yofi edeyunuude, ‘Foracngoc, ngeni munafocna kapiabisc yeneacunac mocgunec ubangerec mi ammigece, imoc ifingoc ni mi anenggec, imoc edengunuduac.’ <sup>46</sup> Nga yeneng kopocsicac turunga kpendzeng nasoya kpac kpekecbesandaeac kenggecde. Nga areng dindingac yeneng kekecseriu enggecde.”

**26** <sup>1</sup> Yesungo yoac imoc sasawa dedaru wisickeu medacfora yofi edeyunuec, <sup>2</sup> “Uameme yohockang femanu makekeng naso imocac hombang ammanu imohaingoc ngic yeneng Ngicac Medac mariponnu kpegecdeac demeseri amma suegecde.”

<sup>3</sup> Anu womong gareng enara nga yudangic yeneac enarafocngina, yeneng womong garengtoa kpara Kaifa, yeac amaodayagocfu endacma

<sup>4</sup> Yesu akikic mema kpegecdeac dekiric amma <sup>5</sup> yofi degec, “Ngicngac botucnginau dzikac sicsauc fingebacac ye hombang nasou mi mebesonga.”

<sup>6</sup>Anu Yesungo Betania amau Simong kukuseriagoc, yeac amau yaka netarec. <sup>7</sup>Netacmanu ngac mongngo yearu kemma, kirung mong arabastro hocngo memea, imocac kerecdokuya homung kerengagocngo yeac orucfu kpakema nadzicmiec. <sup>8</sup>Nadzicmiu medac yeneng imoc hemma kerecdoku buma yada anecac dehesi ammigec, “Ye nocac wiac buma engena imoc kpedzonggede? <sup>9</sup>Imocngo dzo homac kirecgeu ngic makpekpea yemmeni ngereebac.” <sup>10</sup>Ifi degec Yesungo imoc negemma yofi edeyunuec, “Ngeni nocac ngacac ifi dema ubaebic meficgemidae. Ye faka gombunga nearu meu ngereede. <sup>11</sup>Ngic makpekpea yeni nasosoc ngenigoc kecgcede nga neng ine ngenigoc nasosoc mi kecbade. <sup>12</sup>Ni homeba tonggonugecde, ye imocac sebina mengerema bic nadzicnende. <sup>13</sup>Foracngoc, ngic yeni siduc gombung yomoc bangeha bangeha kemma dekperagigecde, imohai yeng ifi anec, imoc ifingoc degec negenggec feude.”

<sup>14</sup>Anu medacfora 12 yenearunac mong Yuda Karioto amaunac degec, yeng womong gareng enara yenearu kemma <sup>15</sup>kpesiyemmeec, “Neng Yesu maringinau faibadeu dzo dafiguc nenggecdeac negendae?” Kpesiyemmu yeneng siriwa dzo 30 osoma migec. <sup>16</sup>Migec, yeng Yesu naso damohai doc meu megecdeac hemmodacma kefec.

<sup>17</sup>Kecma ic sogong yis kpac, hombang imocac hanac hanaheau medac yeni Yesuaru kemma kpesimigec, “Neni ama dahai kemma makekenggac ramamedaha mengerema ohonenideac negennec?” (*Makekeng 12; Dedeseri 16:1-8*)\* <sup>18</sup>Ifi degec Yesungo yofi deec, “Ngeni taonnu emma ngic imoc hemma yofi edebisia, ‘Kpoukpouninango geac yofi dede, nasona wegeneu gearu hama ni nga medacfocna neni gegoc makekenggac ramamedaha nenideac negenduae.’” <sup>19</sup>Nga Yesungo medacfora yoac edeyunuec, imoc tofohodacma makekenggac ramamedaha ohomengere anggec.

<sup>20</sup>Ama toforeu Yesungo medacfora 12 yenigoc yaka netacma <sup>21</sup>yofi edeyunuec, “Foracngoc, ngenearunac mongngo ngaba yeneac mariu fainuude.” <sup>22</sup>Ifi deu medac yeni ubangina homac manganeu yenearunac mocgu mocgungo kpesimigec, “Kebu imoc sifu neng mi anduae, me?” <sup>23</sup>Kpesimigec yeng yofi deec, “Ngic nigoc kurungterau ic sogong nemuruckedic, yennoc doc faiu menugecde. <sup>24</sup>Ngic ye Ngicac Medac doc meude, ye sowehagoc. Ye nonggeaac here manaunac mi fingeccbac dede efaimibac. Nga Ngicac Medac neac negemma mitikibiu yoac yofi oho ohoya fede, yeng wangunuma kenudenoc.” <sup>25</sup>Ifi deu Yudango Yesu docfu faiudeac negenecmoc, yeng ifingoc kpesimiec, “Kpoukpou, ge neac denec me?” Deu Yesungo yofi edeac, “Ge geanggaoc imocnoc denec.”

---

\* **26:17** Naso imohai yis mi feec. Yeni flawa esea dokuyagoc homunagoc bic anec imoc flawa gborigoc yerecgegec flawa yadieci. Imocngo yisac ua meec.

<sup>26</sup>Anu yeni yaka nemagec Yesungo ic sogong mong mema Anutuac ubangerec dema mendzicma medacfora yofi dema yemmeec, “Ngeni mema negec, yomoc fusina.” <sup>27-28</sup>Ifi dema kpakenec mong mema Anutuac ubangerec ammima numumima yofi dema yemmeec, “Yomocngo dzadzahac gboriaac sacna, imoc ngicngac homac yeneac kopocsic kpac anudeac kpetic kpetinggea, imocac ngeni sasawango imoc negec. <sup>29</sup>Ni edengunuba negenggec, waing gbomeaac dokuya monggoc mi nene kecbarengoc Mannaac eucererennu nenahafoc sing gboriaac arennu nenide.” <sup>30</sup>Nga yeni ubangerec yegec heima amaunac mama edibigeng Oriwa tikiu enggec.

<sup>31</sup>Sinnu kemma Yesungo yofi edeyunuec, “Tofocnac yomohai ngeni sasawango neac negemma makpema wanudagecde. Faka imocac yofi oho ohoya fede,

‘Ni gareng kpeba ramahabu yeni sinsarang kpegecde.’

*(Dzekaria 13:7)*

<sup>32</sup>Nga homecfunac yacmaguc waraingemmema Gariraiia bangecfu kema ngeni ihai habisia.” <sup>33</sup>Ifi deu Petorongo edeec, “Goa yeni sasawa geac ifi dema wagugecde nga neng ine naric mi wagubade.” <sup>34</sup>Ifi deu yofi edeec, “Ni forangoc edeguba, tofocnac yomohai kokorec mi arohomanu geng sebiheinenna atac harebec anude.” <sup>35</sup>Deu deec, “Ge guma ni nubeso degec sebi naric mi heibade.” Petorongo ifi deu medacfora meficgema imocngoc dedagec.

<sup>36</sup>Anu Yesungo kengkecma ua bangec mong kpara Gedzemane, ihai kensikema medacfora yofi edeyunuec, “Ngeni yei tacmagec ni edi kemma numubade.” <sup>37</sup>Ifi dema Petoro nga Dzebedaio medahora meyunuu kenggec. Kemma Yesungo ubaebictoa yombong memanu dzonoma fedeu <sup>38</sup>yofi edeyunuec, “Ubaongana ebiriyombonggeu homebeso anende, imocac ngeni yei nigoc ubagbori tacmina.” <sup>39</sup>Ifi dema kpesima kemma kicmesuya bangecfu hetutuckema yofi numuec, “Manna, negenna angana andeu ge kpakenec yomoc meickena feracnuu. Amma neac songo kpac, geac songo nga negen negeng imocngo seribeso.”

<sup>40</sup>Ye ifi numuma medac yenearu dzigene kemma yenenu gau fegec. Gau fegec yenemma Petoro yofi edeec, “Ngeni sifu aua mocguacsoc nigoc gaugbori kecgec. <sup>41</sup>Ngeni faitobannu embauac ubagbori kecma numugec. Foracngoc, ongaasungo efaiande nga sebingo ine ebiriude.” <sup>42</sup>Nga ye monggoc kemma yofi numuec, “Manggacna, kpakenec yomocngo feracnuudeac negenna mi ngereeu imoc nebare geac yoac seribeso.”

<sup>43</sup>Ifi numuma hama henu medacfora yeni kicngina gaungoc anu fegec. Femagec yenemma <sup>44</sup>monggoc wayunu kemma numuu atac harebec anu yoac warac deec, imocngoc dema numuec. <sup>45</sup>Numudacma medac yenearu dzigene hama yofi edeyunuec, “Ngeni gaungoc fema kecdae, imoc naric kpac. Naso wegenede, ngic yeni Ngicac Medac kererema kopocsicmeme

yeneac mariu faigecde. <sup>46</sup>Benukererec ngicngo hadeac amma yacgec kenni.”

<sup>47</sup>Ye ifi dema nammanu medac 12 yenearunac ogongina Yuda, yeng ngichabutoa kuneng yombong enara waraiyemmu hagec. Womong gareng enara nga yudangic enarafocngina yeneng sueyunugec wasaibeang nga gbarucnginagoc hasikegec. <sup>48</sup>Sikegec benukererec ngic yeng waraima faka anudeac derec derecgeyoac yofi bic edeyunuec, “Ngic titikokoc ammibade, ngeni ngic imocnoc mendanggema mebisia.” <sup>49</sup>Ifi dema yeng imohaingoc Yesuaru kemma, “Ohec, kpoukpou.” ifi dema titikokoc ammiac. <sup>50</sup>Ifi ammiu Yesungo yofi edeec, “Ogo, ge noc ua menadeac yei hadang?” Deu yeni hama Yesu maria noboc noboc mema mendanggegec.

<sup>51</sup>Anu ngic Yesugoc kecgec, yenearunac mongngo wasaibeanga kpedzima womong garengtoa yeac wanacngic kpema kedzaha noboc herecgeec. <sup>52</sup>Herecgeu mau Yesungo yofi edeec, “Ngic mong ye dzikac kpeude turunga dzikacngoc kiude, imoc fingecegembacac wasaibeangga ameau monggoc faina kemu. <sup>53</sup>Neac memeficsing mong mi fede, imoc negemma ifi annec. Nga Manna yagucnoc numumibai dede yeng angero kpetengina 6 tauseng arenga 12, angero habutoa ifia naric sueyunuu mama meficnubau. <sup>54</sup>Nga meficnubau dede mitikibiu faka yomoc fingerudeac oho ohoya fede, imoc fora mi fingebac.”

<sup>55</sup>Ifi dema ngichabu yofi edeyunuec, “Ngeni mendannuma godzungic meandae, ifi isoc wasaibeang nga gbarucnginagoc hadae. Nga ni wenaha wenaha Anutuac womonnu edekpou angemmemma kecanduae, imohai ine naric menubau. <sup>56</sup>Amma yoc ine profete yeni mitikibiu yoac ohogec fede, imoc fora fingerudeac imoc sasawa fingeccadce.”

Ifi deu medacfora sasawango Yesu wama woradacgec.

<sup>57</sup>Anu mitiac negen negengngic nga yudangic enarafocngina yeni womong garengtoa Kaifa yeac amau bic kpedzucnema tacgec, ihai Yesu wangepma kenggec. <sup>58</sup>Yeni Yesu mendanggema ifi mekemmagec Petorongo ngadenginau hereaugoc Yesu modacma kenec. Kensikema, Yesuac yoac desigecde, imoc negenudeac womong garengtoaac ama imocac oda manau kemema uamedac yeneac botucfu matarec.

<sup>59</sup>Anu womong gareng enara nga yudangic tutumangtoaac memba yeni hafoangoc tacma Yesu homecfu faigecde nga ye enacfu faifai ammima boi anggecdeac negengising anggec. <sup>60</sup>Ifi anggec ngic homacngo hama enacfu faifaiyoac degec, imocngo Yesu homecfu faigecdeacsoc mi anu hofocmangoc kecma ngic yohockang yereng fingeccma boi amma deoc, <sup>61</sup>“Yesungo yofi deec, ‘Ni Anutuac womong hembarackema uameme harebec ammanu monggoc mebade, ni kucna imocacsoc fede.’ ” <sup>62</sup>Ifi deec womong garengtoango yacma Yesu kpesimiec, “Geac yoac dedae, imocac noboha mong mi denade me?” <sup>63</sup>Ifi deu Yesungo ine waickema

nanec. Nanu womong garengtoango edeec, “Anutu kekec mingina, yeac kicfu kpesigemba ge deserina, geng Messia Anutuac medac me kpac, imoc edenununa.” <sup>64</sup>Ifi deu yeng meremma yofi edeec, “Imoc gennoc denec. Nga edengunuba negenggec, yaguc nga namma enude Ngicac Medacngo Kuctoa Minginaac foiaugeng tarude. Amma ye kurumenggac hoeng witiau hau ngeni imoc henggecde.” (*Mitiyegec 110:1; Danie 7:13-14*) <sup>65</sup>Ifi deu womong garengtoango yoac imoc negemmanganema wambaya membarackema yofi deec, “Ye Anutu bic emmidacac yoacninaac boingiac monggoc mi obohonide. <sup>66</sup>Ngeneng yoac imoc negemma dafi dedae?” Deu yeneng meremmigec, “Ye homeudeac arennoc.”

<sup>67</sup>Ifi dema yeni Yesu kicmesuya sofohoma mari tuema kpekpefac ammigec nga goa yeneng dzikacngo kpema <sup>68</sup>degec, “Messia, merang gudac, imocac kpefingyoac edenununa.”

<sup>69</sup>Ifi amma kecmagec Petorongo oda manau ama sobennu tarec. Tacmanu wanac naroang mongngo yearu kemma deec, “Ge gariraiangincnoc Yesugoc kecannecc.” <sup>70</sup>Deu ye ngic sasawa tacgec, yeneac kicfu sebi heima deec, “Ge yoac denec, imoc obohoduac.” <sup>71</sup>Ifi dema nagu kemmanu wanac naroang mongngo hemma ngicngac ihai nanggec, yeni edeyunuec, “Ngic imoc ye Yesu Nadzaretenc, yegoc kecandenoc.” <sup>72</sup>Edeyunuu Petorongo Anutuac kicfu serima monggoc busickpema deec, “Ni ngic imoc mi negenduac.” <sup>73</sup>Ifi dema nammanu ngic yeneng Petoroaru kemma degec, “Neni ubadzidziga negendimbe, ge foracngoc yeneac arennunac.” <sup>74</sup>Edegec ye yengenaoc sowecemema sopecemema deec, “Ni ngic imoc mi negemmiduac.” Deu imohaingoc kokorecngo arohoec. <sup>75</sup>Nga Yesungo yoac yofi bic edeec, “Kokorecngo mi arohomanu geng ni mi negennunec dema sebiheina atac harebec anude.” Petorongo yoac imoc negensima kemema ubahodung kuneng negemma kiac hodung kiarec.

**27** <sup>1</sup>Ama wereckenu womong gareng enara nga yudangic enarafocngina yeni uba mocgu amma Yesu homeudeac deserigec. <sup>2</sup>Deserima Yesu maria dedeckema Yudaia bangecac gawana Pirato, yearu mekemma yeac mariu faigec.

<sup>3</sup>Anu Yesu homeudeac deserigec, Yuda benukererec ngicngo imoc hemma deec, “Ni nocac ifi andua?” Ifi dema ubea manganeu siriwa dzo 30 migec, imoc mekemma womong gareng enara nga yudangic enarafocngina yeni monggoc merengyemmema <sup>4</sup>edeyunuec, “Negenggec, ni kererema ngic kopocsiha kpac, ye sac nadzicmiai.”<sup>y</sup> Ifi deu yeneng degec, “Imoc neneac ebic kpac, imoc geac ebic.” <sup>5</sup>Yeni ifi dema dzo wagec, yeng imoc mekemma womonnu ukuu enu wama kemma ubasac

---

<sup>y</sup> 27:4 Dedeseri 27:25 yofi dede, ngic mong ye dzo mema mong kpehomeu sac kpetinggeude, ye sowehagoc anude.

nec. <sup>6</sup>Nga womong gareng enara yeneng siriwa dzo imoc kpedzucnema degec, “Dzo imocngo sac bummeec. Imocac amma dzo imoc sesekatapau faifai, imoc singngo mi dede.” <sup>7</sup>Dema yeni yoaac dedzege amma dzo imocngo kuric yeneac kicsere fingerudeac enang kudzimemengic yeac ua bangec bummegec. <sup>8</sup>Bummegec bangec imocac kpara Sacbangec hanahema degec nga imoc yaguc fedengoc. <sup>9-10</sup>Profete Yeremiango yoaac yofi deec, imoc imohai foragoc anec, “Faka yofi fingerudeac Kebungo edenuc, Israe medacfora yeni ngic imocac buma kpetea faima, “Ye siriwa dzo 30 imocacsoc.” ifi degec. Nga yeni dzo imoc mema imocngo enang kudzimemengic yeac ua bangec bummegec.’”<sup>z</sup>

<sup>11</sup>Anu yeni Yesu mekemma gawanaac kicfu faigec nammanu yeng kpesimiec, “Ge yudangic yeneac ngictau me?” Ifi deu Yesungo yofi meremmiec, “Imocnoc geanggaoc denec.” <sup>12</sup>Anu womong gareng enara nga yudangic enarafocngina yeneng namma haniaya degec Yesungo yoaac turunga mong mi merengyemmeu <sup>13</sup>Piratongo kpesimiec, “Yeni yoaacfa faiguma yoaac homac yombong dedae, ge imoc mi negennec me?” <sup>14</sup>Deu yeng yoaac monnec mong mi merenu gawanango kerecetegec yombong anec.

<sup>15</sup>Anu gawanango hombannu yofi angkefec, yuda ngichabu yeni witicngic monggac kpara kpacgec, yeng ngic imoc yungeru witicamaunac maande. <sup>16</sup>Naso imohai godzungic kpara kekena mong witicamau kefec, kpara Baraba. <sup>17</sup>Nga ngicngac kpedzucnedacma nammagec Piratongo yofi kpesiyemmeec, “Merac yungecngemmedeac negendae, Baraba me Yesu, kpara mong Kristo deandae?” <sup>18</sup>Yudangic yeni Yesu eng keracmangang ammima yearu faigec, imoc negemmanoc ifi deec.

<sup>19</sup>Nga Pirato ye desi desi tatahau tacmanu enemango yearu yoaac yofi faiu kenec, “Ge ngic kpetiac yomocac yoaac mi kpeserena, imoc wana. Ni tofocnac fema gaukpefing hemma yeac amma ubaebic homac medua.” <sup>20</sup>Nga womong gareng enara nga yudangic enarafocngina yeneng habu fenggeyemmegec yeneng Baraba yungecyemmeudeac degec nga Yesu ine kpehomegecdeac degec. <sup>21</sup>Nga gawanango kpesiyemmeec, “Ngic yohockang nandape yerearunac merac yungecngemmedeac negendae?” ifi deu yeni imohaingoc degec, “Baraba.” <sup>22</sup>Ifi degec kpesiyemmeec, “Ifi anu Yesu, kpara mong Kristo deandae, yeac dafi ambade?” Kpesiyemmeu yeni sasawango degec, “Ye mariponnu kpema homeu.” <sup>23</sup>Ifi degec, yeng kpesiyemmeec, “Imoc dafiac nga noc kopocsicac?” Ifi deu yeni arohommunggema degec, “Ye mariponnu kpebesonga.”

<sup>24</sup>Ifi dema nanggec hemma Piratongo yoaac dindingac deudeac obohoec. Nga yeni ine serima kpacma nanggec kpeborongtoa hanahema fingeru yeng doku mema ngicngac habutoa kicnginau namma maria dzuacma

<sup>z</sup> 27:9-10 Mataio ye Yeremia 32:6-9 nga Dzekaria 11:12-13 kpeturanggema deec.



yofi deec, “Ngic yomocac sacac kopocsic, imocngo nearu mi tacbeso, imoc ngenearu febeso.” <sup>25</sup> Ifi deu ngicngac yeni sasawango yoara meremma degec, “Yeaec sacac kopocsicngo neni nga nambaracfofnina nenearu febeso.” <sup>26</sup> Nga Pirato ye Baraba yungecyemmema Yesu ine dzikacngo kpema mariponnu kpegecdeac wasaingic maringinau wayemmeec.

<sup>27</sup> Anu gawanaac wasaingicfora yeneng Yesu ama manaunac memama ama tegiau wasaingic oda manau kecandae, imohai meemama wasaiareng sasawa hafoangoc kpedzucnegec. <sup>28</sup> Kpedzucnedacma Yesu yengena wamba hesimima ngakpi mong kpauc kpauc heimigec kemeu <sup>29</sup> somang batihema oruhau heimigec kemeec. Kemeu yasu mong memigec marifoiango mema nanec. Ifi amma kiwau fafoc heima defagoc ammigec, “Ohec, yudangic yeneac ngictau.” <sup>30</sup> Amma yeni sofohoma yasu wangecma imocngo oruhau kpegec. <sup>31</sup> Defagoc ammikecgec wisickeu yenang ngakpi hesimima yengena wamba monggoc heimigec kemeu mariponnu kpegecdeac hesicke kenggec.

<sup>32</sup> Mekemma sinnu ngic mong meficgegec, kpara Simong, Kirene taonunac, yeng Yesuac maripong tofohoudeac ngombonggegec tofohou kenggec. <sup>33</sup> Kengkecma bangec buma mong kpara Gorigata, kpara mong Hatasic degec, ihai kensikegec. <sup>34</sup> Kensikema waing doku wiac hodungagocngo yerec yerecgea, imoc gumegec ye imoc nenegemma waec. <sup>35</sup> Nga yeni ye mariponnu kpegec nammanu wambaya kpeing kpema mederegec. (*Mitiyegec 22:18*) <sup>36</sup> Ifi amma garenga tacgec. <sup>37</sup> Nga ye nanu oruha witiau maripongau kopocsicac haniaya yofi ohogec, “Yomoc Yesu, yudangic yeneac ngictau.”

<sup>38</sup> Anu yeni godzungic yohockang yegoc momoc mariponnu yuruma mong foiugeng nga mong kanaugeng, ifi faiyurugec. <sup>39</sup> Nga ngic ihai kengha anggec, yeni Yesu deengdema ammima orucngina kpatitickema <sup>40</sup> degec, “Ge Anutuac womong hembarackema wenac harebec ammanu medacbesonga denec, ge geangga onggongemena. Nga Anutuac medac kecnecc isoc mariponnunac mesiemema mana.” <sup>41</sup> Nga womong gareng enara nga mitiac negen negengngic amma yudangic enarafocngina yeneng ifingoc desusuic ammigec, <sup>42</sup> “Ye ngic goa onggongyunukefec nga yengena ine naric mi onggongemeude. Ye israengic nenang ngictau kecdeu mariponnunac mesiemema mau ye negensinggenide. <sup>43</sup> Ye yofi dema negen negensinga Anutuaru faiec, ‘Ni Anutuac medac.’ ifi deu Anutungo yeaec ammikecdeu mesibeso.” <sup>44</sup> Nga godzungic yegoc momoc yurugec, yeri yoac siriha ifiangoc deendema ammioc.

<sup>45</sup> Anu wenac dzongiau 12 kiroc ammanu imohai ama kundung kpema kundungngo bangec sokoma fekemmanu 3 kiroc marai anec. <sup>46</sup> Nga 3 kiroc imohai Yesungo ubaudumeng kunengngoc kpacma yofi deec, “Eri, Eri rema sabaktani.” Imocac titiha yofi, Anutuna Anutuna, ge nocac wanudang? (*Mitiyegec 22:1*)

<sup>47</sup>Anu ngic nanggec, yenearunac goango negemma degec, “Ye Eria kpacambic ammade.” <sup>48</sup>Ifi kparu ngic mongngo negemma gereagoc nedzima kemma kondung sobing mong mema waingdoku aengagocfu nemuruckema kpinnu faima Yesu gumeec. <sup>49</sup>Nga goango ine degec, “Ngeni imoc wagec, Eria foracngoc hama meficgeu henni.”

<sup>50</sup>Nga Yesungo monggoc ubaudumeng kunengngoc kparu asuya ereec. <sup>51</sup>Ereu homeec, imohaingoc Anutuac womonnu kpoructoa womongmana kpetiac yombong naguyau nanec, imocngo wihacnac botuhaungoc tohoma mama yohockang anec. Amma usoctoa meu fagannu hoctoa toa tohoge. <sup>52</sup>Nga kicsere fekenec, imoc anggeu ngic kpetiac warac homegec, yenearunac homacngo sebigo gborigec. <sup>53</sup>Yesungo kicsereaunac gborima yaru yeni ngade kicsereinginaunac erema taong kpetiac, imohai hama ngic homac fingecyemmegec. <sup>54</sup>Nga wasaigareng nga ngicfora Yesuac gareng nanggec, yeni usoc nga wiac fingerec, imoc hemma damuyunuu wareckema degec, “Foracngoc, ngic yomoc ye Anutuac medacnoc.”

<sup>55</sup>Nga Yesu kpegec, imohai ngac homacngo araing namma wiac hennegeng anggec. Yeni Gariraiia bangecfunac hanahema Yesu modacma hama kingang kpemigec, <sup>56</sup>yenearunac ngac goa kpacngina yofi, Maria kpara mong Madara amma Maria mong, Yakobo nga Yosefe, yereac nonggongira amma ngac mong Dzebedaioac medahora, yereac nonggongira, yeneng ngachabu yenigoc nanggec.

<sup>57</sup>Anu Arimataia taonnunac ngic mong finactoayagoc, kpara Yosefe, yeng Yesuac yoac negemma yeac arennu ifingoc kefec. Ye ama toforebeso ammanu <sup>58</sup>Piratoaru kemma Yesuac fareng meudeac kpesimiec. Kpesimiu Piratongo migecdeac deu wamigec. <sup>59</sup>Wamigec Yosefengo Yesuac farenga mema linengkporuc mong kongaha, imoc mema imocngo tembonggema mekenec.<sup>a</sup> <sup>60</sup>Mekemma yengena kicsere gboria dema hocsirau singa usu usuya feec, Yesuac fareng imohai faima hocyada mong kpedidinggeu kicsere naguya imocngo hedzickeu taru kenec. <sup>61</sup>Anu Maria Madara nga Maria ogea yereng kicsere naguya nonongkac ihaigeng fiec kenu taroc.

<sup>62</sup>Wereckengau sabata asoac anu womong gareng enara nga farisaio yeni kpeturanggema Piratoaru kemma <sup>63</sup>degec, “Kunennina, ikocngic imocngo gbori kecmangoc, yoac mong deec, neni imoc negensidimbe, imoc edeguni negenna, ‘Ni homema wenac harebec ammanu Anutungo homecfunac megborinuu monggoc yacbade.’ <sup>64</sup>Nga medacfora yeneng kemma farenga hamangec meworagec, ifi debauac, ‘Ye homecfunac yacdac.’ imocac ge kicsere garenggegecdeac edeyununa uameme harebec garenggebisia. Warac ikoc mong anec, imoc femanu ngadeac ikocngo

<sup>a</sup> 27:59 Lineng imoc kpindzing mong ambiac ogea, imocngo wamba megec.

witiau enu yadibacac imoc edegudimbe.” <sup>65</sup>Ifi degec Piratongo yofi edeyunuec, “Naric, wasaingic ngemmeba ngeni wangecyunu kemma kicsere garenggegedeac kuc mekecdae, imocac siriha garenggebisia.” <sup>66</sup>Ifi deu yeni kemma kicsereac hocnagu mi kpedidinggegedeac witiau kpaefai gec. Faima wasaingic yeneng gareng nanggedeac edeyunuec.

**28** <sup>1</sup>Sabata naso wisickeu sonda gboria hanac hanaheau ama werec wereckenggac Maria Madara amma Maria ogea, yeri kicsere hembesonga kenoc. <sup>2</sup>Kemmaec Kebuac angero mongngo kurumennunac mau usoctoa kucbiricngoc meu yang kicsereac hoc kpedidinggeu kenu witiau emma tarec. <sup>3</sup>Tarec, ye siriha pirac pirac siriha nga wambaya kongac kongac hoeng isoc. <sup>4</sup>Nga gareng yeneng ye hemma kengecyunuu dzonongngina fedeu homebesonga amma fekenggec. <sup>5</sup>Nga ngac yeri kensikemaec angerongo yofi edeyuruec, “Ngeri mi kengecnguruu, ngeri Yesu mariponnu kpekpea, ye hembeso hadape, imoc negenduae. <sup>6</sup>Nga ye ine yei mi fede. Ye edengunuecmoc, ifi yacdac. Ngeri yoc hama fefe hene. <sup>7</sup>Ngereng imoc hemma bic kemma medacfora yofi edeyunuec, ‘Yesungo homecfunac bic yacdac. Ye waraingemmema Gariraia bangecfu kenu ngeni ihai kemma meficgegede.’ Yoac imoc yagucnoc edenguruba negendape.”

<sup>8</sup>Ifi anu yeri kicsere wama damu nga sogac sogaitoagoc medacfora siduc edeyunuecdeac nedzima bic kenoc. <sup>9</sup>Nedzi kemma Yesugoc ewacgec yang yofi deec, “Wenacngerec.” ifi deu yeri hoangau ngonducnema haniau mema afeheoc. <sup>10</sup>Nga Yesungo yofi edeyuruec, “Ngeri mi kengecnguruu. Ngeri kemma tosofocna Gariraia bangecfu kenggedeac edeyunuec, yeni ihai kemma nenggede.”

<sup>11</sup>Anu ngahoc yeri kemmaec wasai ngichabu kicsere garenggegec yeneanunac goango taonnu emma wiac fingerec, imocac siduc womong gareng enara edeyunudacgec. <sup>12</sup>Edeyunuec yeni yudangic enarafocngina yenigoc adzorogec. Adzoroma yoac deserima wasaingic kicsere garenggegec, yeni yoac degedeac dzo imocacsoc yemmema <sup>13</sup>yofi dema deracyunuec, “ ‘Neni tofocnac gau femina yeac medacfora yeneng hama farenga hamangec medau.’ ngeni ifi debisia. <sup>14</sup>Nga gawanango yoac imoc negemma wiac mong angemmebacac mi kengecngunubeso. Neneng demekiri naric amminide.” <sup>15</sup>Ifi dema edeyunuec wasaingic yeni dzo imoc mema yoac ede edeyunuya, imoc deyadigec. Ikocyoacngina imocngo yudangic yenearu sokoma fecngo fedengoc.

<sup>16</sup>Anu medac 11 yeni Gariraia bangecfu tiki mong Yesungo bic derecgeyemmeec, ihai enggec. <sup>17</sup>Emma yengena hemma afehegec nga ngic mocgu mocgungo ine ubayohoc anggec. <sup>18</sup>Nga Yesungo kicnginau hama yofi edeyunuec, “Nenggec, bangec nga kurumenggac kuc sasawa ni bic nendac nendara. <sup>19</sup>Imocac ngeni kemma ngicngacareng sasawa

neac sing negemma yoac modac modacareng anggec ngeneng meyunuma yenengareng ayemmebisia. Amma ngeneng Manggac nga Medac amma Tiri Asu yeac kpacfu doku nadzicyemmebisia. <sup>20</sup>Nga neng yoac sasawa dederecge angemmekefai, ngeni imoc hafoangoc modacdacgecdeac kpouyemmebisia. Amma negendae, ni wenaha wenaha ngenigoc kecbare naso wisickebesande.”